

近代中國史料叢刊續編第十八輯
沈雲龍主編

船政奏疏彙編

裴蔭森撰

卷二七——卷四二

文海出版社

有限公司
印行

船政奏議彙編卷二十七目錄

裴蔭森一

接篆任事日期並叩謝

天恩摺

察看福州海口及填塞港道大概情形摺

懇准撥款試造鋼甲兵船摺

購修舢板復設練船摺

粵省劃收快船購料存銀請飭撥還並催積欠

關款摺

大正及清生系二ノ二一ノ一合

船政奏議彙編卷二十七

裴蔭森一

接篆任事日期並叩謝

天恩摺

奏爲恭報微臣抵工任事日期叩謝

天恩仰祈

聖鑒事竊臣恭閱邸抄光緒十年十二月十三日奉

上諭裴蔭森著署理船政大臣福建按察使著該督

撫派員署理欽此又於二十三日承准閩浙督臣

咨開接總署來電本日奉

旨楊昌濬電奏已悉裴蔭森著卽赴船政大臣署任

欽定大清會典事例 卷一百一十一
等因欽此遵於二十四日申刻行抵馬江工次
准前署船政大臣張佩綸飭提調道員周懋琦
管帶福靖營總兵彭定太等呈送總理船政木
質關防文卷前來當卽恭設香案望

關叩謝

天恩敬謹任事伏念臣江左輕才由庚申進士觀政
工部改官道員分發湖南

題補辰永沅靖道缺上年二月仰蒙

皇上特達之知

擢授福建按察使適值蜚島戒嚴鱗編待輯涓埃

未報競惕方深茲復渥荷

溫綸權典船部查製造爲海軍之根本工程隨財力

爲盈虛法人肆擾以後張佩綸振墜補殘煥然

復舊現與

臣

擬商添購機鑪推廣廠塢而臺氛

未靖經費尤難船政本大學士

臣

左宗棠創議

現在駐軍閩海就近咨詢實力講求督率提調

員紳人等認真考核遇有應行酌籌變通情形

會商將軍督撫

臣

並咨商南北洋大臣隨時

奏明辦理庶事歸實用欸不虛糜以期仰副

朝廷慎重海防籌固要工之至意除臬司篆務另

奏
候督撫臣派員接署外所有微臣抵工任事日期並感激下忱謹繕摺由驛馳陳伏乞

皇太后

皇上聖鑒訓示謹

奏

光緒十年十二月二十七日拜發奉

旨知道了欽此

察看福州海口及填塞海道大概情形摺

奏爲察看福州海口及填塞海道大概情形恭摺

具陳仰祈

聖鑒事竊臣於光緒十年十二月二十四日馳赴馬

江工次蒞事業經奏明在案伏維大易垂象王
公設險以守其國有風濤潮汐以爲天險有砂
礁隄塞以爲地險而未陰未雨桑土綢繆尤賴
人謀扼險以預爲之備若恃其自然之險要而
貿貿焉苟且目前僥倖無事彼鴟張狼顧者方
伏伺於牀榻几席之前斯開門揖盜之勢成而

有險與無險者等矣是以

國家不患無天地之險而患無人險臣嘗乘輪上

下周覽形勢知馬尾一區上抵省垣南臺水程
四十里下抵五虎門海口水程八十里有奇自
五虎門以至南臺歷壺江王埔金埕長門館頭
亭頭閩安鎮員山寨羅星塔烏龍江鼓山林浦
皆形勢之區而壺江港道居長門之外總扼芭
蕉五虎兩路要衝實爲海門第一重險要馬江
地隸閩縣居省城南臺林浦鼓山之南踞羅星
塔之上流三江交匯中間港汊旁通長樂福清

連江等縣重山環抱層層鎖鑰固沿海七省形勢最勝之區船政公署建於馬尾山之麓製造兵輪設廠一十有三而輪機廠鑄鐵廠尤爲江粵所罕見船塢傍山列屋夾道隘巷處處可以伏兵故去歲七月間守者扼險以待彼族亦未敢闖入也過羅星塔田螺灣稍折而東爲閩安南北岸兩山相距不及百丈鑿山開洞安設礮位敵船不能飛渡蓋露處礮臺容有被敵損破之時兩山鑿洞安礮斷無被敵摧殘之理實爲省城東路重鎮鎮南出爲琅琦門其最險者梅

花沅之汎石澳與琅琦島對峙口門有鐵沙三道迴環交互橫亘於中居民素稱鐵港又閩安鎮之東爲金牌長門中流一束兩崖相距皆不越一百二十丈現在金長礮臺及射馬干礮臺划鮒港礮臺均能直擊壺江來路又擬於熨斗山坡掘土爲臺安設巨礮宿重兵於山坳以爲堅護一切攔江之物臣前在臬司任內奉檄督辦填塞海口事宜經督撫臣奏明在案先填林浦以固近省之門戶次塞梅港以杜旁竄之途徑數月以來次第蒞事惟金牌長門雙龜對峙

水深溜急非人力可施現於金長外之壺江擇
中間港道淺隘處所用木櫃竹篋壘石爲堆
中用木毬鹿角海馬鐵衝拒計一百五十架內
用新造平底方舟三十號裝石沈水最後一層
編巨木爲長陣橫列港路截斷衆流層層佈置
藉可遏敵船入口之咽喉庶幾可復當年天險
之舊而敵人不敢萌窺伺之心壺江四面皆山
其地若壺故名壺江又四面皆水其地若浮亦
名浮江一切商船皆停輪待潮非用海戶漁船
引水不能自達於馬江該處有鐵沙可以攔舟

有活沙可以膠舟勢甚險阨敵人憚之故塞壺江者所以扼芭蕉五虎之要衝也查馬江爲船政重地本不應停泊商輪臣現與督撫臣議商照會英美各國領事官請將壺江封口一切商船改停芭蕉山側貨物用駁船由壺江從分流小港起運仍於通商無礙所有船署需用木料鋼鐵等件向由外洋購回及香港上海轉運者應由壺江起駁亦須水師陸軍更番照料庶免意外之虞伏波輪船歲前修竣惜非康邦機器且噸位較小不能衝擊現飭駐防館頭一帶橫

海一船二月底亦可完工但前購之礮一時尙
難運到至添補機錘推廣船塢講求兵輪水雷
應如何寬籌經費之處容俟查明籲請理合先
將大概情形謹會同欽差大臣大學士二等恪
靖侯臣左宗棠福州將軍臣穆圖善閩浙總督
臣楊昌濬革職暫緩交卸福建巡撫臣張兆棟
恭摺由驛具奏以

聞伏乞

皇太后

皇上聖鑒訓示遵行謹

奏

光緒十一年正月十五日拜發奉

旨覽奏已悉所籌尙妥仍著隨時會商左宗棠等相
機布置嚴密防守並將船政應辦事宜實心經理
以副委任欽此

懇准撥款試造銅甲兵船摺

奏爲中法議約已成懇由船政試造新式雙機銅甲兵船以壯軍心而堅和局恭摺會陳仰乞

聖鑒俯准撥款事竊查同治十三年倭兵擾臺前總

理船政

臣

沈葆楨疊次商辦鐵甲兵船在專官

紳有婉辭諷止者有直言駁辯者而沈葆楨與

洋將之言曰有鐵甲而兵輪乃得用其長無鐵

甲而兵輪終恐失所恃議者謂其慮患之深不

遽信其謀兵之善也迨上年法人犯順各處新

報開列法國兵船綜計不足三十號而差遣轉

年創造雙機鋼甲兵船名柯襲德士迪克士飛
禮則唐等三船計船身長中尺十七丈三尺九
寸船腰闊四丈船旁鋼甲厚八寸艙面鋼甲厚
二寸每時可行中國海道八十里配用新式康
邦臥機計算實馬力一千七百匹較北洋德國
訂造之定遠鐵甲船身較小與濟遠鐵甲馬力
稍輕而駕駛較易費用較減除礮位魚雷電燈
另購外每船工料估銀四十六萬兩兩船並造
二十八箇月可成三船同造三十六月卽竣閩
省若有此等鋼甲兵船三數號礮船快船得所

大清會典事例

護衛膽壯則氣揚法船斷不敢輕率啓衅稟由
提調道員周懋琦繪圖通稟請示並據稱試造
雙機銅甲以魏瀚鄭清濂吳德章監造船身陳
兆翔李壽田楊廉臣監造船機確有把握如果
虛糜公費甘與該學生等一同科罪等語臣等
復查疆臣議辦鐵甲十有餘年或因喫水動逾
二丈三四尺中國海口較淺出入不能自如所
可慮者一閩粵等省船隔過小修理不能勝儀
所可慮者二船身滯重轉掉未靈管駕不能如
法所可慮者三該道員周懋琦等所呈總分船

圖據開全船噸儀一千八百噸喫水止深一丈二尺三寸沿海各口均可駛行則出入不難矣船政前爲南洋承辦開濟等項快船實馬力大至二千四百匹本勘定附廠紅山山麓另造砌石大塢預備修理南北洋快兵船鐵甲船之用核估工料需銀一十萬兩三四月可以竣工現將次第造辦則修理不難矣三屆出洋學生另案請加展年限每年在外國兵船閱歷須扣足六箇月爲期船政見又另購舨舩復設練船爲出洋訓練學生水手之用則管駕亦不難矣自

來兵家有恃乃可無恐先聲足以奪人南北洋
籌辦水師頗費財力援閩之師久而不出出則
遲回觀望畏葸不前法人得窺其微遂乃截商
阻漕欺中國鐵甲未成兵船無護不敢輕於嘗
試將以大肆要求幸而諒山復爲我克臺澎不
能安據孤拔又伏冥誅餉絀民譁暫時就範然
而法人豈能一日忘臺澎耶該道員久官閩臺
該學生等籍隸福省均無希圖名利之心祇以
馬江死事諸人非其親故卽屬鄉鄰以報仇雪
憤之心寄於監作攷工之事其成效必有可觀

至所需製船經費一百三十餘萬兩或在洋欸
內酌撥抑或另籌協濟現雖經費異常支絀然
必需之欸臣等不敢稍有畏難應俟奉

旨後由臣昌濬等隨時妥籌辦理所有船政試造雙
機鋼甲兵船緣由理合會同馳

奏抑臣等更有請者歐洲大局已成連橫之勢中
國若再拘於成見情形岌岌可危除製礮造船
教將練兵別無自強之道然不開礦鍊鐵購機
造鑪事事購自外洋財源溢出軍火之費較之
洋藥漏卮尤爲繁巨臣宗棠日前拓增船礮大

奏
廠一疏仍求

宸衷獨斷天下幸甚此摺係臣蔭森主稿臣宗棠臣

穆圖善臣昌濬臣兆棟會商意見相同謹恭摺

附輪船到滬交上海縣由驛五百里馳陳伏乞

皇太后

皇上聖鑒訓示謹

奏

光緒十一年五月二十二日拜發奉

旨留申欽此

購修舨版復設練船摺

奏爲購修舨版復設練船恭摺陳仰乞

聖鑒事竊查泰西水師章程凡習駕駛者先由學堂肄業數年於天文羅經測量算法麤具根柢大約年十八九歲以後派入練船周涉海洋閱歷風沙演試礮彈巖定年限按時考試按資陞調蓋海上交綏非衽席風濤者不能確有把握耳練船以舨版爲多輪船用火帆船用風汪洋大海之中偶遇機器損傷抑或煤炭缺乏非帆纜無以繼輪機之窮故學御帆船較輪船爲尤要

亦較輪船爲尤難也同治九年原任大學士臣

英桂於閩浙總督任內曾以萬金購日耳曼國
駛舨一號從新修改名曰建威練船另延英國
水師官遜順等爲教習頗著成效嗣建威損壞
經費支絀改派揚武爲練船有名無實練務廢
弛馬江石浦諸役死事獲咎各學生內有屢經
英國水師兵船總統書院教習甚爲褒獎出具
切考給憑回工者乃臨事倉惶不能出奇制勝
固由船小力單形見勢絀要亦各船士卒疏於
訓練所致蓋練船不但練水手礮勇卽管駕大

二副無不因練成熟臨機決勝此泰西海軍尤
必多設練船者也臣等以爲諸費可省練船之
費必不能省創深痛鉅之餘懲前毖後萬難再
事因循前任船政臣何如璋奏請由廠新造舢
舨估費須二萬餘兩又恐駛誤別船工程因未
造辦適有英商美那二枝半桅舢舨一號去冬
守風泊住羅星塔江次該船主遂先回滬其船
托英商天裕洋行拍賣洋平番銀四千元委員
勘估該船身長英尺一百四十尺腰闊英尺三
十一尺三寸艙深英尺十七尺七寸商噸可載

重四百五十七噸船身係硬木枰面係金山松木均無腐爛艙底底栓銅鐵各半船底全鑲銅片桅身係鐵木船上鐵索錨鍊舳舻抽水機器起錨車件一切器具俱全查閱驗船公司憑照係同治十年在德廠製成光緒八年至十年保險公司照一等夾船保險卽飭知縣魏瀚購定並由英領事繕立契據惟去冬今春久泊江灘舢板應須修理帆纜亦須更換商船改練所有帆艙索艙火藥艙彈子艙及礮門戰枰官廳住房等處又須添備核估修費減於建威而船身

較爲堅結查船政前屆出洋章程習駕駛者每
年在船僅兩箇月現擬咨商北洋大臣大學士
臣李鴻章請改爲每年在船必扣足六箇月冀
增功課惟核計每人每屆三年勻算需銀一萬
元之多勢難多派學生而學生根柢未深出洋
亦屬無益整頓海軍惟有多設帆船訓練庶有
實效現在所購舢舨擬名曰平遠已飭廠員趕
修於船政駕駛學堂各生取其年逾十八歲以
上二十五六以下材貌魁梧膽氣壯定者另選
精壯水手多人赴船肄業嚴定課程稽核日記

由近及遠東則日本高麗各洋南則新加坡檳榔嶼各埠北則旅順大連環海參衛西則印度洋紅海地中海每年春出秋歸冬出夏歸學堂所習天文海圖證之於礁沙實境是否測算合符所習槍礮陣法驗之於風水疑難是否施放定準三年爲期與學堂輪番更換學業愈練愈熟人才愈練愈多同是出洋同習駕駛用費較減收效較易果有膽略非常人才出衆再赴各國兵船涉歷一年半載便能得其體用據提調道員周懋琦稟請前來臣查駕駛與製造不同

外洋廠多器備習製造者非親至廠中不能深
窺窾窳習駕駛者則無論何國水師不外嚴密
二字嚴則一律整齊密則不留疏懈而要在乎
熟而已至臨陣對敵運用在乎一心但須出洋
久練不必定至外國兵船始識兵機也惟管駕
練船與管駕輪船不同管駕輪船固須熟習船
學管駕練船卽爲各輪船管駕執事水手之教
習必須曾歷各國洋面通曉水師章程爲洋員
所素知者始能勝任未便輕率派委船政向延
西員以頗煩費現擬會商李鴻章於北洋兵船

管駕內或於水師學堂教習內揀派管駕以資
得力理合會商大學士二等恪靖侯臣左宗棠
福州將軍臣穆圖善閩浙總督臣楊昌濬革職
暫緩交卸福建巡撫臣張兆棟恭摺附輪船遞
上海縣由驛四百里馳陳伏乞

皇太后

皇上聖鑒訓示謹

奏

光緒十一年六月初六日拜發奉

旨該衙門知道欽此

粵省劃收快船購料存銀請飭撥還並催積欠
關款片

正在繕摺拜發間承准兩廣督臣咨據廣東善

後局司道詳請將前任船政臣何如璋寄存匯

豐銀行二十萬元一欸抵收代閩省購辦軍火

之欸飭藩司籌還船政等語臣查何如璋兌存

匯豐銀行番銀係臣左宗棠南洋解造快船經

費並非閩欸現第三號快船輪機鑄件三萬餘

兩鐵板鐵槽各件五萬餘兩一箇月內卽到船

政續造三等快船鐵料正月改電英廠鑄辦需

銀十萬餘兩約四箇月後可到均須在香港兌給洋商故奏案辦結未將番銀提回以省往返兌費今廣東抵收代閩購辦軍火各款自應照辦惟南洋快船購件轉瞬到粵提單寄閩無銀付給必需認息各件墩儼奇重棧租甚昂守候付銀估算棧租多至千餘元數千元不等南洋不能承認船政何從賠墊請

旨飭下閩浙督

臣

飭藩司迅速撥款解還船政各清

各款楊昌濬顧全大局必不令

臣

爲難爲南洋

藉口再船政造船歷奉

恩旨於海關六成項下月撥二萬兩四成項下月撥
二萬兩現核六成項下積欠二百四十餘萬兩
四成項下上年連閩欠解十四萬兩本年時屆
六月應解十二萬兩甫解四萬兩前蒙將軍
穆圖善洞悉臣為難情形允本年四成項下全
數解足現在閩省茶市正旺南洋第三號快船
檣木月內起運到工須付價十餘萬兩並求
恩旨飭下閩海關將軍籌解足數以應急需曷勝急
切悚惶之至理合附片陳明伏乞

聖鑒謹

奏

同日拜發奉

旨著照所請卽由裴蔭森知照楊昌濬穆圖善將應
還應解欸項迅速撥解以濟急需欽此

船政奏議彙編卷二十七終

船政奏議彙編卷二十八目錄

裴蔭森二

第五號橫海鐵脅輪船試洋摺

製船養船經費請飭地方官寬籌濟應片

洋教習到工添蓋學堂洋房片

臺防需船派伏波東渡以供差遣摺

橫海兵船公費遵照新章分別核給片

九十兩年分歲入歲出冊籍請展限片

世無

船政奏議彙編卷二十八

裴臣才和

第五號橫海鐵脅輪船試洋摺

奏爲橫海輪船出洋恭摺具陳仰祈

聖鑒事竊船政第五艘鐵脅輪船下水日期暨船身縱橫長廣蓄水丈尺馬力及擬用礮位緣由經前任署理船政大臣張佩綸於光緒十年十一月初八日

奏明在案張佩綸於十二月二十四日交卸赴京時法船連艚北發只以鐵艦游駛於媽祖澳洋面往來窺伺聞口情形緊要臣嘗親至壺江瓊

崎青嶼梅花各港督飭員紳填堵旁流勘辦
路不敢稍多一域各廠工匠任令調往金牌長
門南北岸各路軍營幫築礮壘修製礮架等事
侵佔船工十之六七正月以後南洋輪船被阻
不出臺澎求援雖殷閩省陸軍望洋徒歎乃收
回各路撥出工匠專力船工據報水缸機鑑安
置妥貼四月初三日於塢前試車查有記名簡
放總兵潘順上年隨同督_臣楊昌濬來閩派交
船政差遣_臣察看潘順身經戰陣歷練老成商
明督_臣委令上船管駕據報船艙之機器管軸

船面之帆纜桅杆船身之粉油髹漆自下水後
陸續估辦三萬工有奇一律製配齊全閩口分
流支港現已開行遂於六月初四日臣親督各
員紳八點鐘升火十點鐘展輪由馬江出芭蕉
山放洋至白犬洋行駛數周申刻回至媽祖澳
洋面寄棹臣復乘舢舨上岸由北風澳翻山至
南風澳周覽形勢訪查去冬今春法船寄泊蹤
跡儻有鐵艦三艘上中等快兵輪十號統以
學識兼備知兵大員當可扼江浙臺廈之隘爲
閩江五虎口外添一重保障也次日風色尤順

復令滿張桅帆由媽祖澳復駛出白犬洋數轉
午後乘潮入芭蕉山口緩緩而行申刻抵工計
自芭蕉以內兩山栢向左右迴抱層層收束轉
轉灣環闊處至二百餘丈狹處不及百丈上年
儻以福勝建勝等巨礮之船泊駐於金長各處
與礮臺相爲輔助其餘各兵船每船添購連珠
礮數架孤拔雖凶豈能深入重地倣倖嘗試哉
則相與太息追悔於九船調泊馬江一隅之非
計及知連珠礮之猛而惜費不購之誤也計橫
海在洋升大火用水缸汽力四倍半天氣一分

鐘輪轉百週每閱時可行七十四里順風順潮
加滿帆纜每閱時可行八十里升常火用水缸
汽力二倍半天氣一分鐘輪轉七十二週每閱
時可行六十里船身前遭法船連珠礮打穿百
餘彈經飭匠重新修換現在驗其船機轉運靈
捷船身亦極堅固五月二十日據泰來洋商福
克電稱張佩綸訂購英國埃姆斯得郎六寸口
徑後膛新式水師鋼礮六尊荷乞開恩五管連
珠礮四尊已由香港起運後又據稱舢舨觸礁
另須換船起運俟礮位運到鑲配工程完竣再

行繪圖貼說咨送總理衙門及戶兵工各部存
案據提調道員轉據工程處員紳具稟前來

復查伏波輪船雖已修竣前經臣加委督帶候

補游擊陳友定准督辦臺灣防務福建巡撫臣

劉銘傳咨調東渡赴臺差遣橫海係三等快船

北洋咨請調用臣以閩省兵輪止有此號應留

防閩口該船薪糧請照章由閩善後局支應所

有橫海兵輪出洋緣由理合會同督辦軍務大

學士二等恪靖侯臣左宗棠福州將軍臣穆圖

善閩浙總督臣楊昌濬革職暫緩交卸福建巡

撫^臣張兆棟恭摺由輪船遞滬交上海縣發驛
四百里馳陳伏乞

皇太后

皇上聖鑒訓示謹

奏

光緒十一年六月初八日拜發奉

旨該衙門知道欽此

製船養船經費請飭地方官寬籌濟應片

再閩廠初造成萬年清湄雲兩船薪糧及各項費用無出同治八年五月福建巡撫臣卞寶第奏請以福厦兩口洋藥票稅作為養船經費嗣成船愈多費用愈廣原任督辦臺灣海防船政大臣沈葆楨同治十三年十二月奏請養船經費撥入臺防項下輪船薪糧歸併報銷奉

旨該衙門知道欽此光緒元年十二月原任船政大臣丁日昌奏明養船經費不敷各輪船薪糧以外如建威練船薪費鎮海水師營薪費出洋肄

業學生游歷學生繪圖學生各項贍養洋教習
薪水洋匠辛工各輪船修費煤價各款統歸地
方官設籌支應光緒二年正月十一日欽奉

寄諭如何籌畫欸項寬爲應付著文煜沈葆楨李鶴
年丁日昌斟酌情形妥議章程奏明辦理等因欽
此船政以地方官遵

旨籌措支應不便稍分畛域歷年將製船經費挪移
墊給往往無欸購料船政造船少成船遲估船
貴練船廢悉由養船各欸應付不前所至也去
冬馬江事後張佩綸請將被燬九船薪糧飭局

照解併作造船經費蓋以造船原欸代司局墊
應養船等欸自同治八年八月起截至光緒八
年十二月止共墊支九十八萬八千餘兩銷案
具在可復核也而九十兩年尙未併計在內乃
省城善後局誤以養船經費祇支應被燬九船
薪糧其餘練船水師營薪費各項概無著落臣
以一切經費由船政籌由省局籌同爲

國帑本可從容商榷斷不敢稍爲爭執卽如何如
璋任內訂購藥彈價銀一萬四千六百餘兩應
歸海防案內支銷現欲船政籌應船政挪無可

挪墊無可墊此臣萬不得已仍請省局籌解者
也查船政祇有養船製船兩款養船經費本無
定數已挪墊一百餘萬兩製船經費海關六成
項下月撥三萬兩截至本年六月止積欠二百
四十餘萬兩四成項下月撥二萬兩上年亦欠
解十四萬兩本年時閱六箇月甫解四萬兩幸
而不至工匠譁散者南洋二三號快船經費全
數解存暗中挹注耳臣仰蒙

天恩派署船政已閱半年不得不將實在情形上達
君父之前伏懇

聖慈垂念海軍以船政爲根本船政隨經費爲轉移
預先儲材則工程倍出臨時購料則糜耗無形
臣惟有督率員紳力求樽節應請

旨飭下閩海關將軍閩浙總督福建巡撫諸臣遵照
歷奉

諭旨籌畫欸項於張佩綸所奏九船薪糧年解銀十
四萬兩之外仍寬爲籌備隨時接濟俾養船製
船經費兩無所虧現在法議雖成而防務不容
稍緩似宜及此海道疏通之時趕將外洋鋼鐵
檣木各料荷士基糯等飛四管五管連珠礮位

九正言官集卷之二
及輪船應用之電燈水雷應用之電纜各件設
法購置庶幾綢繆未雨預備不虞合並附片陳
明伏乞

聖鑒謹

奏

同日拜發奉

旨著卽知照該將軍督撫於九船薪糧外仍寬爲籌
備隨時接濟該衙門知道欽此

洋教習到工添蓋學堂洋房片

再船政前學堂專習製造兵船輪機等學法員
教之後學堂專習駕駛天算等學英員教之各
取其長互相爲用也海防事起除英士鄧羅不
受英海部外部節制外其法教習邁達早已辭
退上年十一月間張佩綸電致出使英法大臣
曾紀澤由英國格尼址書院山長栢爾訥薦舉
英員賴格羅李家孜來華訂立合同於中曆三
月十七日卽西曆五月初一日到館賴格羅派
爲駕駛學堂管輪教習李家孜派爲製造學堂

格致算學教習製造學生先習法文已三四年

若令改習英文前功盡廢而駕駛學生亦不敷
用因另招幼童百餘名入堂先教以語言文字
俟半年後再行甄別去留賴格羅李家孜到館
已將三月和平勤慎尙屬相安曾紀澤堃給船
價俸薪銀兩均已匯還並委紳士於學堂隙地
添蓋學舍洋式樓房各四十間樓上樓下隔作
八十間並將馬限山頂舊日洋房二十四間重
新修整爲賴格羅李家孜寓處俟工程事竣查
照向章彙案核銷再船政上距省城四十里下

距長門八十餘里辦理海防時虞隔闕張佩綸
任內購買電機全副於船政公署內另蓋洋式
樓房一座作爲電報房派學生數人專遞緊要
之事以與將軍行營督撫省署互通消息所有
購買機器添造屋宇等經費應彙歸船署報銷
理合附片陳明伏乞

聖鑒謹

奏

同日拜發奉

旨知道了欽此

大正三十四年

九二二一ノ

ナ

臺防需船派伏波東渡以供差遣摺

奏爲臺防需船謹派伏波東渡以供差遣恭摺復

陳仰祈

聖鑒事竊臣承准軍機大臣字寄光緒十一年五月

二十六日奉

上諭楊岳斌等奏籌辦臺灣防務澎湖基隆滬尾三
海口均須長泊快兵船一隻修造礮臺運辦各料
須裝貨船二隻請飭南北洋分撥快船三隻福建
船政速撥貨船二隻到臺備用等語臺灣所需各
船能否照數撥往著李鴻章曾國荃裴蔭森奏明

辦理至各船到臺之後餉項如何發給並著妥議具奏將此由四百里諭知李鴻章曾國荃並傳諭裴蔭森知之欽此仰見

宸慮周詳關顧海防之至意臣查船政所造輪船其

可裝貨者曰海鏡曰康濟曰永保曰琛航曰萬

年清凡五號海鏡康濟早經先後派駐北洋其

永保琛航兩船去秋駐泊馬江均爲法礮擊燬

永保破碎沉沙無從撈獲琛航現雖撈起尙須

大加修理方能適用萬年清一船已於七年九

月派供臺灣差遣上年因法人肆擾該船藏在

滬尾內港稍加整頓可應轉輸辰下臺灣修造
礮臺需船運料亟應續撥一船以免工程遲滯
計惟有熟悉臺灣港汊之伏波船曾於八年四
月間派駐臺灣所有薪糧向歸臺防給發之年
六月調回馬江沈攔林浦現在修理完整自應
仍派東渡以收駕輕就熟之效其餉項亦仍彙
歸臺防開報以符舊制是否有當伏候

聖裁所有續派伏波船東渡以備臺防差遣緣由恭
摺由驛四百里具

奏伏乞

皇太后

皇上聖鑒訓示謹

奏

光緒十一年七月十二日拜發奉

旨該衙門知道欽此

橫海兵船公費遵照新章分別核給片

再七月初九日准閩浙督臣咨開五月初九日准兵部咨車駕司案呈上年閏五月初一日本部會議前船政大臣何如璋奏酌核輪船薪費名額練船各事宜一摺當以行船按時支給公費應令將各船行駛處所及進出口時刻提驗日記簿每於月杪備列細冊查核至閩廠外調各船應否一律照辦請

旨飭下各該大臣及有輪船省分督撫詳細籌酌奏明辦理等因奉

旨依議欽此欽遵在案現僅據南北洋大臣廣東督撫先後奏咨報部其餘浙江湖北安徽山東奉天直隸淮軍福建江蘇等處均未奏明報部應行催各該將軍大臣督撫遵照本部前奏趕緊詳細籌酌奏明辦理毋得遲延可也等因咨催前來臣查接管案內去年閏五月二十四日何如璋任內已准兵部咨同前因當緣防務喫緊未經定辦奏咨迨七月法人肆擾馬江九輪被燬閩口別無輪船惟伏波一號沈攔林浦冬間始經修理完整時值海道梗阻不能巡防各口

其公費一項總無逾原包之數今年四五月間橫海輪船甫經試洋所有公費祇飭其實報實銷亦總不得過原包之數今據部臣咨催自應遵照核准新章辦理惟福州馬江祇此伏波橫海兩船辰下伏波已飭渡臺以備差遣其薪費係歸海防開報一切章程應歸福建督撫臣籌酌奏咨橫海兵船係七百五十四匹馬力按照舊章月應包給公費三百兩現臣遵照部議核准新章自本年八月起按月常給公費八十兩如遇行船每點鐘加給輪機艙應用各費銀五錢

計點核給當不至逾原包之數每月杪提驗日記簿嚴加稽察以杜牽混自應造具細冊送部查核爲將來報銷根據惟該船月杪呈驗日記簿後其行駛處所及進出口時刻詳查細核宜計三箇月彙爲一次合無仰懇

天恩飭部准

臣

按季咨送到部庶便詳覈而省繁瑣

所有

微臣

遵照核准新章辦理緣由除咨明兵

部外理合附片具陳伏乞

聖鑒謹

奏

同日拜發奉

旨兵部知道欽此

九十兩年分歲入歲出冊籍請展限片

再臣

於六月十三日准閩浙督臣咨送到部頒

出入款項章程一卷內載戶部奏定各省督撫

各將通省各項出入按新頒冊式填造光緒八

九兩年收支款數均於光緒十一年八月間造

送到部其光緒十年一年收支款數仍均令於

光緒十一年十二月間封印以前造冊送部限

定於封印日到部嗣後按年即將其前一年收

支各款均於次年十二月封印以前造冊加結

報部不許宕延等因

臣

查船政光緒八年分歲

入歲出業經造齊應卽援照前咨六七兩年分歲入歲出之案開具清單咨報其光緒九十兩年分亦應遵照限期造冊達部以重考成惟是船政用款以製造爲大宗若非縷晰條分不能各歸各款卽不能彙造冊籍閩省自九年間起辦海防以迄辰下一切修建礮臺修製礮械以及禦敵各器械均由船政代籌工料悉力兼營其款自應歸省局彙銷其冊籍均由廠員彙造目下海防製器款項尙屬軫軫不清製船用款萬難分晰去年八月間因光緒九年分奏銷屆

限經何如璋奏明防務喫緊請將光緒九年分銷案及一切奏咨各件暫展限期奉

旨允准欽遵在案此屆亦因海防欸目糾纏不能彙造冊籍事同一律且船政入欸係由閩海關及南洋協撥非實入之欸出欸總不越閩海關及南洋撥欸之中不致因船政冊籍未齊有礙部中會計合無仰懇

天恩俯准將船政應造光緒九十兩年分歲入歲出冊籍展限一年一俟省局海防欸目稍能清理即飭廠員趕造不敢再事稽遲除咨部查照外

所有收支款數冊籍不能依限各緣由理合附
片陳明伏乞

聖鑒謹

奏

同日拜發奉

旨著照所請戶部知道欽此

船政奏議彙編卷二十八終

船政奏議彙編卷二十九目錄

裴蔭森三

釐定員紳書役薪工並一切雜費據實覆陳摺
製造各種水雷並廠署被風損傷估修片
駕駛洋教習鄧羅援案請獎片

船政奏議彙編卷二十九

裴蔭森三

釐定員紳書役薪工並一切雜費據實覆陳摺
奏爲遵

旨釐定員紳書役薪工並一切雜費據實覆陳恭摺
仰祈

聖鑒事竊臣於接管卷內查有戶部咨文內稱議復
前兩江總督左宗棠等奏船政員紳書役薪工
請准實支實銷一摺光緒十年五月二十五日
具奏本日奉

旨依議欽此欽遵鈔錄原奏恭錄

諭旨飛咨前來臣查閱原奏緣前船政大臣張夢元奏請將製船經費貼水銀兩提作外銷津貼員紳等欸經左宗棠等議奏以船政係創開之局差事既異尋常員紳薪水書役辛伙例外從優亦非過濫此外尙有公幹員紳盤費大小差船工食以及醫藥犒賞油蠟紙張一切雜費按之例章雖難造報而揆之事理實應開銷請

旨飭由船政衙門逐一釐定奏明准予實支實銷分晰造冊報部毋庸另提貼水作爲外銷津貼復經部臣議奏以左宗棠等所奏情節尙屬實事

求是請

旨飭令該大臣遵照該督等原奏請上自總理提調
下至員紳書役人等月支薪工並一切雜費逐
一釐定奏明立案以憑核辦各等因前船政大
臣何如璋張佩綸均以防務喫緊未及籌議臣
莅任之始將各項支欸逐一查核亟思釐定章
程奏請立案著爲令典俾部中易於勾稽督辦
者亦不得以愛憎爲厚薄庶幾良法美意可以
垂示將來迨考察數月始知薪工數目參差之
故爲歷任諸大臣之苦心有不如此不能集事

者敬爲我

皇太后

皇上陳之船政用人之難張夢元等先後陳奏已屢及之然其中尙有未盡者員紳當札委之始薪水視其官階津貼則視責任之重輕廠務之繁簡以爲區別支欸旣極參差任事以後或由簡調繁或由繁調簡支欸又從而增減且廠員中有能留心西法通曉工程者復加增津貼以優異之卽隨同員紳辦事書役按月支欸亦以此法行之於量能授食之中寓獎勵人才之道皆

歷任諸大臣所行之而有效者故均此一廠而各員支欸不同均此一人而前後支欸不同張夢元於督辦時目擊情形不得已而有外銷之請迺蒙

天恩優渥准予逐一釐定實支實銷誠以船政爲創開之局關涉洋務本爲成例所無但能欸不虛糜事收實效即可著爲定章臣敢不仰體

聖慈參酌盡善第以歷任諸大臣聰明才力皆遠過於臣所定成法行之二十年而有效者臣何敢率議紛更致滋流弊惟有將員紳書役原支薪

工津貼改爲實支薪工及一切雜費數目據實
開具清單恭呈

御覽懇

恩飭下部

臣

立案嗣後如有添裁員弁增減薪費按

年報部以憑核銷

臣

不敢稍存畏難之見祇以

事關大局與其勉強以就範圍何如規隨以承

矩矱伏查提調道員月支薪水津貼係左宗棠

前在閩浙總督任內核定照閩省現任道員津

貼銀數支給無論在工久暫不復增減其餘稽

查學堂管理學堂文案支應以及各廠員紳當

差勤慎者擬請自本年起月支薪水總不得過
五十兩以示限制至部查貼水銀數張夢元原
奏業已陳明除將張夢元原奏鈔錄送部查核
外所有員紳書役不支津貼改爲實支薪工及
一切雜費據實開報並酌量釐定各緣由謹會
同福州將軍臣穆圖善閩浙總督臣楊昌濬革
職暫緩交卸福建巡撫臣張兆棟恭摺由驛四
百里具陳伏乞

皇太后

皇上聖鑒訓示謹

奏

光緒十一年七月二十六日拜發奉

旨戶部知道單併發欽此

謹將船政員弁書役按月原支薪工津貼改爲
薪工名目並一切雜費自光緒九年正月起實
支銀數開具清單恭呈

御覽

謹開

員弁薪水項下

督辦船政大臣薪水六百兩

提調道員前翰林院編修呂耀斗原支薪水四
十兩津貼二百六十兩今改爲薪水三百兩

謹查船政提調開局之初奏派曾任實缺司

道周開錫吳大廷夏獻綸三員充當嗣後裁
併一員辦理責任愈重用度愈煩且無養廉
可支其原支津貼左宗棠任內係做照閩省
實缺道員津貼之案支給今經釐定統行改
爲薪水不列津貼名目理合聲明

稽查學堂郎中嚴良勳原支薪水三十兩津貼
二十兩今改爲薪水五十兩

稽查學堂員外郎林洄淑原支薪水三十兩津
貼二十兩今改爲薪水五十兩

管理文案知縣施魯濱原支薪水一十六兩津

貼二十四兩今改爲薪水四十兩

管理文案應襲一等輕車都尉生員沈翊清原
支薪水一十八兩津貼一十二兩今改爲薪水
三十兩

管理文案舉人陳與同原支薪水八兩津貼一
十八兩今改爲薪水二十六兩

管理支應知縣李聖培原支薪水一十六兩津
貼二十四兩今改爲薪水四十兩

管理支應生員陳允豫原支薪水六兩津貼一
十四兩今改爲薪水二十兩

管理前學堂兼繪事院縣丞夏允晃原支薪水
一十二兩津貼一十四兩今改爲薪水二十六
兩

管理前學堂兼繪事院府經歷朱慶生原支薪
水一十二兩津貼一十二兩今改爲薪水二十
四兩

管理前學堂兼繪事院舉人范繼馨原支薪水
八兩津貼一十六兩今改爲薪水二十四兩
管理後學堂兼管輪學堂主事黃軒齡原支薪
水二十兩津貼二十兩今改爲薪水四十兩

管理後學堂兼管輪學堂縣丞林憲曾原支薪水一十二兩津貼一十二兩今改爲薪水二十四兩

管理後學堂兼管輪學堂訓導梁鳳翔原支薪水一十兩津貼一十四兩今改爲薪水二十四兩

管理船廠縣丞鄭鏞原支薪水一十二兩津貼一十二兩今改爲薪水二十四兩

管理船廠教諭林世仁原支薪水一十二兩津貼一十二兩今改爲薪水二十四兩

管理鐵脅廠從九品程華湘原支薪水八兩津貼一十四兩今改爲薪水二十二兩

管理輪機廠知縣王樹翰原支薪水一十六兩津貼一十四兩今改爲薪水三十兩

管理輪機廠知縣張家瀆原支薪水一十六兩津貼八兩今改爲薪水二十四兩

管理輪機廠縣丞林豐鑫原支薪水一十二兩津貼一十二兩今改爲薪水二十四兩

管理鑄鐵廠知縣陳慶辰原支薪水一十六兩津貼四兩今改爲薪水二十兩

管理水缸廠知縣鄭逢時原支薪水一十六兩
津貼八兩今改爲薪水二十四兩

管理水缸廠鹽大使鄭孝穎原支薪水一十二
兩津貼八兩今改爲薪水二十兩

管理水缸廠縣丞孟宗洛原支薪水一十二兩
津貼一十八兩今改爲薪水三十兩

管理小輪機廠貢生何炳如原支薪水六兩津
貼一十四兩今改爲薪水二十兩

管理拉鐵廠府經歷林希曾原支薪水一十二
兩津貼一十兩今改爲薪水二十二兩

管理帆纜廠兼礮廠知縣鄭瓊書原支薪水一

十六兩津貼一十四兩今改爲薪水三十兩

管理帆纜廠兼礮廠監生孟宗韓原支薪水六

兩津貼九兩今改爲薪水一十五兩

管理甄灰廠從九品楊嵩年原支薪水八兩津

貼八兩今改爲薪水一十六兩

管理船槽縣丞孟宗伊原支薪水一十二兩津

貼一十八兩今改爲薪水三十兩

管理廣儲所通判馮敏功原支薪水二十兩無

津貼

管理廣儲所縣丞陳耕原支薪水一十二兩津貼一十兩今改爲薪水二十二兩

管理儲材所縣丞許桐原支薪水一十二兩津貼八兩今改爲薪水二十兩

管理東放工所生員謝纘原支薪水六兩津貼一十四兩今改爲薪水二十兩

管理西放工所通判張慶鈞原支薪水二十兩津貼四兩今改爲薪水二十四兩

發審委員通判呂葆孫原支薪水二十兩津貼一十兩今改爲薪水三十兩

銀庫差弁千總李得標原支薪水一十兩無津

貼

銀庫差弁千總李得升原支薪水一十兩無津

貼

船廠差弁外委阮友性原支薪水六兩無津貼

船廠差弁外委李得泰原支薪水六兩無津貼

船廠差弁軍功阮友華原支薪水五兩津貼一

兩今改爲薪水六兩

鐵脅廠差弁千總葉景祺原支薪水一十兩津

貼二兩今改爲薪水一十二兩

鐵脅廠差弁軍功傅金榜原支薪水五兩津貼

一兩今改爲薪水六兩

輪機廠差弁外委梁渭熊原支薪水六兩無津

貼

輪機廠差弁軍功吳一升原支薪水五兩津貼

一兩今改爲薪水六兩

鑄鐵廠差弁軍功鄭元標原支薪水五兩津貼

一兩今改爲薪水六兩

鑄鐵廠差弁軍功朱木松原支薪水五兩津貼

一兩今改爲薪水六兩

水缸廠差弁外委李玉雲原支薪水六兩津貼
一兩今改爲薪水七兩

水缸廠差弁外委張金福原支薪水六兩無津
貼

水缸廠差弁軍功陳標原支薪水五兩津貼一
兩今改爲薪水六兩

小輪機廠差弁千總鄭福泉原支薪水一十兩
無津貼

小輪機廠差弁軍功鄭東桂原支薪水五兩津
貼一兩今改爲薪水六兩

拉鐵廠差弁千總王本成原支薪水一十兩津貼二兩今改爲薪水一十二兩

拉鐵廠差弁把總鄭康泰原支薪水八兩無津貼

帆纜廠兼礮廠差弁軍功吳道濟原支薪水五兩津貼二兩今改爲薪水七兩

船槽兼挖土船差弁千總何佩琳原支薪水一十兩津貼二兩今改爲薪水一十二兩

船槽兼挖土船差弁軍功林勝超原支薪水五兩津貼二兩今改爲薪水七兩

版築所差弁把總侯定邦原支薪水八兩無津貼

皮廠差弁把總洗懿林原支薪水八兩津貼四兩今改爲薪水一十二兩

廣儲所差弁千總王明貴原支薪水一十兩無津貼

查驗隴口差弁千總梁湘原支薪水一十兩無津貼

查驗隴口差弁外委鄧復升原支薪水六兩津貼四兩今改爲薪水一十兩

查驗水坪差弁外委葉長發原支薪水六兩津貼一兩今改爲薪水七兩

武巡捕千總林高陞原支薪水一十兩津貼六兩今改爲薪水一十六兩

外科醫士林世蔭原支薪水六兩津貼一十四兩今改爲薪水二十一兩

書役工伙項下

經書九名各原支工伙四兩津貼二兩今改爲各工伙六兩

繕書二十一名各原支工伙三兩津貼一兩今

改爲各工伙四兩

幫書一十四名各原支工伙四兩向歸津貼今

各改爲繕書工伙照支

聽差六名各原支工伙二兩四錢無津貼

添僱聽差六名各原支工伙二兩四錢向歸津

貼今各改爲聽差工伙照支

號書一名驛書一名共二名各原支工伙三兩

無津貼

遞夫二名各原支工伙二兩四錢無津貼

心紅紙張油蠟項下

公署心紅紙張原支四兩津貼八兩今改爲一十二兩

公署油蠟原支二兩津貼四兩今改爲六兩
公幹委員盤費項下

由福州赴天津每人每次支輪船儀番三十元
由福州赴上海每人每次支輪船儀番一十五元

由福州赴香港每人每次支輪船儀番一十四元

由福州赴廈門每人每次支輪船儀番七元

由福州赴臺灣由官輪附搭每人每次支輪船
飯食番三元

大小差船工食項下

大差船一號月支工食一十六兩

小差船一號月支工食八兩

犒賞藥費項下

新船下水各廠匠首每名犒賞一兩六錢散匠
每名犒賞八錢

工匠因工作受傷每日給藥費二錢傷愈停給
如歷久未愈亦惟給至三箇月以示限制

製造各種水雷並廠署被風損傷估修片

再海防利器攻剿莫捷於魚雷守口莫猛於水雷此外洋各國之通義也上年七月以後法船聚泊媽祖澳洋馬江師船悉沈南北岸礮臺亦燬急謀堵口祇存有何如璋任內電請前出使德國臣李鳳苞購到水雷一百具尙存五十具張佩綸由南洋借到水雷二十具派學生林慶平帶赴長門一帶聽候臣穆圖善指示布置惟水深潮急港道寬長不敷安插而戰局旣成縱使加價十倍各國同守局外之例不能再購查

有丁憂廣東學生陸汝成上年冬月自粵回閩該生向從英人哈倫授學有年通曉化學能自造各種油藥白藥及水雷火箭諸法尤能自造電引極爲靈捷因飭繪算圖式發廠製成子母新式水雷二十具每子雷一具應鍊熟鐵三百數十觔每母雷一具應鑄生鐵一千五百數十觔統核各廠工料比較德國購到水雷原價有減無增臣嘗會同恪靖營營務處前浙江提督黃少春於烏龍江口驗放以巨木紮成九層方陣貫以數百鐵條厚及八尺該水雷礮力能擊

起木簾離水十數丈裂爲五斷較德雷力尤猛

烈

臣

穆圖善亦派林慶平

臣

楊昌濬亦訪有建

甯學增生楊仰曾飭到船廠各杼所見各用所
學分製各種鼉壳沈雷現擬仍飭各製二三十
具留備攻守所有製雷經費由製船項下先行
挪墊將來專案歸入海防案內報銷再船署各
廠屋被法人用連珠礮彈擊破多處去冬今春
經張佩綸及臣先後派匠修理復舊七月十五
六七等日秋颶大作風力奇猛查與光緒七年
情形尤甚在船槽修理之舢舨在船臺續造之

快船岌岌可危經臣督同在事文武員紳弁丁設法支撐多方保護仰賴

聖慈福庇一律平順在江停泊各兵輪並無攔損惟船政公署廳堂及各廠新修各屋宇土木尙未黏結牢固狂雨連宵屋飛椽折牆壁亦間有倒塌現在派員核估工料查照光緒七年成案辦理所有修費歸入本年分彙案核銷理合會同

附片

奏明伏乞

聖鑒訓示謹

奏

同日拜發奉

旨戶部知道欽此

駕駛洋教習鄧羅援案請獎片

再查洋員在工供差著有勞績者限滿之日例
應奏請

賞給頂戴寶星以示獎勵歷辦在案現在駕駛學堂
洋教習鄧羅由英國應募來閩於光緒六年八
月二十七日抵工按照外國月日約定三年爲
限扣至九年八月三十日期滿嗣因該教習到
工以來教導尙屬認真學生著有功效張夢元
任內再留一年俾期得力自九年九月初一日
起換立合約扣至十年八月十二日止張佩綸

任內復因教導精勤再留一年自十年八月十三日起扣至十一年八月二十三日止現屆該教習期滿所授第一班學生堂課已畢現候出洋肄業臣現復議留三年加訂合同接授第二班學生按照年月排定功課庶期駕駛人才陸續成就以備任使惟該教習在工已歷五年盡心教導合無籲懇

天恩准照歷屆洋員限滿請獎成案

賞給五品頂戴並二等寶星以示鼓勵之處伏乞

訓示遵行理合附片具陳伏乞

聖鑒謹

奏

同日拜發奉

旨著照所請該衙門知道欽此

船政奏議彙編卷二十九終

船政奏議彙編卷三十目錄

裴蔭森四

光緒九十兩年分歲入歲出款目懇准畧展限期摺

第六號鐵脅輪船安上龍骨並陳廠務情形摺
委弁千總邱水生請卹片

謹陳船政形勢及應行次第舉辦事宜摺
廠造第二號快船工竣下水摺

添蓋廠屋修船添機照章聲明片

船政奏議彙編卷三十

裴蔭森四

光緒九十兩年分歲入歲出欸目懇准略展限期摺

奏爲光緒九十兩年分船政歲入歲出欸目實與閩省海防軫轍不清懇

恩仍准略展報部限期恭摺仰祈

聖鑒事竊臣前因船政製造欸項與福建省局海防

製器一時不能分晰附片請將光緒九十兩年分歲入歲出冊籍按照部限暫展一年八月初四日奉

旨著照所請戶部知道欽此欽遵在案嗣部臣以船政造報一經准緩恐各省聞風相效託詞延宕致部中通籌出入之要政化爲空談專摺請

旨更正仍請

飭令迅將光緒九十兩年分歲入歲出欸數按照部頒冊式原限原章一併於本年封印前造報到部勿得延緩等因八月二十六日奉

旨依議欽此欽遵抄錄原奏恭錄

諭旨飛咨飭令遵照辦理前來臣捧誦之下無任悚

惶自應督飭廠員依期繕辦何敢再瀆干冒

宸嚴惟是所以不能依限造送情形有部中未能深
悉者敬再爲我

皇太后

皇上陳之船政用款以工料爲大宗尋常無事之日
所用工料一曰製船一曰修船一曰建蓋一曰
製器一曰修廠一曰修機製船修船之中又別
爲某號之船建蓋修廠之中又別爲某所之廠
製器修機之中又別爲何廠何項之器何廠何
項之機雖款目紛繁各有冊籍登記誠如部
摺內所稱細目宏綱有條不紊者以此照格填

寫固可計日而成迨閩省籌辦海防凡禦敵所
資者若礮臺若礮具若水雷若桿雷若地雷若
木簾若鐵鏈以及零星修製皆船政爲之兼營
工料則由製船墊給欸目則應省局造銷其初
皆由省局備文請製飭廠興工另册登記眉目
未始不清及敵船進港戎機瞬息製庀軍需以
速爲要自不敢泥守向章文領未及具也卽營
弁以片紙列單均行照付新製不及待也或廠
儲之製船成件立飭改鑲祇期器備之無缺數
目之糾纏初不暇計也如果事平之後所有海

防撥用工料省局一一承認何難照冊剔除則製船欸項立時即可清出無如列單移局清算省局以各項工料未經具文請領現值部章嚴密必須指明請製者何人承領者何人確鑿有據方能歸欸造銷臣亦恐廠員倉卒之中登記舛錯飭其歷檢單據省憶請製承領之人列單行令營員及管帶礮臺員弁逐一核對據實聲覆務期各歸各欸無稍混淆歷時既久各營員弁更代已歷數員新任者諉諸不知舊任者或另差或回籍輾轉行查動稽時日總之海防工

料一日未清卽製船工料一日未清歲入歲出
冊籍實難依限造送臣係十年十二月二十四
日到工此項工料皆動支於臣未蒞任之前原
無所用其迴護祇以支銷

國帑必求核實斷不敢苟且遷就強應限期合無
仰懇

天恩逾格俯准將船政光緒九年分歲入歲出欸數
展至明年三月送部十年分歲入歲出欸數展
至明年六月送部至部臣慮各省相效宕延船
政無實入之欸非他省有實入之欸者所得援

以爲例去歲馬江之戰卽在船政廠隴之前尤
非他省無被兵海防者所得藉口除咨部查照
外所有請展歲入歲出欸目報部限期各緣由
理合會同署理福州將軍臣古尼音布閩浙總
督兼署福建巡撫臣楊昌濬合詞恭摺由驛四
百里馳陳伏乞

皇太后

皇上聖鑒訓示謹

奏

光緒十一年十月初六日拜發奉

旨著照所請戸部知道欽此

第六號鐵脅輪船安上龍骨並陳廠務情形摺
奏爲第六號鐵脅輪船安上龍骨並陳廠務情形
恭摺仰祈

聖鑒事竊船政所造第五號鐵脅輪船曰橫海已於
六月初四日告成試洋經臣具摺

奏明在案其第六號鐵脅輪船自應接續照製以
備海防要需惟查廠中歷來製成之兵船如一
百五十匹七百五十匹等號意在有事利於攻
戰無事便於轉輸其制係參兵船商船之度轉
致行程不速去歲馬江之戰兵商兩紕張佩綸

任內知有此病飭令嗣後所造七百五十匹鐵
脅船式稍爲變通務期合兵船體制臣莅工後
堅與員紳約專造兵輪永不准再造商船經工
程處委紳魏瀚等議將船身加闊一尺三寸馬
力加增至一千六百匹加闊則船穩增馬力則
行速以法推算可每時行九十五里較之往常
鐵脅船每時僅行八十里者有別費省工簡行
速機靈亦爲海上攻戰利器可輔快船鐵甲船
之用臣核所議自是精益求精密益求密之事
飭照所議辦理所有應用櫓木各料去年十二

月已飭暹羅洋商購辦現已陸續運到其鐵料
機件因廠中起趨二三號快船工程礙難兼營
分力因照前此萬年清揚武及八十四等船成
案寄由英國採購康邦新式機件全副運回工
次鑲配合攏以期速成詎於十月十八日臣親
率在事員紳匠徒將全鐵龍骨安上船臺一俟
鐵木料件到齊便可興工分製至南洋兩號快
船自去年海防喫緊以後各廠工匠均著力於
辦防趕製水雷礮彈礮架等事工程不無停緩
現時和局已成礮具亦已完竣臣已催飭趕行

併力工作查二號快船本年十一月間可下水
明年夏間可試洋三號快船明年夏間可下水
明年冬間可試洋合併聲明所有第六號鐵殼
輪船安上龍骨並廠務情形理合會同署理福
州將軍臣古尼音布聞浙總督兼管福建巡撫
臣楊昌濬恭摺由驛四百里具

奏伏乞

皇太后

皇上聖鑒訓示謹

奏

光緒十一年十月二十五日拜發奉
旨該衙門知道欽此

委弁千總邱水生請卹片

再監工委弁五品軍功留閩儘先補用千總邱水生督帶匠丁在撈起之琛航船上折卸銅鐵各件以備修理詎意九月十二日午後風暴驟作江濤洶起船爲之簸該弁正在船旁透板上指揮匠作被翻入水身故查該弁在工供差幾二十年勤奮出力此次在船率作因公淹斃實堪憫惻合無仰懇

天恩飭部照軍營陣亡例從優議卹以慰幽魂出自
鴻慈謹會同署理福州將軍臣古尼音布閩浙總督

兼管福建巡撫 臣 楊昌濬附片陳明伏乞

聖鑒謹

奏

同日拜發奉

旨邱水生著照軍營陣亡例從優議卹該部知道欽
此

謹陳船政形勢及應行次第舉辦事宜摺

奏為

微臣

莅工視事已滿一年謹將船政形勢及應行次第舉辦事宜恭摺瀝陳仰祈

聖鑒事竊

臣

自去歲十二月莅工經將察看福州海口情形及復設練船試造銅甲並請

飭催積欠關款各緣由先後奏明在案數月以來

臣

復細加考察催趨工程時與在事員紳及監造工程學生往復講求每至夜分必盡得其蘊而後已稍閒則獨乘小舟隨潮上下詳看工次一帶地勢港口竊維閩之設船政也原為天下海

防至計非一切機器局製造局可比造成兵輪
派駐各省而巡防皆賴學生藝成亦派赴各處
而洋務漸開二十年來實有成效形勢非不足
恃防守密則無虞工程非不日興經費足則皆
舉應將形勢及應辦事宜實在情形敬爲我

皇太后

皇上陳之船政廠地在馬尾山麓羣峯繞其背狀若
匡牀前瀨大江踞林浦下流羅星塔之上流前
閩浙督臣左宗棠議設船政疏稱羅星塔一帶
開槽濬渠水清土實爲粵浙江蘇所無前船政

大臣沈葆楨察看海口及船塢摺內亦指林浦
以下爲重重天險臣自臬司任內奉檄填港到
工後巡勘較詳閩江自芭蕉五虎入口以來兩
山環抱層折轉彎至馬尾八十里實爲自然天
險論者徒以去歲七月馬江之戰遂疑船廠之
露處爲孤危可慮不知去歲法船肆擾深入口
內已犯兵家之忌不過行險徼倖賺入長門地
方官以中外尙未失和不早封口誤墮其術使
能扼之於海門以外何至受其所欺譯法國官
報孤拔上書其海部具言閩廠之所以不能燬

者緣大兵船喫水過深祇能停泊羅星塔以外不能直逼船廠廠之左近有馬限山爲之屏蔽礮彈鉅者不能遠及廠屋其船小礮輕者又不足以燬之等語臣則以爲該敵曾冒險深入終不敢佔留一日以索償者實懼海口之險南北洋援軍之將合圍耳此閩廠地勢形勝最踞險要無容改設之明證也或謂吳楚適中之地如湖口地方可以建設船塢不知海潮有定江湖無定每當伏秋盛漲江水挾四川三峽而下必將漫過船塢至交冬後水落石出巨船又必不

能進槽此湖日長江一帶祇能造軍火機器局不能造鐵甲船隴固不待智者而知也船政舊用鐵螺絲船槽容重二千餘噸比年製成之開濟鏡清快船卽不能修津之大沽蘇之上海粵之黃埔雖皆有隴亦以港道稍淺不能收納此事實難再緩經前大臣黎兆棠何如璋奏明有案臣曾勘定船政左近紅山之麓可造船隴在羅星塔之下員山寨之上兩山中間生成小港實爲天然船隴距船政僅水程八里工匠往來取攜甚便亟宜砌石造就大隴以備勘修南洋

快船及臺灣所用快船卽北洋之鐵艦如定遠
鎮遠者亦可來閩修理此閩廠急宜增造船塢
之實在情形也現在出洋回華藝成之學生如
魏瀚鄭清濂陳兆翱吳德章李壽田楊廉臣等
於製造船身輪機工程測算工夫具有本領本
年所成之橫海鐵脊船並開濟鏡清兩快船實
已均臻美備南洋三號快船明秋亦可下水六
號鐵脊船亦已安上龍骨此次奉

准試造鋼甲一號只待省局經費解到便可購料開
工推該學生等造詣所到如果添機拓廠卽大

鐵艦之鐵甲及輪機大件亦可自製無庸購於外洋前督辦黎兆棠何如璋均經奏請以經費難籌而止臣擬擇其急者陸續添置庶經費可寬籌而工程亦能起色此閩廠亟宜添拓之實在情形也戰守之利器近今以水雷魚雷爲要去秋之戰人皆以前向德國採購魚雷水雷緩不濟急爲憾及何如璋所購伏雷百具到時福州封口方有藉手尙慮港道寬長不敷布置因商督臣楊昌濬招募廣東學生陸汝成建甯增生楊仰曾各抒所學分製各種沈雷二三十具

以供守口之助嗣購到德國魚雷十具在德習

製魚雷伏雷學生陳才鐳亦已藝成回華臣飭

逐件修配以便試演一面出圖仿造不使外人

傲我所無惟建造廠屋購置各雷機器所費又

已不貲至於開礦鑄礮以及製造各項火藥槍

彈船政皆有藝成回華之學生可以承辦廠屋

機器之費動輒鉅萬此皆海防必不可緩之事

卽船政所不容已之圖惟是經費難籌深爲焦

灼年來閩海關月僅解到四成項下二萬兩其

六成項下三萬截至今年六月止積欠二百四

十萬有奇經臣奏奉

旨飭速撥以濟急需迄今未承解應製船經費尙且不敷何況別項此又必須外省協濟之實在情形也現值

朝廷整練海軍所需船礮必多臣愚以爲應拓船政以爲表裏請

旨飭下閩海關四成六成項下按月解清所有遞年積欠速爲設法陸續籌補並請

飭下海疆各省督撫酌籌協款解濟所有事宜臣再隨時函商以期開拓工程不囿故步上副

國家為圖自強之至意本年歲底封印期內照例停工開正初旬臣當乘輪馳赴金陵與南洋大臣曾國荃面商一切所有船政形勢並應行舉辦事宜實在情形理合會同署理福州將軍臣古尼音布聞浙總督兼管福建巡撫臣楊昌濬恭摺由驛四百里具

奏伏乞

皇太后

皇上聖鑒訓示遵行謹

奏

光緒十一年十二月初二日拜發奉

旨留中欽此

中華書局

卷三十一

七

廠造第二號快船工竣下水摺

奏爲廠造第二號快船工竣下水恭摺具陳仰祈
聖鑒事竊船政前年創造快船第一號開濟撥駐南
洋後復經前南洋大臣左宗棠定造兩號當於
九年十二月間次第安上龍骨經前督辦船政
臣何如璋

奏明在案去春開工興作與第五號之鐵脅船兼
營並製三艘同工夏秋之間法人肆擾兼辦閩
口防守各船工程大爲所分臣蒞工後飭令併
力攢造五號鐵脅船曰橫海於今春歲事試洋

十月間第六號鐵脅船龍骨接續安上經臣先後兩次

奏明茲據工程處稟稱二號快船鐵脅已配舢板已封阻漏鐵堵已隔鐵樑鐵柱已豎艙灰穿孔塞罅瀝釘已妥船首之銅刀船尾之銅夾銅套船面之鐵戰杵船旁之鐵耳臺船中船後之礮位船上之鐵望臺鐵廚房船內之輪機艙水缸艙煤炭艙鐵練艙水手艙帆纜艙糧食艙淡水艙亦已一律竣工輪機水缸及冷水櫃抽水機大小銅鐵各件亦已在廠合攏就序現在船身

可以下水下水後即可鑲配齊至其餘火藥艙
彈子艙以至桅檣帆纜舵車向盤等件亦俟下
水方能照配臣飭各廠員紳等覆驗無異因命
之曰鏡清諏十一月十八日下水屆期風日清
和午潮如鏡臣躬率各員紳致祭各神抽撐拔
楔如法臺上之船便砮然循滑軌而下在事人
等及士民來觀者無不鼓掌權呼爲之快意查
該船長二十六丈有奇寬三丈六尺喫水深一
丈七尺高三丈四尺至船噸鐵計二千二百噸
每噸合中國一千六百八十觔儲煤之艙可積

三百五十噸配新式三汽鼓康邦省煤臥機一副計實在馬力二千四百匹圓式水缸八箇可出汽力六十八磅計每時可行水程百里一切制度與第一號開濟相等惟船底兩旁添製幫龍骨兩條日後船行愈穩而不簸更於望臺上添配雙燈電機一副以燭黑夜防雷艇之暗劫也船後改配十九生口徑大礮一尊以便阻擊敵船之尾追因配電燈故設小水缸以出汽力因配大礮故改尾枰艙以舒礮度原式本係三枝木桅今改木爲鋼摩特鋼片之製甚便可濟

木料之窮而且梳盤保護可置連珠之礮慮敵
船之近迫特於船之首向另設魚雷機二具以
資衝擊慮機艙之炎熱特於船之中艙另配引
風箱二具以大風力因設風箱而日後輪機馬
力可增至三千匹船行又當加速凡此皆原式
快船所無今皆燦然大備兵船之利用至此極
矣儻得十數艘輔以鐵艦魚雷艇訓練成軍庶
幾進戰退守兩有把握上可副

國家自強之至意外可杜異族要挾之詭謀臣自
去冬權篆蒞工以來無分鉅細親自講求始知

勦製快船工程繁難較於常式兵輪何止數倍
在工各執事頻年趨効晝夕兼營殫雨櫛風不
憚勞苦皆能各稱厥職而益求其精前製輪船
多係百五十四匹馬力今則由七百五十四推而
大至二千四百匹馬力前皆倚賴洋匠今則由
熟生巧出圖自造克盡快船之能事且屢請試
製鋼甲以展其長其實心可嘉其微勞足錄臣
查光緒十年前督辦臣何如璋任內請獎奉
旨嗣後如續有勞績再行奏請欽遵在案現在續製
一二號快船較之開濟更加完備各員紳等實屬

異常出力可否籲懇

天恩准俟該船試洋後容臣將在事文武員紳工匠

人等擇尤請獎以資鼓勵出自

逾格鴻慈合將鏡清快船工竣下水緣由謹會同南

洋大臣兩江總督臣曾國荃署福州將軍臣古

尼音布閩浙總督兼管福建巡撫臣楊昌濬恭

摺具陳伏乞

皇太后

皇上聖鑒訓示謹

奏

光緒十一年十二月初二日拜發奉

旨此項輪船著俟試洋後如果駕駛得力毫無流弊
再將出力人員擇尤請獎欽此

添蓋廠屋修船添機照章聲明片

再前奉戶部奏定外省報銷新章第十四條內載各省設立機器局並聞省船政局如有添購機器經費若干事前奏明咨部立案事後方准核銷等因茲據員紳稟稱閩廠去年因併造南洋兩號快船及鐵脊船廠地機器均有不敷鑄鐵廠起卸重件添製鐵柱大懸機一具計用工料銀五千三百餘兩輪機廠添製轉輪軸轂旋機一具計用工料銀四百餘兩合攏廠換鋪地枰計用工料銀八百餘兩水缸廠添製梁上起

重鐵車一具計用工料銀六百餘兩小輪機廠
狹隘有礙工作將原設行鋸機器移置模廠一
切拆鑲安配計用工料銀五百餘兩甄灰廠試
造洋火甄添蓋廠屋一所計用工料銀三百餘
兩水缸廠新造二百五十匹馬力水缸胚一副
原備換配揚武船所用去年海防喫緊未及拆
換該船旋即被敵沉失現將該水缸留備別用
計用工料銀八千五百餘兩船上電燈爲泰西
防敵要需因購電燈一具留備各快船配用計
用價值銀二千八百餘兩去秋三日之戰船槽

陡出江干受礮最烈修理機器屋宇等項計用工料銀五千四百餘兩隄前挖土機船被礮擊沉設法起撈修刮機器修補船底船艖及添配傢伙計用工料銀六千二百餘兩又修裝土船二號計用工料銀一千二百餘兩以上各欸應歸船政十年分銷案造報再查光緒九年分海鏡輪船經北洋大臣調往差遣大加修理以利遄行計用工料銀一萬六千九百餘兩琛航輪船拆修水缸等件計用工料銀一萬六千餘兩其餘揚武福星萬年清三船或小爲補葺或換

配物件計共用工料銀四千六百餘兩去秋伏

波輪船被創之後沉擱林浦龍骨及船身機件

均損傷須加大修當因本隲船槽被礙該船未

能上槽勘修賃用馬尾英商船隲租費並本廠

修理工料計用銀一萬六千五百餘兩以上各

款係由船政墊支歸省局彙銷等語呈請立案

前來經臣覆查無異除咨部查照並飭另行彙

案造銷外合將應行照章聲明各款緣由謹會

同南洋大臣兩江總督臣曾國荃署福州將軍

臣古尼音布閩浙總督兼管福建巡撫臣楊昌

濬附片具陳伏乞

聖鑒訓示謹

奏

同日拜發奉

旨戶部知道欽此

舟政奏議彙編卷三十終

船政奏議彙編卷三十一目錄

裴蔭森五

會同考核船政員紳分別應裁應留及應備咨

取各銜名摺

請留道員吳仲翔接辦船政提調片

添蓋學舍復設藝圃招考生徒片

船政奏議彙編卷三十一

裴蔭森五

會同考核船政員紳分別應裁應留及應備咨
取各銜名摺

奏爲遵

旨會同考覈謹將船政員紳分別應裁應留及應備
咨取各銜名開列清單恭摺覆陳仰祈

聖鑒事竊_臣等承准軍機大臣字寄光緒十一年十

月二十七日奉

上諭御史殷如璋奏福建船政局收用員紳過多需
款太鉅致造船經費不能統歸實用請飭詳加考

試認真核辦等語福建船政局近年瞻徇積習濫用委員支銷浮冒朝廷早有所聞當此整頓海防綜覈名實之際豈容不肖員紳虛糜無己致辦理不收實效著裴蔭森會同楊昌濬將該衙門現用各員認真考覈其冗濫充數者悉行裁汰並將實能通曉製造當差勤慎人員開單具奏一面咨報總理各國事務衙門查覈考驗儻再因循瞻顧不能破除情面仍有濫保浮支情事必惟該大臣等是問原片著抄給閱看將此諭知楊昌濬並傳諭裴蔭森知之欽此欽遵

臣等跪誦之下仰見

朝廷慎重用人制節謹度之至意欽悚莫名伏查船政爲海防水師根本非一切機器局製造局可比工程繁鉅用人尤難非有穎悟之心思不能體會於意象形聲之表非有強幹之才力不能率作於暑寒風雨之中監工者必諳機器之法程庀料者必審華夷之物質理文案者兼調度工程之事不徒案牘奉行筭支應者兼考核工料之能不僅銀錢出納得人任事之難有如此者故或用候補人員或用在籍紳士無不因材器使遴擇維嚴更設提調以提調之設稽查以

稽查之在工各執事初無定額視工程之緩緊隨時增減溯查同治五年營構伊始工作繁興或經理收發或監視工程或分司稽察或採購料件量能授事將及百員同治十二年間以建蓋工竣便將儲石所磚瓦所及管理營造之員裁撤並遣散各洋匠又將機器所併歸廣儲所鐘表廠併歸輪機水缸等廠兩項員紳亦卽裁撤迨光緒六年四月復將舳舻廠併歸船廠藝圃併歸東考工所又裁撤若干員初設提調三員今則僅用其一初設總監工總考工各一員

今則此缺尙懸七年以後因廠務稍鬆復於每
廠中暫裁一二員卽將所裁員額作爲懸曠惟
九年以來廠造鐵脅兵輪及承造南洋兩號快
船同時併工去歲法船猝臨閩口海防喫緊兼
爲省局趕造戰守各具如礮臺礮架彈子桿雷
地雷水雷及橫江鐵練阻船木簾等件工程繁
緊督視需人不得不添員差遣然亦不過五十
七員而已臣蔭森到工後防具稍備橫海鐵脅
船試洋二號快船下水廠工漸緩仍行裁汰數
員現在此缺亦懸而未補實因慎重工程節省

經費起見未敢稍事虛糜復查各員紳當札委之始薪水視其官階告假者按日扣除間有責任較重廠務較繁尤爲出力者另籌津貼以優異之於量能授食之中寓獎勵人才之道此固歷任督辦大臣勸功集事之苦心也上年前船政大臣張夢元議奏以員紳津貼應改爲薪水作正開銷經_臣等於本年七月二十六日

奏明已蒙

天恩優渥准_臣

蔭森逐一釐定實支實銷在案

_臣昌

溶到閩後亦嘗查諭船政規模日新月異比年

所造開濟橫海鏡清等船實已全臻美備該員
紳等籌畫精詳不辭况瘁其薪資皆累勞而日
增其工程亦隨時而俱進統計各廠員紳職有
專司尙無外間素食乾館等流弊茲復欽奉

諭旨經

臣

等精心抉擇嚴加考核其辦公竭蹶假期

過多者應裁撤以昭核實其治事惟勤歷著勞
績者當留用以策將來其在事員紳及出洋學
生實能通曉製造者計十有四人均不愧奇才
異能之選可備總理衙門咨取考驗至該員等
月支薪水雖屬稍優係按照前閩浙督

臣左宗

棠奏定藝局章程子弟學成監造者卽照外國
監工銀數然較初開船政時所用外國員匠每
員月支五百兩至百餘兩者亦屬有減無浮此
皆實在情形臣等不敢稍有欺飾現值

國家整練海軍之際需用快船鐵艦魚雷艇必多船
政正宜開拓工程多製以圖報效臣蔭森受

恩深重惟有實心整頓破除情面無任冗員稍糜經
費冀仰副

皇上綜覈名實之至意臣昌濬亦不敢稍分畛域隨
時互相妥商以重要工而歸實用所有遵

旨會同考覈緣由謹恭摺由驛四百里馳陳伏乞

皇太后

皇上聖鑒訓示再此摺係

臣

蔭森主稿理合聲明謹

奏

光緒十一年十二月初十日拜發奉

旨該衙門知道單併發單內鄧承修周德潤均稱星使殊屬不合著飭行欽此

此等語不心性語口地也

百餘年以來其地之風俗漸趨於文明而舊習亦漸次消滅矣

其地之風俗亦漸趨於文明而舊習亦漸次消滅矣

矣

其地之風俗亦漸趨於文明而舊習亦漸次消滅矣

矣

其地之風俗亦漸趨於文明而舊習亦漸次消滅矣

謹將船政已經考覈員紳應裁應留及應備咨
取考驗各銜名開具清單恭呈

御覽

謹開

應裁撤各員紳內

委紳後學堂監督戶部候補郎中梁佟年一員
月支薪水三十兩

查船政人員凡告假者按日扣除薪水該員
梁佟年性情好動往往擅回省城並不告假
本年五六月間借差請假赴滬甫回工兩月

又面稱渠京寓尚有舊宅賃人租住欲借差
赴都門清理屋宇揆諸學堂監視督率之義
因循作輟實非所宜應卽裁撤

委紳管理學堂刑部候補主事黃軒齡一員月
支薪水三十兩

該員志氣忼爽才具開展惟不能常川在工
去歲馬江戰事離工數月請假在省本年五
月銷假回工原支薪水四十兩酌減十兩復
又請假渡臺數月尚未回工亦未領支薪水
應卽裁撤

委員總稽查各廠浙江候補知縣夏獻鋈一員
月支薪水五十兩

該員由前大學士督辦福建軍務左宗棠奏
調來閩咨商船政委派各廠稽查事務到工
三月卽請假借差回浙聞該員前在浙江署
理東陽武義瑞安等縣尙有錢糧經手未完
事件急須回省清理交代應卽裁撤

委員管理磚灰廠福建候補知縣盧紹昌一員
月支薪水二十四兩

該員在磚灰廠督率工作尙無貽誤惟查省

局章程凡錢糧經手未清者例不准給予差
委該員因代理武平縣錢糧欠欸奏參摘頂
急須清理交代應卽裁撤

委紳後學堂候選訓導梁鳳翔一員月支薪水
二十四兩

該員兩次經該學堂教習羅熙祿等稟訐謂
該紳袒護廚丁有刻減在堂學生伙食等情
事雖查無確據而素無清望不足以折服人
心應卽裁撤

委員支應處候選訓導鄧承基一員月支薪水

三十兩

該員借差赴粵業經數月尙未來工查船政章程凡請假數月未回者應卽裁撤

委員文案處候選縣丞常鼎一員月支薪水十六兩

委員核對處候選從九品嚴樹立一員月支薪水十六兩

該二員性情好動不能常川在工應卽裁撤
委員廣儲所管理煤鐵軍功武舉廖雄勳一員
月支薪水十六兩

該員性氣麤浮每與同事好爲爭競惟努力
方剛尙耐辛苦酌減薪水四兩降充差弁專
管挖土機船如再不知愧奮卽行裁撤

應留用各員紳內

提調委員補用道周懋琦一員月支薪水銀三
百兩

該員講求用世之學才識明通籌商一切工
程措置裕如深裨大局應留用現已

奏明監督出洋學生提調員缺尙須揀派

總監工一員查此項差使從前係委用熟悉洋

務道員自出洋肄業學成各生回華設立工程處總核工料此缺久懸未補

總稽查委員紳二員

委紳承襲一等輕車都尉生員沈翊清一員月支薪水銀五十兩

該員淵源家學品粹才優督課工程堅任勞怨應留用

又一員懸曠

稽查各學堂兼辦文案候選知府嚴良勳一員月支薪水銀五十兩

該員學有根柢兼通西文督課精勤諸生多
所成就辦理中西文牘均臻周密應留用

稽查各學堂委紳員外郎林洄淑月支薪水銀
五十兩

該員才器宏遠約束學生查察功課甚爲得
力應留用

文案處管理核議各廠所各輪船各學堂事宜
釐校工料冊卷辦理中外交涉事件委員紳四
員

委紳知縣施魯濱一員月支薪水銀五十兩

該員學優才展熟悉船政情形於海防事宜亦能洞達應留用

委員知縣張思敬一員月支薪水銀二十八兩
該員品粹學通練達公事應留用

委紳武平縣學訓導許貞幹一員月支薪水銀
二十四兩

該員志行端謹才具穩練應留用

委紳生員五品軍功梁孝熊一員月支薪水銀
一十六兩

該員才潔品端辦公勤慎應留用

支應處管理收發製船養船經費稽核工料數
目等事委員紳三員

委紳知縣李聖培一員月支薪水銀四十兩

該員勾稽精詳久耐繁劇於一切工料欸目
最爲熟悉應留用

委紳五品軍功監生韓沐之一員月支薪水銀
三十二兩

該員公正廉潔精於勾稽應留用

委紳五品軍功生員葛晉謙一員月支薪水銀
二十二兩

該員學優行謹會計精晰應留用

前學堂兼繪事院管理督課藝童防閑誘掖等
事委員紳三員

委紳刑部主事鍾大焜吳徵駒等二員各月支
薪水銀三十兩

該二員品粹學優足資表率應留用

委紳舉人范繼馨一員月支薪水銀二十四兩
該員認真勸導兼善防閑

後學堂兼管輪學堂管理督課藝童防閑誘掖
等事委員紳四員

委紳大挑教職沈輝宗一員月支薪水銀二十
八兩

該員著有學庸疏解於西學外兼示漢文義
理足資矜式應留用

委紳舉人林宗開一員月支薪水銀二十四兩
該員誘掖後進悉心化導應留用

又二員懸曠

船廠管理監造船身桅擔舳板器具併建蓋廠
屋籌度用料調度工作等事委員紳三員

委紳縣丞鄭鏞一員月支薪水銀二十四兩委

員從九品程華湘一員月支薪水銀二十二兩
該二員熟悉船工辦事勤奮應留用

委紳訓導吳豐昌一員月支薪水銀二十兩
該員年富力強勤於任事應留用

鐵脅廠管理監造船身鐵脅各艙鐵梁鐵板籌
度用料調度工作等事委員二員

委員巡檢徐泰來一員月支薪水銀一十六兩
該員才具開展振作有爲應留用

委員從九品夏慶餘一員月支薪水銀二十兩
該員心地樸誠兼通鐵脅造法應留用

輪機廠管理監造輪機併各廠機器籌度用料

調度工作等事委員紳三員

委紳知縣王樹翰一員月支薪水銀三十兩

該員精明強幹熟悉輪機窳窳應留用

委紳縣丞王毓珍一員月支薪水銀二十兩

該員心思精細辦事勤能應留用

委員巡檢楊嵩年一員月支薪水銀二十四兩

該員心精力果調度有方應留用

鑄鐵廠管理監鑄銅鐵機件籌度用料調度工

作等事委員紳二員

委紳教諭林世仁一員月支薪水銀二十四兩
該員品粹才優爲匠徒所敬服應留用

委員鹽大使李雲樞一員月支薪水銀一十八兩

該員曾在德國使館供差通曉西洋廠務應留用

水缸廠管理監造鍋爐汽管鐘表向盤籌度用料調度工作委員紳三員

委紳知縣鄭逢時委員府經歷林希曾等一員
各月支薪水銀二十四兩

該二員才幹優長工程熟悉應留用

委紳縣丞孟宗洛一員月支薪水銀四十兩

該員熟悉鍋爐造法才大心細隨時兼派勘估起蓋修葺工料應留用

小輪機廠管理監造船工鑲配銅鐵併修製各廠機器籌度用料調度工作等事委員府經歷朱慶生一員月支薪水銀二十四兩

該員心細才優兼通法國語言文字應留用
拉鐵廠管理監造船身輪機鋼鐵胚件併拉銅鐵等件籌度用料調度工作等事委員紳二員

委紳監生孟宗韓一員月支薪水銀一十五兩
該員廉幹勤奮熟悉廠務應留用

又一員懸曠

模廠管理監造鑄件木模併轆餅索串籌度用
料調度工作等事委紳舉人鄭錢一員月支薪
水銀二十兩

該員才敏心靈勤於任事應留用

帆纜廠兼礮廠管理監造帆纜起卸重件併驗
收礮械籌度用料調度工作等事委紳二員
委員知縣鄭瓊書一員月支薪水銀三十兩

卷二十一
該員勤能諳練兼曉外洋礮械應留用

委紳訓導梁益謙一員月支薪水銀二十四兩

該員辦事認真兼曉帆纜造法應留用

磚灰廠管理監造火磚煨灰煨煤籌度用料調
度工作等事委紳知縣陳慶辰一員月支薪水
銀二十六兩

該員樸誠勤奮曉暢工程應留用

船槽管理調度輪船上槽排日江干挖土督攆
工作巡視勤惰等事委紳縣丞孟宗伊一員月
支薪水銀三十兩

該員公正老成精勤穩練熟悉船身製法及一切工程甚資得力應留用

版築所管理監造爐溝及輪船鍋爐砌磚船底築灰籌度用料調度工作等事查此項差使應派員一名現懸曠未補暫由船廠委員紳兼管廣儲所管理驗收銅鐵帆纜煤油各料監守藏儲稽核支放等事委員二員

委員縣丞陳耕一員月支薪水銀二十二兩
該員謹慎耐勞諳熟船料應留用

委員縣丞鄧慶光一員月支薪水銀二十二兩

該員當差勤慎稽核必親應留用

儲材所管理驗收製船蓋廠各項木植監守藏
儲稽核支放等事委員縣丞許桐一員月支薪
水銀二十二兩

該員出納必慎才具優長應留用

東西攷工所管理鈴束工匠支放薪銀等事委
員紳四員

委員通判張樾雲一員月支薪水銀二十二兩
該員認真約束寬嚴得宜應留用

委紳知縣林昌謨一員月支薪水銀二十四兩

該員老成諳練守潔才優應留用

委紳監生楊廷綸一員月支薪水銀一十八兩

該員年富力强辦公勤慎應留用

又一員懸贖

藝圃管理鈴束藝徒兼課讀支放辛銀等事委

紳生員王煜一員月支薪水銀二十兩

該員品行端正廉幹有爲應留用

香港采辦分局管理采辦外洋船料收支料價
等事委員二員

委員縣丞何定求一員月支薪水銀三十兩

該員熟悉船料辦事勤能應留用

委員五品軍功附生于成泰一員月支薪水銀四十兩

該員老成謹慎爲守兼優應留用

發審所管理審勘工次匠徒關涉詞訟兼查保甲等事委員通判嚴毓瑞一員月支薪水銀三十兩

該員穩練精明勤於聽斷應留用

出洋學成回華匠作藝徒三員

藝徒千總任照一員月支薪水銀二十二兩

該藝徒同治八年十月入廠學習技藝
法國語言文字繪算光緒三年九月出洋肄業
在法國專學拉打鐵脊鐵甲兼習提鍊鋼
鐵諸法六年十月學成回華現充鐵脊廠兼
船廠監工應留用

藝徒千總王桂芳一員月支薪水銀二十二兩
該藝徒同治七年六月入廠學習技藝
法國語言文字繪算光緒三年九月出洋肄業
在法國專學拉打銅鐵兼習提鍊銅鐵鋼
諸法六年十月學成回華現充拉鐵廠監工

應留用

藝徒千總吳學鏞一員月支薪水銀二十兩

該藝徒同治七年六月入廠學習技藝廳通
法國語言文字繪算光緒三年九月出洋肄
業在法國專學打鑄銅鐵兼習輪機諸法六
年十月學成回華現充鑄鐵廠監工應留用
應備咨取考驗各員紳內

繪事院管理督課藝童等事委員同知董毓琦
員月支薪水銀三十六兩

該員向習天文弧算機器船械重電各學兼

習占風望氣映相水墨畫藝著有星算補遺
笠寫壺金交食南車籌筆初梯髀矩測營九
環西解各書識解名通可備咨取考驗

水雷處管理監造調度工程等事委員二員

委員翰林院待詔陸汝成一員月支薪水銀四
十兩

該員向從英人哈倫授學有年心思靈敏通
曉化學能自造各種油藥白藥及水雷火箭
洋鎗諸法尤能自造雷引極爲靈捷繪算圖
式製成新式子母水雷可以洞穿鐵艦曾在

烏龍江口演放以巨木紮成九層方簾貫以
數百鐵條厚及八尺該水雷礮力能擊起木
簾離水十數丈裂爲五段較德雷尤爲猛烈
可備咨取考驗

委紳附生兼襲雲騎尉世職楊仰曾一員月支
薪水銀二十二兩

該員苦心研慮精求西學旁通默悟推陳出
新能自造電雷磁雷連環地雷及一切神機
火弩之法尤能造自發蚌雷其形如蚌兩雷
相對能開能合在水中輕不滿筋使善泅水

者挾之伏水而往至敵船之下機發人離其
雷自能緊貼船底四五分鐘時兩雷並發礮
力極大可備咨取考驗

出洋學成回華通曉製造學生十一員

學生知縣魏瀚一員月支薪水銀八十六兩四
錢又監造南洋快船加給銀五十兩共一百三
十六兩四錢

該學生同治五年十二月選入前學堂學習
法國語言文字格致算學光緒元年正月出
洋肄業在英法德比四國專學製船諸法兼

習製洋鎗及銅鐵甲等學五年十一月學成
回華派在工程處總司製船六年十二月復
出洋在德國監驗定遠鎮遠鐵甲船工料八
年十二月回華仍派工程處供差出圖自製
橫海鏡滄等船現總司快船鋼甲船工程可
備咨取考驗

學生花翎游擊陳兆翹一員月支薪水銀八十
六兩四錢又監造南洋快船加給銀五十兩共
一百三十六兩四錢

該學生同治七年四月選入前學堂學習法

國語言文字格致算學光緒元年正月出洋
肄業在英法德比四國專學輪機製法五年
十一月學成回華派在工程處總司製機六
年十二月復出洋在德國監驗定遠鎮遠鐵
甲船濟遠穹甲船工料十年十一月回華仍
派工程處供差現總司快船鋼甲船輪機工
程可備咨取考驗

學生花翎都司鄭清濂一員月支薪水銀八十
六兩四錢又監造南洋快船加給銀五十兩共
一百三十六兩四錢

該學生同治五年十二月選入前學堂學習
法國語言文字格致算學光緒三年二月出
洋肄業在英法德比四國專學製船諸法兼
習洋鎗造法在德國監驗定遠鎮遠鐵甲船
工料九年九月學成回華派在工程處總司
製船出圖自製橫海鏡清等船現總司快船
鋼甲船工程可備咨取考驗

學生守備吳德章一員月支薪水銀七十二兩
又監造南洋快船加給銀五十兩共一百二十

一兩

該學生同治六年十一月選入前學堂學習
法國語言文字格致算學光緒元年自製藝
新輪船經沈前大臣奏明獨出心裁併無藍
本等語三年二月出洋肄業在英法比三國
專學製船諸法兼習英法二國洋礮造法六
年十月學成回華派在工程處總司製船出
圖自製開濟橫海鏡清等船現總司快船銅
甲船工程可備咨取考驗

學生都司銜守備楊廉臣一員月支薪水銀七
十二兩又監造南洋快船加給銀五十兩共一

百二十一兩

該學生同治七年四月選入前學堂學習法國語言文字格致算學光緒三年二月出洋肄業在英法比三國專學輪機製法兼習英法二國洋礮造法六年九月學成回華派在工程處總司製機出圖自製開濟橫海鏡清等船輪機現總司快船鋼甲船輪機工程可備咨取考驗

學生都司銜守備李壽田一員月支薪水銀七十二兩又監造南洋快船加給銀五十兩共一

百二十二兩

該學生同治七年五月選入前學堂學書法
國語言文字格致算學光緒三年二月出洋
肄業在英法比三國專學輪機製法六年五
月學成回華派在工程處總司製機出圖自
製開濟橫海鏡清等船輪機接續總司快船
鋼甲船輪機工程現隨鄧星使承修赴廣西
勘界可備咨取考驗

學生花翎都司林慶昇一員月支薪水銀三十
六兩

該學生同治六年十二月選入繪事院學習
繪事並法國語言文字格致算學光緒三年
二月出洋肄業在英法比三國專習礦務采
鐵煉鐵煉鋼等學六年十月學成回華覓得
福州穆源鐵礦並赴臺灣總司煤礦工程嗣
派在拉鐵廠料理拉鐵工程現隨周星使德
潤赴雲南勘界可備咨取考驗

學生守備池貞銓一員月支薪水銀三十六兩
該學生同治六年十二月選入繪事院學習
繪事並法國語言文字格致算學光緒三年

二月出洋肄業在英法比三國專習礦務采
鐵煉鐵煉鋼等學六年七月學成回華覓得
福州穆源鐵礦現派拉鐵廠料理拉打銅鐵
工程兼仿造洋火磚可備咨取考驗

學生縣丞林日章一員月支薪水銀三十二兩
該學生同治七年七月選入繪事院學習繪
事並法國語言文字格致算學光緒三年二
月出洋肄業在英法比三國專學礦務兼習
輪機六年十月學成回華勘驗北洋開平煤
礦福州穆源鐵礦現派輪機廠製機工程可

備咨取考驗

學生從九品魏暹一員月支薪水銀三十二兩
該學生同治八年三月選入前學堂學習法
國語言文字格致算學光緒七年十二月出
洋肄業在法國專學輪機製法十一年四月
回華現派工程處幫理快船鋼甲船工程可
備咨取考驗

兩
學生從九品陳才鐳一員月支薪水銀三十二

該學生同治十年二月選入繪事院學習繪

事並法國語言文字格致算學光緒七年十
二月出洋肄業在德國專學製配魚雷伏雷
兼通德國語言文字十年十一月學成回華
現派總司魚雷工程可備咨取考驗

請留道員吳仲翔接辦船政提調片

再船政提調道員周懋琦現經

奏派充當第三屆出洋肄業學生監督奉

旨允准在案所遺提調差事有勲理工程表率員紳
之責非體用賅備爲守兼優弗克勝任查有分
省補用道吳仲翔前曾派充提調熟悉廠中情
形能任勞怨現辦天津水師學堂練船事宜本
年二月前大學士臣左宗棠曾以該員究心洋
務船政章程多其手定請仍

飭回船政辦事經北洋大臣李鴻章以津局乏員接

辦奏懇

恩准暫留在案該員才具端謹任事實心在工十有餘年經畫工程探討利弊實堪幹濟時艱昨適由津請假回籍擬卽留充提調藉資熟手而收臂助經臣電商大學士北洋大臣李鴻章並會商署福州將軍臣古尼音布閩浙總督兼管福建巡撫臣楊昌濬均屬意見相同當此裁汰冗員樽節經費之時得該員悉心綜覈必能條理得宜所有道員吳仲翔應留船政接辦提調緣由理合附片具陳伏乞

聖鑒訓示謹

奏

同日拜發奉

旨該衙門知道欽此

新正三言生系

卷三十一

三

添蓋學舍復設藝圃招考生徒片

再查船政舊章學堂招考文學聰穎子弟學習製造及駕駛管輪名曰藝童自選充入堂之日始日給飯食銀七分五釐並月給銀四兩俾贍其家繪事院習圖算者亦照此例藝圃招考營力壯健子弟分派各廠學習工作名曰藝徒自選充入圃之日始日給工食銀一錢五分經前大臣歷辦在案溯自開局迄今學堂藝圃繪事院均多成就年來嚮學者漸眾臣蔭森莅工後因於前後學堂繪事院增添學舍以廣育藝童

前裁藝圃併歸考工本年復設藝圃以多招藝徒改定章程自光緒十一年起各學堂繪事院新招藝童只給飯食不給贍銀學習三箇月後考定留堂者始行於日給飯食外月給贍銀四兩藝圃新招藝徒日只給工食銀七分五釐隨時察看學藝有進再行加給於培植人材之中仍寓撙節經費之意除咨部查照並彙案造銷外臣蔭森謹將節省藝童藝徒贍銀工食緣由附片

奏明伏乞

聖鑒訓示謹

奏

同日拜發奉

旨該衙門知道欽此

船政奏議集編卷三十一終

船政奏議彙編卷三十二目錄

裴蔭森六

橫海輪船在澎湖觸礁派員起重撈救摺

覈估第三屆出洋用款並另委洋監督摺

學生匠首出洋習製鐵甲學成回華請獎片

軍功陸昭愛病故請從優議卹片

二屆出洋學生援案請獎摺

三屆出洋製造學生先予請獎片

員紳薪水准照原數支銷摺

研訊橫海輪船觸礁情形據實覆陳摺

卷之二十一

蘇州府志

卷之二十一

蘇州府志

船政奏議彙編卷三十二

裴蔭森六

橫海輪船在澎湖觸礁派員起重撈救摺

奏爲橫海輪船在澎湖洋面遇霧觸礁派員起重
設法撈救恭摺會陳仰祈

聖鑒事竊查光緒十二年二月初八日署臺灣道陳

鳴志由閩口乘坐橫海輪船解餉赴臺過廈是

時臣

昌濬出巡海口適將由廈渡臺先乘美富

輪船進發因水師提督彭楚漢亦擬會勘海口
情形與署臺灣道陳鳴志同坐橫海輪船東渡
於十一日早由廈展輪出口向澎進駛是時海

霧迷濛竟越過彭湖北碇吉貝目嶼地方仍大霧迷天莫辨行徑忽聞聲響船已觸礁擱淺人餉無恙卽據該船管駕忻成發馳稟前情當由臣昌溶派令美富輪船前往拖帶不起僅將索纜等件搬運寄存其船身機器均關緊要誠恐被風飄散派令已革前任澎湖右營都司鄭漁會同該管駕忻成發妥爲看守保護並飭由興泉永道奎俊於十九日電達到工派船援救適伏波萬年清兩船在工修理臣蔭森當飭修竣要工卽於

二十二日駛赴澎湖相機設法起救旋據鄭漁等稟稱是船於十七十八等日迭經風颶板片漂散無存惟機器半存礁上者仍竭力設法起救等語臣等查臺灣廈門澎湖各海口風霧不時礁砂錯布自昔稱爲奇險同治十三年沈葆楨督師臺灣安瀾大雅兩船在安平旂後遭風同時沈没本年正月間洋商得忌利士輪船在廈門附近之南汕頭地方迷霧觸礁又本年二月十一十二等日洋商時和輪船亦有在浙江台州洋面遇霧觸礁之事是其明證此次橫海

輪船觸礁擱淺雖因霧氣深重人力難施然該副將忻成發職司管駕未能預識於幾先補救於臨事實屬咎無可辭相應請

旨將總兵銜副將忻成發卽行革職該船大副五品軍功容尙謙係學生出身在外洋肄業十年之久夙諳沙線羅經何以一逢濁霧遂至迷於所往應卽咨部斥革仍由臣等一併發交福州府會同船政局發審委員提集舵工水手人等確訊真實情形分別辦理以示懲戒而警將來所有橫海輪船在澎湖洋面擱沈委員設法護起

機器並將管駕各員分別參處緣由謹合詞恭
摺由驛四百里馳陳伏乞

皇太后

皇上聖鑒訓示再此摺係臣蔭森主稿合併聲明謹
奏

光緒十二年三月初一日拜發奉

旨覽奏均悉忻成發著卽行革職容尙謙著一併斥
革仍著將觸礁實在情形確切研訊分別辦理該
部知道欽此

覈估第三屆出洋用款並另委洋監督摺

奏爲選派第三次出洋肄業學生覈估按年用款
並另委洋員接充洋監督恭摺仰祈

聖鑒事竊

臣

等以駕駛製造在在需才於去年十月

間奏請續選學生出洋肄業分別扣足在船月
日展拓在洋年限荷蒙

恩准欽遵在案

臣

等悉心遴選於北洋水師學生中

選取陳恩燾劉冠雄曹廉正陳燕年黃裳吉伍
光鑑鄭汝成陳杜衡王學廉沈壽堃等十名於
船政駕駛學生中選取黃鳴球羅忠堯賈凝禧

鄭文英張秉圭羅忠銘周獻琛王桐陳鶴潭邱志范等十名凡二十名以備往習駕駛於船政製造學生中選取鄭守箴林振峯陳慶平王壽昌李大受高而謙陳長齡盧守孟林志榮楊濟成林藩游學楷許壽仁柯鴻年等十四名以備往習製造當飭華監督道員周懋琦率領出洋內除黃裳吉在北洋供差尙未抵閩外其餘三十三生均乘坐洋商輪船開赴香港於三月初三日由香搭坐西國公司輪船出洋其按年用款臣蔭森督飭華監督周懋琦查照舊章細加

參酌計駕駛二十生在洋三年製造十四生在洋六年一切經費約共需銀三十萬兩有奇援照成案由閩省釐金項下籌撥四分之二閩海關四成洋稅及船政製船經費項下各籌撥四分之一分年匯解計第一年應解銀八萬三千兩有奇第二年應解銀六萬兩有奇第三年應解銀五萬四千兩有奇第四年應解銀三萬六千兩有奇第五年應解銀三萬九千兩有奇第六年應解銀三萬四千兩有奇依期勻匯以資源源接濟惟英國行用金錢每枚謂爲一磅兌

欵向按英金磅數購匯而磅價長落靡常一時不能豫定_臣等覈估之數僅照辰下時價每磅以洋番六圓一角科計將來設有盈絀自應據實支銷至各生抵洋後分途投學必須洋監督會同照料_臣等前摺所派之日意格已於本年正月在其本國病故_臣等查有法員斯恭塞格由水師出身前在船政幫同日意格辦理工程均臻妥協前兩屆學生出洋肄業該洋員充洋監督之幫辦與華員和衷共濟克底有成擬令該洋員接辦洋監督事務以資熟手經電商出

使大臣許景澄意見相同當由許景澄與之定議飭俟各生到洋後一切延師課授及各生赴船赴廠學習各事宜隨時會同華監督周懋琦認真經理務使各生學業在在咸有神益此次出洋章程駕駛學生既令扣足在船月日製造學生復予展拓在洋年限各該生自應益求深造藉副培成臣等仍當隨時督飭華洋監督悉心籌畫期於欸不虛糜學有成效以無負

朝廷倡練海軍甄陶繼起之至意所有選派學生覈估用欸另委洋員緣由理合會同南洋大臣

兩江總督

臣

曾國荃署福州將軍

臣

古尼音布

閩浙總督兼福建巡撫

臣

楊昌濬合詞恭摺由

驛四百里馳陳伏乞

皇太后

皇上聖鑒再此摺係

臣

蔭森主稿合並陳明謹

奏

光緒十二年四月初七日拜發奉

旨該衙門知道欽此

學生匠首出洋習製鐵甲學成回華請獎片

再臣鴻章前向外洋訂造定遠鎮遠等號鐵艦
開工之初經前出使大臣李鳳苞咨留出洋肄
業期滿之留閩補用都司鄭清濂先赴該廠查
核圖幅勘驗工料並資學習復經電商黎兆棠
選派出洋肄業期滿回華之留閩補用游擊陳
兆翔同知銜分發省分補用知縣魏瀚並曾充
管輪之都司銜留閩浙補用守備陸麟清帶同
匠首守備用留閩補用千總黃戴陳和慶五品
軍功留閩補用千總譚秀補用千總黎晉賢補

用外委記名把總程好五品軍功把總李祥光
六品軍功陸昭愛等續行出洋學習泊所造鐵
艦一律竣工經李鳳苞將各該員匠分別咨送
回華內除陸愛昭一名到津供差旋卽病故外
其鄭清濂等續派在洋學習閱時三稔中間疊
赴各國研究製造管輪各項新法具有心得與
二屆出洋各生期滿學成事同一律自應一並
奏請獎勵以勸來茲鄭清濂可否免補本班以游
擊留閩儘先補用並

賞加副將銜陳兆翽可否免補本班以參將留閩儘

先補用並

賞加總兵銜魏瀚可否免補本班以直隸州知州分發省分儘先補用並

賞加四品銜陸麟清可否免補本班以都司留閩浙儘先補用並

賞給四品

封典黃戴陳和慶譚秀黎晉賢可否均免補本班以守備留閩儘先補用程好李祥光可否均免補本班以千總留閩儘先補用並

賞加守備銜出自

天恩逾格臣等爲激勸人才起見謹合詞附片具陳
伏乞

聖鑒訓示謹

奏

同日拜發奉

旨該部議奏欽此

軍功陸昭愛病故請從優議卹片

再六品軍功陸昭愛詣習輪機技藝供差閩廠
歷有年所經黎兆棠選派隨同陳兆翔等出洋
學習在洋三年倍加攻苦及訂造之各號鐵艦
一律竣工李鳳苞以該軍功習製鐵艦及雷艇
等工尤能得心應手適北洋訂造之導海船需
人經理並有未合攏之大雷艇二艘需人襄助
飭令該軍功隨同導海船回華既抵津門經臣
鴻章派赴旅順船塢供差甚爲得力上年正月
以積勞病發在差身故據陳兆翔等稟懇照章

奏卹前來臣等查光緒二年奏定選派船政生徒出洋肄業章程內開生徒因攻苦積勞致有不測之事酌量奏卹等因今陸昭愛選派出洋數年藝成而歸遽因攻苦積勞在差病故殊堪憫惻相應據情籲懇

天恩俯准飭部從優議卹以慰幽魂謹合詞附片陳請伏乞

聖鑒訓示謹

奏

同日拜發奉

旨陸昭愛著交部從優議卹欽此

二屆出洋學生援案請獎摺

奏爲二屆出洋期滿學生學均有成並襄辦肄業事宜學生始終出力援案懇

恩分別獎勵以昭激勸恭摺仰祈

聖鑒事竊查閩省船政二屆選派學生出洋肄業期

滿學成

臣

等業將英法等國官學教習洋員及

使館出力各員暨原派之洋監督分別附片

奏請獎勵在案茲查二屆出洋學生派赴法國專

習營造者二曰黃庭王迴瀾專習鎗礮者一曰

李芳榮專習硝藥者一曰王福昌專習製造者

一曰魏暹派赴德國專習魚雷者一曰陳才鐄
派赴英國專習駕駛者二曰陳兆藝李鼎新前
經出洋專習製造藝成回華襄辦二屆肄業繙
譯各事宜者一曰吳德章各該生率皆在洋三
年經歷英法德各國官學名廠提督兵船海口
要隘其習營造者於測量算繪久暫臺堡守城
防隘水底設防各項習鎗礮者於鎗礮軍械鎔
鍊鋼料各項習硝藥者於藥彈棉藥新藥爆藥
造藥鍋鑪各項習製造者於水師製造輪機船
身各項習魚雷者於新式魚雷尺寸製雷修雷

各項習駕駛者於行兵布陣風濤沙線駛船用礮各項莫不詳求博覽理法兼精當期滿學成經前出使大臣李鳳苞出使大臣許景澄查錄各該生在洋課程出具考語先後咨送回華內除李芳榮一名臨時咨留駐日參贊官署代辦繙譯事宜外其黃庭等均已到華供差際今倡練海軍之會臣等公同考察各該生所學若營造若鎗礮若硝藥若製造若魚雷若駕駛莫不各具專長或爲前屆學生所未備習實足以仰備

國家因材器使吳德章以製造學生襄辦肄業事
宜始終不懈亦屬著有微勞查前届出洋生徒
學成回華經臣鴻章會同

奏請獎勵荷蒙

恩准欽遵在案此次學成各生事同一律合無援案
仰懇

天恩俯准分別獎勵以資鼓舞而勸將來謹開具清
單呈候

宸裁理合會同福州將軍臣古尼音布恭摺附驛馳
陳伏乞

皇太后

皇上聖鑒訓示再此摺係臣蔭森主稿合併聲明謹
奏

光緒十二年四月初七日拜發奉

旨黃庭等均著照所請獎勵該衙門知道單併發欽
此

三屆出洋製造學生先予請獎片

再查出洋肄業章程向以三年爲限生徒期滿
學成則予一律請獎此次北洋閩廠所派第三
屆出洋學生習駕駛者仍以三年爲限習製造
者則酌予變通以六年爲限凡以使各生於其
所學益求精密期必盡窺奧窔而後歸也惟駕
駛製造同一出洋而相較年月增至一倍若使
製造學生必俟六年期滿方予獎勵彼此相形
恐無以作其歷久不衰之氣臣等細加體察擬
請俟此次出洋駕駛學生三年期滿學成回華

之日責成華洋監督將因展限期留洋學習之製造學生按名出具切實考語備文呈送由臣等先予擇尤彙案請獎一次俟六年期滿回華若果各生所學均能益臻深造再予一律請獎以符向章而昭公允使各生成知

朝廷作育人才令其重瀛遠涉期限培增所以獎勵之者亦復有加無已必能爭先奮發相勵有成庶於變通肄業事宜不無裨補儻邀

天恩俯准可否

飭下部

臣

立案遵行之處出自

宸裁謹合詞附片具陳伏乞

聖鑒訓示謹

奏

同日拜發奉

旨著照所請該部知道欽此

員紳薪水請照原數支銷摺

奏爲員紳薪水懇

恩准照原數據實支銷免予核減以勸在事而濟要
工恭摺仰祈

聖鑒事竊

臣

於上年七月間釐定員紳書役薪工摺

內恭陳員紳原支薪水津貼情形請將津貼改
併薪水據實支銷於八月二十日奉

旨戶部知道單併發欽此欽遵在案嗣准戶部來咨
以單內各欸第將津貼名目改爲薪水名目其
中之數並未減去分毫仍令嚴行裁減以節欸

項而昭核實等因又臣上年十二月間會同考覈員紳案內續准戶部來咨行令遵照前咨速將員紳薪工從實核減至所派員紳現在留用者連藝徒學生等尙有六十餘員足供任使其懸曠各缺自應裁汰毋庸添補並令將該廠委員酌定額數奏報立案以示限制各等因前來臣承准之下伏念際今帑項奇絀事事咸籌撙節臣職司考工但令於無可裁減之中尙堪裁減分毫均應嚴加綜核期歸實用何敢稍執前說上瀆

宸聰惟船政得人任事之難迥非尋常局務可比不能不優其廩餼藉資激勸歷任大臣於此具有苦心久邀

聖明洞鑒從前祇以員紳薪水格於例銷不得已而有津貼名目前大臣張夢元始請改歸外銷前兩江督臣左宗棠等會議復奏有與其強符成

例而津貼仍應外銷何如照款動支俾造報胥歸核實之語凡所反復論列皆祇釐定主名辨析銷款非於動支多寡之數前後有所出入也臣蒞工接辦是案亦以爲與其異名同實不若

使名實相符之爲愈是以前奏輒請將津貼改併薪水據實支銷其數未經裁減者亦以祇屬併二爲一在各該員紳月得多寡之數前後無所出入也查現在閩局員紳薪水津貼數目以提調一員月共支銀三百兩爲最鉅左宗棠前在閩浙總督任內核定此數誠以提調有調度全局工程辦理交涉事宜之責自延幕友聯絡洋人在在因公耗費獨爲較鉅故也遞是以降最多者祇五十兩亦僅寥寥數人其餘率在二三十兩上下至十餘兩不等要皆量能任事課

功授食核其原支數目或因歷著成效遞次加增或因具有奇材量予優異多寡參差蓋又莫不有爲而然夫優加薪水所以示勸則核減薪水所以示懲在事稍不得力之員經臣前已裁汰現所留者胥能矢慎矢勤奉公無過似未便祇以釐定主名概予核減且船政成船工料侈約實與在事員紳精神怠奮互爲乘除得其人則費約功倍失其人則費侈功半但令在事員紳咸出實心實力爲

國家區畫鈎稽俾木屑竹頭均收實用則一船一

舟車考卷之二
役較量歲時所撙節裨益於無形者實非淺鮮
錄厥微勞厚以薪俸度亦

朝廷寬厚所樂予優容者也臣再四籌思惟有據
情剖籲仰懇

天恩俯念船政用人第資廩餼以相激勸此次改併
津貼以爲薪水在各該員紳月得多寡之數前
後非有出入

飭下部臣立案准照原數據實支銷免其核減嗣後

在事員紳臣仍嚴加考察其勤慎得力應加薪
水者自稽查學堂管理文案支應以下仍不得

過五十兩之數以示限制如或任事不力立予
罰減薪水或徑行撤差其所增所減數目按年
報部以憑核銷至臣前奏單開懸曠各員自應
遵照部咨悉行裁汰惟分廠員額向視工程緩
急以爲增減應增之時不敢以乏員墜公應減
之時亦不敢以徇情糜費若予先時預定誠恐
轉多窒礙合無並懇

恩准如果將來工作繁興或新設廠所必須添用人
員仍由臣隨時酌派咨部立案以重工程而昭
體制除咨部查照外所有在事員紳薪水據實

光緒十二年四月
支銷懇免核減緣由謹會同署理福州將軍
古尼音布閩浙總督兼管福建巡撫
臣楊昌濬
恭摺附驛馳陳伏乞

皇太后

皇上聖鑒訓示謹

奏

光緒十二年四月初七日拜發奉

旨戶部議奏欽此

研訊橫海輪船觸礁情形據實覆陳摺

奏爲遵

旨研訊橫海輪船觸礁情形據實覆陳恭摺仰祈

聖鑒事竊橫海輪船前在澎湖目與吉貝地方遭霧

觸礁沉沒經

臣

等將大概情形繕摺馳報並將

管駕大副人等發交福州府訊究在案嗣准兵

部火票遞回原摺後開軍機大臣奉

旨覽奏均悉忻成發著卽行革職容尙謙著一併斥

革仍著將觸礁實在情形確切研訊分別辦理

該部知道欽此

臣

等當卽恭錄

諭旨札飭福州府知府張國正船政局發審委員通
判嚴毓瑞提同管駕大副舵工水手人等確切
研究旋由該府等訊據管駕忻成發供浙江甯
波府鄞縣人由軍功疊保副將光緒十一年九
月間到閩奉委管駕橫海輪船先後駛歷上海
金陵及臺北基隆各處從無貽誤本年二月初
八日由閩口駛往廈門十一日七點半鐘放定
羅經由廈開船出口駛至中途適值大霧迷漫
越過澎湖是夜二點鐘轉輪回駛至十二早七
點半鐘行抵澎湖吉貝地方霧蔽益甚咫尺莫

辨以致船碰暗礁失事經美富輪船前來拖拉
不起遂將人衆餉銀搬救過船等語質之大副
容尙謙舵工水手陳金存江四等供均相同究
詰不移等情具詳前來臣等覆查本年二月十
一十二等日洋商時和輪船在浙江台州洋面
遇霧觸礁適當其時卽臣昌濬乘坐美富輪船
先期抵澎亦親見大霧四塞十步之外不辨人
物該管駕等供稱遭霧失事人力難施尙屬實
在情形惟據供由廈出口中途遇霧該管駕不
卽設法停輪候晴開駛以致迷霧攔淺復不能

盡將煤物搬卸使船身輕浮冀可出險未免昧
於幾先疏於臨事究有應得之罪除將大副容
尙謙舵工水手陳金存江四等由臣等分別懲
辦外相應請

旨將已革副將忻成發永不敘用並不准赴各省防
營投効以示懲儆所有訊明橫海輪船觸礁實
在情形分別辦理緣由謹合詞恭摺由驛四百
里馳陳伏乞

皇太后

皇上聖鑒訓示施行再此摺係臣蔭森主稿合並聲

明謹

奏

光緒十二年五月初六日拜發奉

旨著照所請該衙門知道欽此

光緒十二年五月初六日

臣

船政奏議彙編卷三十二終

船政奏議彙編卷三十三目錄

裴蔭森七

鏡清快船試洋摺

平遠舨板船配設官弁舵水名額並月支薪費
銀數片

定購第六號鐵脅輪船礮位片

製船用欸造冊報銷難拘成例請
飭部立案
摺

修理萬年清輪船動用工料銀數片

修理泰安輪船動用工料銀數片

洋監督日意格積勞病故懇請議卹片

海軍奏請籌辦
卷之五十二
一
廠造第三號快船下水並陳現在情形摺

添購雷艇配用礮位雷機片

添蓋廠屋並添製機器動用銀數片

船政奏議彙編卷三十三

裴蔭森七

鏡清快船試洋摺

奏爲鏡清快船試洋恭摺仰祈

聖鑒事竊

臣

於去年十二月初二日業將第二號鏡

清快船下水日期並該船丈尺行程里數及加
配電燈風機魚雷格林礮改換鋼桅礮位各情
形具摺

奏明並請將在事員紳人等擇尤保獎奉

旨此項輪船著俟試洋後如果駕駛得力毫無流弊
再將出力人員擇尤請獎欽此欽遵在案

臣

督率

在事員紳催趨工程務期堅實一面電商李鴻章於曾經出洋之駕駛學生酌派一人來閩管帶當准電覆學生何心川可選札令來閩試用並准曾國荃以派令何心川來工管駕咨會前來臣當卽飭其將該船自大副以至舵水升火人等嚴加遴選以備試洋適據各廠員紳及工程處製造學生稟報該船輪機鍋鑪桅檣帆纜一律完竣臣諷於七月十二日躬率員紳工匠乘坐該船併飭學堂洋教習鄧羅邀同英國兵船水師官二人前往看驗屆期四點鐘升火六

點鐘由羅星塔展輪八點鐘一刻出港九點鐘到媽祖澳卽在該處及白狗山一帶放洋試驗是早北風大作波濤澎湃該船鎮定不簸是晚七點鐘回工據何心川稟稱輪機每分鐘旋至八十一轉每點鐘船行法海里十四迷盧半合英海里十六迷盧零嗣復開滿車輪機每分鐘旋至八十七轉每點鐘船行法海里十五迷盧零合英海里十七迷盧零核與工程處學生所稟相符並據何心川面稱該船機件均各堅利靈快並無疵病卽前往看驗之英國水師官亦

無不盛稱美備謂非經目覩尙難信闔廠之有
此精工鉅製也臣復細加週視船上一切部位
機器咸屬穩固現飭該管駕將應配零件趕備
齊全卽行駛赴金陵聽候南洋大臣驗收遣用
其應配職位魚雷係由外洋定購一俟運到再
爲配置至管駕官以下銜名水手人等額數月
給薪費數目應由南洋大臣

奏咨立案以昭核實此次工程處監造學生及員
紳工匠殫竭思力精益求精成此海防利器實
屬異常出力自應欽遵前奉

諭旨俟該船駛到南洋後將在事出力人員擇尤保
獎所有鏡清快船試洋各緣由理合會同南洋
大臣兩江總督臣曾國荃署福州將軍臣古尼
音布閩浙總督兼管福建巡撫臣楊昌濬恭摺
由驛四百里馳陳伏乞

皇太后

皇上聖鑒訓示謹

奏

光緒十二年七月十五日拜發奉

旨著照所請該衙門知道欽此

丹正考證

卷三十三

三

平遠舨船配設官弁舵水名額並月支薪費
銀數片

再臣於去年六月間擬設學生練船購修平遠
舨船業經

奏明在案該船船身由廠加修堅固並換配帆纜
添設礮堞展拓水艙所有船面戰枰艙內住房
均改照戰船式樣以備各生練習嗣因第三屆
出洋肄業之議已成經於駕駛學生中選派十
名隨同監督道員周懋琦西行其餘在堂堪以
上船者僅林葆懌等七名人數無多若專設一

船訓練一切規模概照練船辦理經費稍嫌過鉅因函商李鴻章將此七生附入北洋威遠練船學習在各生既無曠學之虞在閩廠可收節費之實殊屬兩有裨益該七生已於六月初一日飭其北行矣至平遠一船因臺灣建蓋衙署應用內地各料需船裝運而臺煤臺樟又爲廠中所急需當札委升用守備林高輝暫充該船管駕大副舵水人等力加刪減只予僱募二十三員名飭其往來省臺專司轉運謹將該船員弁名額並月支薪費繕具清單恭呈

御覽將來新班駕駛學生堂課畢時應往海上練習
仍將該船作爲練船以培後進除咨部查照外
理合附片陳明伏乞

聖鑒謹

奏

同日拜發奉

旨該衙門知道單併發欽此

定購第六號鐵脅輪船礮位片

再第六號鐵脅輪船於上年十月間安上龍骨

經_臣恭摺奏報在案該船係變通從前所造鐵

脅改依外洋三等快船新式製造馬力速率等

項前奏並經聲明嗣因所需鐵料機件寄英購

辦遲遲未來而廠中方在趨造第二三號快船

此項鐵脅工程遂暫從緩現在機件雖尙未到

而鐵料業已陸續到工木料亦經先時購備適

當第二號快船告成之會堪以接續興工惟該

船所需礮位亦應先期定購經_臣於去臘函商

督臣 楊昌濬與德商福克訂立合同向外洋克
虜伯廠定購十二生水師後膛鋼礮四尊架具
全備配各種彈子一千二百顆棕色藥餅一千
二百袋又十五生水師後膛鋼礮三尊架具全
備配各種彈子九百顆棕色藥餅九百袋共配
銅拉火二千二百枝又荷士基五管連珠礮四
尊架具全備配各種彈子四千顆約明限十三
四箇月包運到閩價值並水腳保險等費統共
銀一十二萬一千四十八兩七錢七分應先付
一半交該商作爲定銀其餘一半俟礮件到閩

驗收找給所有第六號鐵脊輪船係專爲閩防
而設此項礮位需用銀兩經與楊昌濬商定卽
就閩省善後局隨時籌撥應付理合附陳伏祈
聖鑒謹

奏

同日拜發奉

旨該衙門知道欽此

舟形委頓廣湖頭卷三十三

製船用欸造冊報銷難拘成例請 飭部立案

摺

奏爲製船用欸造冊報銷難拘成例遞陳實在情形懇

恩飭部立案恭摺仰祈

聖鑒事竊前准戶部咨議覆軍需善後報銷內外辦法摺內擬請光緒八年十二月以前各省未經報銷各案向開單者仍開單向造冊者仍造冊其九年正月以後各欸無論何省何處概令一律造冊報銷不准再有開單等因奉

旨依議欽此欽遵在案查船政從前歷屆報銷均屬
開單良以事爲勦舉器具工作皆耳目所未經
言造船或馬力同而配製不同言蓋廠或丈數
同而間架不同言購器或斤重同而機關體質
不同言辦料或名色同而精麤鉅細不同所有
不能造冊緣由歷屆報銷摺內疊經各前大臣
據情陳奏久在

聖明洞鑒之中茲准前因各省報銷光緒九年以後
一律造冊船政自不能不照新章辦理惟製船
用款非他項可比初次改造細冊實無成例可

循勢難悉協部章又難據初次所造細冊以爲定案責令將來報銷尺寸符合有不得不爲我

皇太后

皇上詳晰陳之者此次戶部新章於機器局專條云船料物件購自外洋並無繩墨可守工部新章於製造洋式物件專條云外洋式樣概爲定例所無是製船用欸之難繩以成例已爲部臣之所深知而工程之瑣勾稽之難前後銷冊之不能較若劃一容亦有未及備悉者夫船式機件新者貴益求新利者貴益求利選料課工固者

貴益求固精者貴益求精當製造之頃既不容
強後符前及造銷之時自無從執前概後工師
洋法料資洋產故同一匠工日辛或至二兩有
奇或僅二錢以內同一料件商販缺則價漲商
販足則價平間有逕由外洋採辦者前後物價
同而前後兌銀之磅價又或不同則前後不能
劃一者此其一然猶曰此特辛工料價之因人
而異因時而異也乃同製一物材木中度則工
省而耗亦省稍不中度斷削求合則工多而耗
亦多銅鐵之質有精麤火耗卽分多寡斧鑿之

鋒有利鈍工作因以參差則前後不能劃一者
又其一然猶曰此特因物料之不同致工耗之
各異也乃有同此料同此器同此工前後工耗
亦終不能同者船機銅鐵巨件動輒萬觔形質
離奇尺寸不容差以半黍和金入冶百數十人
奔走左右一煅而適合者有之再煅三煅而始
合者有之萬觔之鐵火候必以竟日再煅三煅
不特火耗增多卽工煤亦當倍計謂匠有巧拙
則前後均此人也謂事有難易則前後均此物
也而其不同也竟若此則前後不能劃一者又

其一然猶曰此特人事之不齊也廠中工作半資機器機器之動必藉革帶以掣衆輪閩地瀕海燥溼靡常天氣燥則革帶緊而輪轉多天氣溼則革帶鬆而輪轉少天氣過燥則革帶又易斷而輪轉停轉多則工程速轉少則工程緩轉停則工程愈緩緩速繫乎天時而費之繁節視焉則前後不能劃一者又其一夫至天時所限人力已幾爲窳又况一船專營則工費較侈數船並造則工費較約譬諸炊斗米者必不用炊升米者十倍之薪與夫十倍之人力此則又繫

乎經費之充與不充而非盡天時人事之咎矣
凡此數者一有不同卽前後斷難劃一而向所
謂新益求新利益求利固益求固精益求精者
猶不與焉今後凡諸用款改造細冊若必繩以
成例徵特洋法之工洋產之料無從劃一卽中
華工料亦斷難持乾隆嘉慶年間價值以例今
日而將來銷冊必不能與初次所造尺寸符合
又屬不問可知比而同之雖使在事員紳曠厥
專司咸事勾稽猶難強合即能強合終不免於
移甲就乙亦甚非

朝廷實事求是本意也再四籌思維有仰懇

天恩飭部立案今後製船用欵改造細冊仍准隨時
實支實報免以成例相繩庶欵項咸歸據實支
銷而製造亦得益求精密船工幸甚所有製船
用欵造冊報銷難拘成例緣由謹會同南洋大
臣兩江總督臣曾國荃署理福州將軍臣古尼
音布閩浙總督兼管福建巡撫臣楊昌濬合詞
恭摺附驛馳陳伏乞

皇太后

皇上聖鑒訓示謹

奏

光緒十二年七月十五日拜發奉

旨著照所請該部知道欽此

天正十一年

三月十一日

三

修理萬年清輪船動用工料銀數片

再萬年清輪船向係派駐臺灣供差間有船機損蝕回工修繕其修費概由省會善後局造銷
歷辦在案去年十一月間准督辦臺灣防務福建巡撫臣劉銘傳咨稱該船曾在滬尾遭風船縫綻裂全船滲漏船底龍骨船身木脅及輪機鍋爐帆纜器具歷年既久多有損壞請予照修
前來當卽飭廠興修計自去年十一月回工至本年二月工竣覈用工料並另領備用繩索共銀一萬四千九百四十餘兩遵照部定新章應

先行奏咨立案除咨部查照外理合附片陳明
伏乞

聖鑒謹

奏

同日拜發奉

旨該部知道欽此

修理泰安輪船動用工料銀數片

再泰安輪船向駐山東煙臺供差間有船機損蝕回閩修理其修費概由該省造銷歷辦在案去年八月間該船因鍋爐年久朽壞兼以年來海防喫緊時往來於朝鮮煙臺旅順一帶北海風日燥烈波濤險惡致船底綫縫銅皮船面帆纜器具在在鬆裂殘缺來閩稟請大修經山東撫臣咨部立案並咨請照修前來旋准工部來咨以修理該船用過銀數應先行奏咨立案等因查該船自去年九月興修至十二月工竣飭

據各廠開列工料覈計用銀二萬六千四百九十餘兩又修竣啓行時領用煤炭覈共價銀四百九十七兩零均係船政墊支應由山東籌還彙案造銷除咨部查照外理合附陳伏乞

聖鑒謹

奏

同日拜發奉

旨該部知道欽此

洋監督日意格請卹片

再准出使大臣許景澄咨稱據出洋肄業監督日意格胞弟日意言呈稱胞兄日意格由法國水師參將應充中國甯波漢口稅務司因剿髮逆獲勝克復城池身受鎗傷屢次蒙

恩賞給正一品銜黃馬褂花翎一等寶星權授總兵副委出洋採辦船料派充出洋肄業監督上年因驟發舊傷醫治無效於本年正月十六日病故可否照軍營立功後病故例奏請

賜卹等情照錄原呈咨請前來臣查日意格前在浙

江助剿髮匪克復上虞縣城首立戰功經前閩浙督臣左宗棠奏奉

上諭賞加總兵銜欽此嗣充船政正監督經前船政大臣沈葆楨奏請獎勵同治七年二月初二日奉上諭賞加提督銜並賞戴花翎欽此同治十二年船工告成蒙

恩賞加一品銜准穿黃馬褂並

賞給一等寶星光緒二年經前船政大臣吳贊誠奏派會辦出洋肄業監督該洋員於安置生徒一切事宜俱極妥協克收成效該洋員宣力中華二

十餘年始終不懈忠勇可嘉生既疊荷

恩施歿當更邀

曠典應如何從優

賜卹之處惟有仰懇

天恩飭下總理各國事務衙門核議施行除照錄日
意吉原呈咨送軍機處暨總理各國事務衙門
外理合會同北洋大臣直隸總督大學士一等
伯臣李鴻章附片具奏伏乞

聖鑒謹

奏

同日拜發奉

旨該衙門議奏欽此

廠造第三號快船下水並陳現在工程情形摺
奏爲廠造第三號快船下水並現在工程情形恭
摺具陳仰祈

聖鑒事竊

臣

於本年七月十五日業將第一號鏡清

快船試洋各緣由

奏明在案旋飭該船管駕都司何心川於八月初

二日駛赴金陵聽候驗收遣用去後

臣

卽督同

各員紳催趲第三號快船工程嗣據工程處稟
稱該船經已配齊鐵脅封固重舳鐵梁鐵柱以
及牽鉗截堵經已鑲竣船首之銅刀船尾之銅

夾銅套船面之鐵戰杵船旁之鐵耳臺船中船
後之礮路船上之鐵望臺鐵廚房船內之輪機
艙水缸艙並煤炭艙鐵練艙水手艙帆纜艙糧
食艙淡水艙亦已一律竣工現在船身可以下
水下水後則輪機水缸以至桅檣帆纜舵車向
盤抽水機電燈等件便當次第安配齊全臣飭
各廠員紳等覆驗無異因命之日寰泰擇九月
十八日下水屆期臣率員紳致祭各神命工抽
撐拔楔如法午潮正滿船循滑軌而下中流容
與水波不興船身之靈快穩重已可共信查該

船長二十六丈有奇寬三丈六尺喫水深一丈
七尺高三丈四尺全船噸儼計二千二百噸每
噸合中國一千六百八十觔儲煤之艙可積三
百五十噸配新式三汽鼓康邦省煤臥機一副
計實在馬力二千四百匹圓式水缸八箇可出
汽力六十八磅計每時可行水程百里一切制
度與二號鏡清之船相同推陳出新迥非常式
舊製之兵輪可比其工料堅實亦遠過於泰西
所售此皆臣所勘驗而確信之者也辰下嚴催
廠中趨工以期早日蒞事試洋應配大礮魚雷

一俟運到亦即接續安置六號鐵脅船工逐漸趕造至遵

旨試製之鋼甲艦圖式木模亦漸就緒省局撥解之經費四十六萬兩業經陸續到齊臣派工程處

學生魏瀚赴外洋選購鋼甲龍骨及各料件現在龍骨之料已經到工其他鋼料不日亦可運

到十月初旬便當開工起製矣合將寰泰快船下水並廠中工程情形各緣由謹會同南洋大

臣兩江總督臣曾國荃署福州將軍臣古尼音

布聞浙總督兼管福建巡撫臣楊昌濬合詞恭

摺由驛四百里具陳伏乞

皇太后

皇上聖鑒訓示遵行謹

奏

光緒十二年十月初八日拜發奉

旨該衙門知道欽此

添購雷艇配用礮位雷機片

再前署船政大臣張佩綸任內與洋商福克訂立合同向德國佛爾鏗廠定購頭號雙箭魚雷快艇一隻價值並保險運腳各費共規銀五萬七千五百餘兩又定購德國刷士考甫廠燐銅魚雷十具連同做汽機放汽機灌汽機各一具配件齊全價並保險運腳各費共規銀二萬八千餘兩以船政經費支絀督臣楊昌濬允由閩省籌給經張佩綸於十年十二月間

奏明在案及臣莅工署事後查據該洋商以佛爾

鏗廠不能承造此種雷艇因與該洋商重訂詳細合同改向德國挨呂屏什好廠定購其價值各費仍照前約無所增減當以雷艇應配放雷礮筒兩箇蓄汽櫃兩箇放雷壓汽大汽機一副及一切應用傢伙備用各件復與該洋商等補立合同向刷士考甫廠添購價值各費共規銀八千三百餘兩又添購雷艇配用哈乞開司五管連珠礮二尊並彈子等件價值各費共規銀六千三百餘兩咨明督臣統由省局撥給燐銅魚雷十具並各汽機三具去年九月運到適二

屆出洋在德國專習製造魚雷之學生陳才鐳
限滿回華臣因添建廠屋派其督課匠徒細加
修整合攏以備演試如能得法當卽令其購料
倣造魚雷快艇亦於本年八月二十七日由德
國水師兵官駕駛到閩經派魚雷工程處學生
陳才鐳等會同製機工程處學生陳兆翔逐加
勘驗據報艇長四十三法尺闊五法尺船頭喫
水深法尺一尺二寸船尾喫水二尺二寸輪機
水缸各一具馬力一千五百匹船之首段配放
魚雷礮筒二具卧艙糧艙列焉船之中段爲輪

機艙水缸艙水缸艙之左右可儲煤二十噸船面之首尾望臺各一臺上各配哈乞開司連珠礮一尊船齊船艖一切皆以鋼爲之三十早晨復親詣該艇覆驗駛出海口芭蕉五虎以外

臣至媽祖澳白犬洋一帶試其行程速率是日風浪甚大每點鐘實行二十一英海里有八若無風浪之時應可行二十三海里有奇在魚雷艇中尤爲異常快捷所配礮筒二具蓄汽櫃二箇放雷壓汽大汽機一副驗亦靈捷其備用各件不日亦可續到此數項價腳銀兩已由船政墊

支應歸省局撥給報銷至該艇應配駕弁舵水
名額薪糧及廠中修整合攏燐銅魚雷十具匠
徒之賞料件之費亦應由船政隨時墊支由省
局撥給報銷至添建修造魚雷廠屋則應由船
政製船項下支銷除遵照部定新章咨報戶部
外合無仰懇

天恩准予飭部立案所有購辦魚雷快艇及燐銅魚
雷各緣由謹會同南洋大臣兩江總督臣曾國
荃署福州將軍臣古尼音布閩浙總督兼管福
建巡撫臣楊昌濬合詞附片恭陳伏乞

聖鑒訓示謹

奏

同日拜發奉

旨該衙門知道欽此

添蓋廠屋並添製機器動用銀數片

再前准戶部咨奏定外省報銷新章內載各省
設立機器局並閩省船政局如有添購機器經
費若干事前奏明咨部立案事後方准核銷等
因歷經遵辦在案茲據製造工程處學生分省
補用直隸州知州魏瀚等稟稱去年因快船工
作繁興廠屋機器均有不敷拉鐵廠添製拉鐵
碾輪三副計用工料銀一千餘兩輪機廠添製
轉輪軸轂旋機一架計用工料銀二百餘兩小
輪機廠添製掛壁鑽機二架計用工料銀一百

餘兩又因料件繁多就小輪機廠旁添蓋棧房
一座計用工料銀二百餘兩十年七月初三日
馬江之戰拉鐵廠大煙筒被礮倒壞從新砌造
一座計用工料銀一萬一千六百餘兩興造第
六號鐵脅三等快船將舊日船臺重加修理計
用工料銀一千四百餘兩仿製水雷建蓋水雷
廠一座計用工料銀四百餘兩前後兩學堂添
招藝童學舍不敷經於十一年六月間奏明嗣
就學堂隙地添蓋樓屋上下共一百一十八間
計用工料銀七千三百餘兩復設藝圃廣植藝

徒經於十一年十二月間奏明嗣將舊日藝圃屋宇重加修葺計用工料銀六百餘兩船局添設電報經於十一年六月間奏明嗣就署內添蓋電報樓屋一座計用工料銀七百餘兩購製電報應用機器料件計用工價銀六百餘兩船政衙署學堂暨各廠所十一年七月間遭風損壞當經奏明陸續大加修整計用工料銀五千一百餘兩學堂教習賴格羅李家孜來工經於十一年六月間奏明將馬限山舊日洋房二十四間修理以爲該教習等寓所計用工料銀

一千三百餘兩馬江陣亡員弁舵水兵勇前經張佩倫奏明由船政建立昭忠祠茲就馬江山麓舊日洋匠住屋一所修葺改建計用工料銀九百餘兩廠中製船需用煤鐵銅鉛悉以遠購爲艱擬令礦務學生於附近處所探覓礦苗以期自行開採購驗礦鑽地機一副計用價值銀一千八百餘兩後學堂洋教習請購電學氣學重學水學各機件用以兼課藝童計用價值銀六百餘兩十一年六月間奏明購買英商美那二枝半桅舢舨船一號以作練船名曰平遠經

由廠修改各艙添備各件計用工料銀一萬四千七百餘兩以上各欸應歸船政十一年分銷案造報藝新一船馬江戰後沉於林浦嗣經撈起由廠大修計用工料銀一萬三千六百餘兩查此欸係屬船政墊支應歸省局彙銷呈請立案前來經臣覆查無異除咨部查照並飭另行彙案造銷外合將應行照章聲明緣由謹會同南洋大臣兩江總督臣曾國荃署福州將軍臣古尼音布閩浙總督兼管福建巡撫臣楊昌濬合詞附片具陳伏乞

聖鑒謹

奏

同日拜發奉

旨該衙門知道欽此

船政奏議彙編卷三十三終

船政奏議彙編卷三十四目錄

裴蔭森八

請撥欵仿製穹甲快船摺

核定魚雷艇名額薪費並由廠仿造摺

定購外洋大礮請

准支銷立案摺

派員暫行代辦提調片

鋼甲船安上龍骨請俟船成照異常勞績獎勵
摺

船政奏議彙編卷三十四

裴蔭森八

請撥欸仿製穹甲快船摺

奏爲覈計閩廠造船實較外洋所購料堅價廉請
旨飭議撥欸仿製穹甲快船恭摺仰祈

聖鑒事竊臣於今春二月間派令製造工程處學生

分省補用直隸州知州魏瀚出洋選購鋼甲艦
料件業經陸續運工該學生於九月初旬回華
茲據稟稱竊瀚此次三至泰西職司購料志在
採訪新船歷英法德十餘廠較量圖式查探情
形並於曾許兩大臣訂購之四船制度工價考

覈最爲詳悉許大臣訂購之船舩有甲臺有堡
船可載重二千九百噸馬力三千四百匹行可
十五海里應配二十一生大礮二尊十五生大
礮二尊魚雷筊四具價每艘約英金十七萬磅
合銀七十五萬兩礮械保運各費在外曾大臣
訂購之船無甲無堡船可載重二千三百噸馬
力五千五百匹行可十八海里應配之礮械雷
筊與許大臣之船相若價每艘英金十四萬二
千五百磅合銀六十三萬兩礮械保運各費在
外按兩大臣所購四船均勝於濟遠誠爲巡海

利器而曾大臣之船艙有穹甲厚處四寸薄處
二寸半在水上半在水下製法尤遠勝於濟遠
蓋濟遠穹甲全在水下若穹上中礮水浸其上
船將不穩又查法蘭西今年七月開製穹甲一
船長英尺三十丈寬三丈有八寸中匡喫水十
六尺六寸可載重一千八百噸馬力六千零六
十匹穹甲厚四十密里合英尺計一寸五分行
十九海里半應配十五生大礮四尊魚雷筒四
具價約銀五十六萬兩礮械保運各費在外此
船亦爲中國水師合用之式以上三種之船經

駛回華保運各費每船又可省數萬兩竊維自製較之外購每船所省不輕際此經費支絀之時與其利益於人何如藝精於己之爲得乎查日本近在英法兩國定購十八海里穹甲快船各兩號式與曾大臣所辦相同而船較大又在本國仿製四號是日本水師一二年後卽有十號八號十八海里之穹甲快船中國整頓海防更宜早籌多製現在閩廠承造南洋之快船業經蒞事實泰將次試洋廠中工程祇有遵

旨試辦之銅甲一艦及第六號鐵脅一船耳儻再添

製十八九海里快船一二隻於船工不無裨益
如製不合法瀚與在工學生甘任其咎等語稟
請奏咨籌款添製前來臣查該學生等於製船
工程閱歷頗深前爲南洋協造之開濟快船視
所購之南琛南瑞規制相同靈快相似而堅實
則過之本年告成之鏡清寶泰兩艘其製法之
精密船機之穩快又遠過於開濟則該學生等
於製造確有把握實可共驗而深信之刻下鋼
甲船料購自外洋者陸續到工十月間即可開
辦如趁此時添機多製則料以分用而益省工

因合作而速成工程所裨實非淺鮮惟辰下船政經費萬難闔海關四成六成兩項歲應六七十萬撥解不及其半藩司應解之養船經費遞年皆解濟不敷今年尙未解到前大臣張佩綸疏請奉

准九船薪糧十四萬按年仍解以爲製船經費者去年僅解六萬本年則絲毫未解在省局雖亦因經費支絀非不關顧鉅工無如船工以經費爲衡經費充則易於起色船政疊奉

指撥之款向使按年解清不至積欠二百餘萬

添機拓廠其成效必有可觀年來猶恃南洋兩快船之欸全數解齊稍資挹注而工程便覺振作畧展其益求精密之能此臣去年所以有催解關欸並各省協欸之請而不敢稍安緘默者也今春臣赴金陵晤商南洋大臣曾國荃初猶欲造鋼甲兩艘嗣因南洋海防經費二百萬已提歸海軍衙門其養船之費方慮不給不復能兼顧造船矣茲據該學生魏瀚所稟如由閩廠仿造穹甲快船每船必較外購者節省十數萬經臣再三考覈均係實在情形並無一毫虛飾

既不糜夫

國帑且有益於船工

臣何敢壅於上

聞稍負

朝廷整頓海防垂顧船工之至意合無仰懇

恩旨飭交海軍衙門籌議由南北洋海防經費項下撥款數十萬發交閩廠仿製穹甲快船一號歸北洋海軍差遣俟告成驗收後再行撥款續造以壯海軍之勢所有核計閩廠造船實較外購料堅價廉請

旨飭議撥款仿製穹甲快船各緣由謹會同南洋大

臣兩江總督臣曾國荃署福州將軍臣古尼音
布聞浙總督兼管福建巡撫臣楊昌濬合詞恭
摺由驛馳陳伏乞

皇太后

皇上聖鑒訓示施行謹

奏

光緒十二年十月初八日拜發奉

旨該衙門議奏欽此

核定魚雷艇名額薪費並擬由廠仿造摺

奏爲閩口新購魚雷艇覈定名額薪糧公費並擬由廠仿造數艇恭摺具陳仰祈

聖鑒事竊

臣查前署船政大臣張佩綸任內以魚雷

快艇爲水師必不可少之利器

奏請定購一船到工後鑲合試行並擬如式仿造數艇在船政對渡之烏龍江隨時訓練奉

准在案本年八月二十七日德國挨呂屏什好廠如約造竣由水師兵官駕駛到閩經派工程處學生逐加勘驗臣復親出芭蕉口外試其行程

速率均屬完固靈快此項價腳銀兩已由船政
墊支應歸省局撥給報銷至該艇應配駕弁舵
水名額薪糧公費及廠中修整合攏魚雷十具
各工料亦應由船政隨時墊發歸省局撥給報
銷臣經於十月初八日附片

奏明所有該艇駕駛訓練事宜臣查前船政駕駛

學生軍功陳應濂曾充廣東震威練船管駕兼
充魚雷學堂教習年強技熟可以勝任隨即派
令管駕該艇係按德國頭等新式制度較之津
粵所購者船身加大而行亦較速因命之曰福

龍應配各執事名額及月支薪費銀兩據該管
駕參照津粵章程稟請前來經臣再三酌量核
減尙無浮額濫費當卽咨明省局查照開支一
俟廠中所購魚雷配合完妥便令駛赴烏龍江
驗試訓練惟閩口僅此一艇未免單弱應請

准照張佩綸原議由閩浙督臣飭局籌撥經費發

交臣廠仿造數艇俾成一隊以壯聲威所有福

龍魚雷艇員弁名額薪費銀數除咨海軍衙門
總理衙門及戶兵兩部查照外合行開單恭呈

御覽謹會同南洋大臣兩江總督臣曾國荃署福州

將軍臣古尼音布閩浙總督兼管福建巡撫臣

楊昌濬恭摺由驛馳陳伏乞

皇太后

皇上聖鑒訓示謹

奏

光緒十二年十一月初三日拜發奉

旨該衙門知道單併發欽此

謹將福龍魚雷艇官弁舵水名額月支薪費開
具清單恭呈

御覽

計開

管駕官兼充教習一員月支銀八十兩

大副一名月支銀三十六兩

二副一名月支銀二十四兩

水手頭目一名月支銀一十八兩

舵工三名月各支銀一十五兩共銀四十五兩

頭等水手八名月各支銀一十二兩共銀九十

六兩

二等水手八名月各支銀一十兩共銀八十兩

正管輪一名月支銀四十六兩

副管輪二名月各支銀三十兩共銀六十兩

管油三名月各支銀一十六兩共銀四十八兩

頭等升火二名月各支銀一十四兩共銀二十

八兩

二等升火二名月各支銀一十二兩共銀二十

四兩

煤夫二名月各支銀一十兩共銀二十兩

厨夫一名月支銀五兩

伙夫二名月各支銀四兩共銀八兩

辦公經費月支銀七十兩

以上共三十八員名大建月支銀六百八十八兩小建月支銀六百六十五兩六分六釐七毫

定購外洋大礮請

准支銷立案片

再臣於本年八月初六日准戶部咨開七月十一日遵

旨議奏閩浙總督兼福建巡撫楊昌濬奏臺事需款甚急籌撥維艱一摺內載以後各省及統兵大臣如有購買外洋船械鎗礮等事務於未經定議之先咨報部中暨海軍衙門俟核准請

旨之後該省再與洋人定議以免失信遠人之虞如有自行定議者卽令該省自行籌款辦理不准

開支正項以杜冒濫而嚴限制等因

臣

按部臣

所議原爲慎重軍火限制欸項起見船政自應

一律遵照辦理

臣

查船政八月奉到部文之後

尙無定購鎗礮之議惟二月間委派工程處學

生魏瀚赴外洋採購鋼甲船料件時曾囑其就

洋順購二十六生口徑水師後膛鋼礮一尊以

備鋼甲船之用二十一生口徑陸軍後膛鋼礮

一尊以備馬尾山護廠礮臺之用嗣據該學生

稟稱該礮兩尊業於六月間在洋向德國克虜

卜礮廠定辦約明二十六生口徑水師後膛鋼

礮一尊重四萬六千五百觔長英尺三十尺礮架零件全備實價德銀二十一萬九千九百六十九馬克四十分約合中國銀四萬七千七百九十兩二十一生口徑陸軍後膛鋼礮一尊重二萬二千六百觔長英尺二十四尺礮架零件全備實價德銀八萬九千一百五十馬克約合中國銀一萬九千三百六十八兩共先付定銀三萬三千五百九十兩其餘銀兩俟礮位製便再行找付其二十六生大礮應配鋼開花子三十顆生鐵開花子七十顆實價德銀一萬九千

六百五十五馬克四十分約合中國銀四千二百七十兩外加保運到閩等費英銀一千四百磅約合中國銀六千一百七十五兩至二十一
生大礮應配藥彈查省局存儲尙多應可挪用不必另購臣經細加覆核所有價腳均屬廉實並無浮濫准予照購在案此項兩尊大礮係配鋼甲船及護廠礮臺之需容臣籌定配用之時續將詳細情由分別具報所有購製該礮彈實情係該學生在洋六月間議定計在船政未奉部文之先此項價腳銀兩合無仰懇

天恩准予開支飭部立案除咨海軍衙門及戶兵兩部外合將未奉部文之先在洋定議礮彈價腳數目各緣由謹會同南洋大臣兩江總督臣曾國荃署福州將軍臣古尼音布閩浙總督兼管福建巡撫臣楊昌濬附片陳明伏乞聖鑒訓示謹

奏

同日拜發奉

旨著照所請該衙門知道欽此

派員暫行代辦提調片

再船政提調分省補用道吳仲翔近因舉發濕熱舊疾一時不克到工續請銷差自應准如所請俾得安心調理俟病痊日再行給咨送部引見所有船政提調事務應由臣遴員

奏派接充以昭慎重惟提調有表率員紳稽查工程之責一時慎選尙難其人而事體殷繁又未便久令懸曠自應先行揀員代辦藉專責成查有在籍四品頂戴升用同知曾任浙江餘杭縣知縣王崧辰老成練達熟悉情形堪以暫行代

辦除檄飭外所有提調道員吳仲翔因病銷差
並委員代辦緣由謹會同署理福州將軍臣古
尼音布闡浙總督兼管福建巡撫臣楊昌濬附
片陳明伏乞

聖鑒謹

奏

同日拜發奉

旨知道了欽此

鋼甲船安上龍骨請俟船成照異常勞績獎勵

摺

奏爲試造雙機鋼甲兵船安上龍骨並懇俟全船
告成

恩准將監造各員紳按照異常勞績擇尤獎勵以資
激勸會摺籲陳仰祈

聖鑒事竊臣於上年十一月奏請試造雙機鋼甲兵
船荷蒙

俞允在案隨於本年二月間飭出洋學生四品銜分
省補用直隸州知州魏瀚前赴外洋購辦船身

鋼料運帶回閩剋日興工併力趨造茲據代理
提調知縣王崧辰稟請誡吉安上龍骨前來爰
擇本月十二日率同在事員紳工匠親捧龍骨
安置船臺其船身鋼費業已陸續拘製輪機亦
已先後製模發廠開鑄所有外洋定購之船身
鋼板並輪機水缸鋼料等件今冬來春漸次到
工臣卽策勵匠徒加緊興作計至明年冬間可
以全船下水臣維泰西輪船之製由木質而鐵
脅而快船其堅韌至於鋼甲而極輪機之製由
立機而臥機而康邦其靈巧至於三脫汽而極

洋人負其殊能頗爲矜秘此番閩廠仿造該監造等絕無師授竟能獨運精思匯集新法繪算圖式累黍無差其苦心孤詣直湊單微卽外國師匠入廠游觀莫不詫爲奇能動色相告儻能廓充廠地寬籌經費多製數艘以備海上緩急之用匪特可固各口之藩籬亦可隱懾強鄰之心志

國家設立船政垂二十餘年糜費不爲不鉅今茲仿製鋼甲不用一洋員洋匠脫手自造按圖以成範課實以求精是可知其確有把握而不愧

升平通志卷之三十一
三
奇才異能之選矣。臣昕夕莅廠，逐加稽覈，親見該監造等思慮周詳，締造艱苦，實非尋常勞績可比。日後工竣試洋，仍當駛赴天津，由北洋大臣派員勘驗。如果製造合法，可否仰懇

天恩，准將監造各員紳按照異常勞績，擇尤獎勵，以資激勸，先行。

飭部立案，出自逾格。

鴻慈理合會同署福州將軍臣古尼音布、閩浙總督

兼管福建巡撫臣楊昌濬，恭摺由驛四百里具

陳伏乞

皇太后

皇上聖鑒訓示祇遵謹

奏

光緒十二年十一月十六日拜發奉

旨著俟工竣試驗後如果製造得宜准照所請擇尤
保獎該部知道欽此

船政奏議彙編卷三十四終

船政奏議彙編卷三十五目錄

裴蔭森九

覈定魚雷廠名額薪工懇

恩飭部立案摺

附清單

閩厦兩口輪船薪費名額請

飭部改照舊章立案摺

補派後學堂委員片

出洋藝成學生回華委派差事給薪片

監造快船委員學生加給薪水仍請准銷片

船政添築護廠礮臺經費擬從製船項下支銷

懇請

飭部立案摺

鏡清快船業經南洋驗收所有在事出力員紳
遵

旨擇尤保獎摺

總司製造各學生請照異常勞績獎勵片

覆陳戶部刪減奏銷各欸仍懇

恩准照銷摺

南洋監造快船員生薪水懇

准照支並專案具報摺

補派後學堂委員改爲留工候差片

船政奏議彙編卷三十五

裴蔭森九

覈定魚雷廠名額薪工懇

恩飭部立案摺

奏爲覈定魚雷廠名額薪工謹繕清單恭摺仰祈
聖鑒事竊查前署船政大臣張佩綸訂購德國刷士
考甫廠燐銅魚雷十具連同做汽機放汽機灌
氣機各一具於前年九月運到閩口經臣蔭森
添建廠屋派令出洋回華學生陳才鐳修整合
攏於去年十月初八日附片

奏明在案臣等深維魚雷爲海防制勝利器必須

中國能自製造始足以張我軍威陳才端曾在
德國專習製造魚雷於魚雷工程確能深窺機
鍵究其精微自應專設廠所飭其招集匠徒於
修整之餘兼課製造數月以來鑲配合蘊深中
肯綮從此因熟生巧當能專門製造爲

國家備防禦之資惟此項魚雷係爲閩口海防而
備其添建廠屋購置機器兩欸經費擬由船政
製船項下支銷此外如修整魚雷所需料件以
及魚雷廠月支薪工等費統歸福建善後局由
海防項下撥給報銷茲據學生陳才端將去年

六月初一日起該廠興工額數支數參照船政各廠章程稟請覈定前來臣等再三酌量裁減尙無浮額濫支等情相應開列清單恭呈

御覽懇

恩准予飭部立案儻將來開製魚雷工程推廣尙須添派匠徒添購料件之處再由臣等隨時據實奏報除咨部查照外所有臣等覈定魚雷廠名額薪工緣由謹開單合詞會同署福州將軍臣古尼音布恭摺由驛馳陳伏乞

皇太后

皇上聖鑒訓示再此摺係臣蔭森主稿合併聲明謹

奏

光緒十三年三月十二日拜發奉

硃批該部知道單併發欽此

謹將新設魚雷廠監工教習匠徒書吏人等額
數支數開具清單恭呈

御覽

謹開

監造出洋學成回華學生一員月支薪水銀五
十兩

該學生前在德國學習製配魚雷藝成回華
派往北洋候遣嗣因閩省定購魚雷到工復
由北洋咨調回閩該學生於十一年六月回
工其時魚雷廠屋始行建蓋卽派該生監造

布置一切月先支薪水銀三十二兩迨十二年五月廠屋告成招集匠徒人等於六月初一日興工該學生月始起支五十兩薪水利合聲明

教習演放學生二員月各支薪水銀二十二兩
匠首一名月支工食銀一十八兩

又一名已向北洋咨調尙未到工俟其到工酌定工食若干再行咨部立案

散匠一名月支工食銀一十兩八錢

又四名各月支工食銀六兩六錢

又二名各月支工食銀六兩

藝徒二十一名日各支工食銀七分五釐月各支銀二兩二錢五分

該藝徒等均係新招入廠學習照船政新定藝徒章程各日支工食銀七分五釐俟技藝稍精隨時酌量加給加至一錢九分爲度其年節假期亦照船政藝徒章程均行扣給理合聲明

小工十五名各月支工食銀四兩二錢

藝徒伙夫二名各月支工伙銀三兩

舟一ノキヨクシヨク
名二二二二

繕書一名月支工伙銀四兩

紙張月支銀五錢

四

閩厦兩口輪船薪費名額請

飭部改照舊章立案摺

奏爲閩厦兩口輪船名額薪費仍請改照舊章恭摺具陳仰祈

聖鑒事竊閩廠輪船各項名額薪糧以及公費一切皆經前總理船政沈葆楨按照船身大小分別兵輪商輪酌定

奏明在案嗣於光緒十年二月二十八日復經前總理船政何如璋重爲

奏定將名額薪糧酌核裁減並將原包公費一欸

廈兩口只餘藝新琛航二船該二船於奉公往來香滬臺廈之餘尤須時時出口巡緝若以行駛點鐘核計公費誠不免溢出原包數目之外現在南北洋以及粵洋浙洋臺洋各輪船均係按照舊章包定公費閩廈兩口事同一律合無仰懇

天恩准將藝新琛航二船改復沈葆楨原定公費數目按月照給至名額薪糧各項沈葆楨開局之初原按船身大小酌中核定本無浮濫等弊自應一體規復舊章以期畫一如蒙

俞允應請

飭部改照舊章立案藝新係五十匹馬力兵船琛航
係一百五十匹馬力商船原定名額薪費數目
部中均有成案可稽無庸另繕清單除咨部查
照外所有徵臣請將閩厦兩口輪船薪費名額
改照舊章緣由謹會同署福州將軍臣古尼音
布閩浙總督兼管福建巡撫事臣楊昌濬恭摺
馳陳伏乞

皇太后

皇上聖鑒訓示謹

奏

光緒十三年三月十二日拜發奉

硃批該部議奏欽此

1758

...

1758

補派後學堂委員片

再竊准戶部咨開議覆船政員紳薪水懇准照數支銷摺內聲稱嗣後該廠所用員紳名數亦卽按照單開之數作爲定額不得率行添派等語於光緒十二年五月十九日具奏奉

旨依議欽此欽遵移咨前來臣謹查船政各廠所額設員紳經歷任各大臣斟酌盡善並無冗員間遇廠工稍鬆就中懸曠數員或以一廠兼二廠之事或以一人兼二人之責誠以

國家帑項絲毫必惜有可撙節之處無不力求撙

節辰下廠工尙未繁興所有久經懸曠廠員自應暫照部章不復添派惟臣原奏單內後學堂兼管輪學堂額設四員懸曠二員此二員者非久懸未補之缺因其時考覈裁撤郎中梁佟年訓導梁鳳翔所遺之員缺也學堂爲人才所從出實船政根本該兩堂學生百二十有八人管理者於支放贍養飯食之外凡課督學業稽查出入所以防閑誘掖於無形者以四員之耳目精神尙恐其日不暇給若更誤會部章以爲懸曠二員不復派補該兩堂僅設二員惜微費以

誤要圖臣雖至愚斷斷不敢出此故於梁佟年

等撤差後以遴選難乎其人暫派他廠員紳兼

攝以承其乏又以廠員兼攝照料難周於去年

十月間添派刑部主事曾福謙月支薪水銀四

十兩十一月間添派候選直隸州知州劉宗駿

月支薪水銀四十兩會同管理始臻妥協臣因

公起見斷不敢糜費以濫用冗員惟有仰懇

天恩俯念該項員缺本非懸曠不在部議不得添派

之列

准予派補以肩重任除咨部查照外所有後學堂兼

管輪學堂仍照額設四員管理各緣由謹合詞
附片陳明伏乞

聖鑒訓示謹

奏

同日拜發奉

硃批戶部議奏欽此

出洋藝成學生回華委派差事給薪片

再查出洋藝成學生或回華供差或留洋監製
皆在

奏定考覈員紳之後未曾咨部立案者計有陳林
璋黃庭王迴瀾王福昌鄭誠李芳榮六員陳林
璋於六年六月回華曾充閩廠製船副監工旋
調赴浙江山東兩省辦理機器局事務十二年
五月由山東撫臣咨送回工仍派充會辦製船
監工月給薪銀五十兩黃庭於十二年二月回
華派充前學堂洋文教習月給薪銀四十兩王

迴瀾於十二年二月回華曾充前學堂洋文教
習旋經調赴臺灣遣用十二月由臺回工派辦
繙譯事務月給薪銀三十六兩王福昌於十一
年十一月回華調赴廣東遣用十二年六月咨
回工次派辦繙譯事務月給薪銀三十六兩鄭
誠於七年八月派隨駐美使臣鄭藻如在洋辦
理繙譯十二年三月回華仍派辦繙譯事務月
給薪銀三十六兩李芳榮出洋藝成後尙未回
華經留洋辦理參贊官署繙譯十二年七月起
復派在洋監造錫甲月給薪銀七十二兩津貼

公費英金三十磅該學生等均屬

國家造就成材足資器使自未便置之閒散荒棄

前功經臣前後委派差事合無仰懇

天恩准予飭部立案謹附片陳明伏乞

聖鑒謹

奏

同日拜發奉

硃批該部知道欽此

監造快船委員學生加給薪水仍請准銷片

再臣准戶部咨開船政光緒九年支用各款送

部立案冊內有南洋監造委員薪水並加給學生薪水查上案銷冊無此款項此次亦未據該大臣奏報至委員月支薪水前據該大臣於釐定案內聲稱不得過五十兩之數何以監造委員每月竟支銀一百三十兩之多應令該大臣將派委監造員名及一切詳細緣由補行奏報等因查閩廠承造南洋快船始於光緒八年十一月經前兩江督臣左宗棠札派熟習機器由

製造學生出身之布政司理問汪喬年駐工監
造月支薪水銀一百兩公費銀三十兩一切該
員應用之書役紙張等費均在其內又經提調
道員呂耀斗以南洋船隻係另款工程先後稟
請兩江督臣札委在工藝成回華學生魏瀚吳
德章李壽田楊廉臣等專司其事一切工料歸
其調度考覈迨十年間德國監造鐵艦學生陳
兆翔鄭清濂回華復經前船政大臣張佩綸札
委會同趨造該學生等均於船局原薪之外月
各加銀五十兩由派委之日起支並先後咨明

兩江督臣在於南洋經費項下開支嗣因兩江

督臣曾國荃來咨以南洋快船工料既歸船政

造銷所有監造等員薪水亦統歸船政造報以

免兩歧自應將此項薪水併入支用冊內咨部

立案至臣釐定員紳薪水案內所稱薪水不得

過五十兩之數者第指未經出洋各廠所員紳

而言該學生等藝精製造自應稍加優異以勵

其才且查左宗棠奏定藝局章程單內子弟學

成監造者卽令作監工其薪水照外國監工辛

工銀數發給原所以開風氣而獎異能也近來

閩廠製造均係出洋學成回華學生核其所給
薪水合原薪加給兩項尙不及當日洋員薪水
之半茲准部臣咨令補行奏報相應請

旨飭部立案准銷除咨覆戶部外謹會同南洋大臣

兩江總督臣

曾國荃署福州將軍臣

古尼音布

閩浙總督兼管福建巡撫事臣

臣

楊昌濬附片陳

明伏乞

聖鑒施行謹

奏

同日拜發奉

硃批戶部知道欽此

船政添築護廠礮臺經費擬從製船項下支銷
懇請

飭部立案摺

奏爲船政添築護廠礮臺經費擬從製船項下支
銷懇請

飭部立案恭摺具陳仰祈

聖鑒事竊查閩口自芭蕉五虎而入疊鎖重關本屬
自然天險船廠地據羅星塔上游馬限山屹立
其旁形勢最爲扼要光緒十年七月間馬江之
役法人鐵艦艱於涉淺皆停泊羅星塔下其礮

彈縱猛烈異常終不能越馬限山而過船隴之
前小船雖能駛進然船小則礮微其力亦不足
以轟廠屋是以弭首帖耳匆匆出長門而去使
當日馬限山早設礮臺則近可守而遠可攻不
特敵人不敢逞其先發之狡謀方其連檣銜尾
而來已足以一礮摧其兇鋒其理勢固確有可
信也既戰之後前署大臣張佩綸愆後懲前思
爲亡羊補牢之計由是察勘地勢分建礮臺馬
限山兩座中岐山一座船隴旁臨江一座維時
敵船尙游弋於白犬洋媽祖澳之間既無良工

可集亦無巨礮可資草草經營原爲急就權宜之策臣於是年冬間奉

命署理船政深維守廠之道守口爲先與其臨事禦之於廠前不如先事扼之於口外旣商同督臣

於長門以外堅築礮臺密布水雷以阻塞壺江港路而內顧船廠露處江干僅恃張佩綸新造之礮臺其孤危誠爲可慮夫常人家有餘貲且汲汲然嚴鎖鑰厚垣墉以防暴客况船廠費數百萬之金錢經二十年之締造爲島族素所垂涎四面儻無堅實礮臺連環保衛則慢藏誨盜

其何以杜窺伺而遏戎心此護廠礮臺所宜亟
謀改築也因就馬限山前坡張佩綸原築礮臺
基址開廣挖深用鐵鈔木平鋪七層內嵌螺絲
巨釘填以三合土後面環掘避礮之洞俾守臺
兵勇得以潛藏上安二十一生口徑克鹿卜後
膛巨礮一尊左右分置安蒙士唐後膛礮十五
生者二尊又於馬限山中開新築礮臺一座先
從廠中運置十五生克鹿卜後膛礮二尊仍擬
添購二十四生口徑巨礮一尊下設卡樓酌移
兵勇駐之以防羅星塔後小港划船之登岸其

馬限山後路礮臺亦仍張佩綸原址鳩工庀材
再行堅築先撥運廠中十五生安蒙土唐後膛
礮二尊亦擬添購二十一生口徑巨礮一尊安
置其中犄角之勢旣成吞噬之謀自戢庶幾綢
繆未雨思患豫防以冀仰副

聖主綏靖巖疆慎重海防之至意至張佩綸前築礮
臺其欵項係由船政墊給省局經費支絀迄今
尙未解還臣思礮臺雖專固船政之藩籬亦兼
扼省垣之門戶事屬一家何分畛域此次建築
礮臺用欵擬徑從製船經費項下開支應請

飭部立案以省周折所有船政添築護廠礮臺經費擬從製船項下支銷緣由謹會同署福州將軍

臣古尼音布閩浙總督兼管福建巡撫事

臣楊

昌濬合詞恭摺由驛具陳伏乞

皇太后

皇上聖鑒訓示謹

奏

光緒十三年四月初九日拜發奉

硃批該衙門議奏欽此

鏡清快船業經南洋驗收所有在事出力員紳

遵

旨擇尤請獎摺

奏爲鏡清快船業經南洋驗收所有在事出力員

紳人等遵

旨擇尤請獎繕具清單恭摺仰祈

聖鑒事竊臣於十一年十二月初二日

奏報鏡清快船下水並請擇尤獎勵一摺奉

旨此項輪船著俟試洋後如果駕駛得力毫無流弊
再將出力人員擇尤請獎欽此復於去年七月十

二日

奏報該船試洋赴甯摺內更申前請奉

旨著照所請該部知道欽此欽遵各在案嗣准南洋大臣曾國荃咨稱驗得該船機器精良行駛迅速有駕於各船之上洵稱靈快出自中國放手自造實爲近今所僅見等語咨復前來臣查船政邇年以來製造之精不亞於外洋工程之大

有倍於曩昔昔者匠作悉藉洋員今則尙象考工華人能集其事也昔者機器購由外國今則繪圖模式廠所各擅其能也昔者船皆木質器

盡立機馬力不過百五十匹今則由木質而鐵脅而快船由立機而卧機而康邦其馬力且由七百五十匹推而大至二千四百匹也藝益精則功益懋時愈久則勞愈深溯自光緒五年間鐵脅告成經前總理船政大臣吳贊誠

奏獎以後員紳之殫勤匠徒之勞瘁與夫將弁書吏之辛苦則又時更八年船成六號也在事者櫛沐風雨宣力積年不能不資以鼓舞而在臣考覈有素尤不敢稍涉冒濫之愆旣蒙

天恩鑒及微勞疊

准保獎自應擇其尤爲出力者分繕清單加具考語

恭呈

御覽
籲候

鴻施除將工程處員紳擬作異常勞績另片請獎並
將出力稍次者咨部獎敘外所有微臣遵

旨擇尤請獎緣由謹會同南洋大臣兩江總督臣曾

國荃署福州將軍臣古尼音布閩浙總督兼管

福建巡撫事臣楊昌濬合詞恭摺附驛具陳伏

乞

皇太后

皇上聖鑒訓示再此項勞績係在海軍衙門議定保
獎章程以前奉

旨俞允在先合併聲明謹

奏

光緒十三年四月初九日拜發奉

硃批該衙門議奏單三件片二件併發欽此

總司製造各學生請照異常勞績獎勵片

再閩廠代造南洋快船三艘其總司製造之四品銜分發省分儘先補用直隸州知州魏瀚花翎總兵銜留閩儘先補用參將陳兆翺花翎副將銜留閩儘先補用遊擊鄭清濂都司銜留閩儘先補用守備陳林璋六品銜不論雙單月遇缺儘先選用鹽大使吳德章雙月選用縣丞李壽田六品銜儘先選用縣丞魏暹縣丞職銜楊廉臣皆工程處曾經出洋之學生其監視船工之雙月選用布政司理問汪喬年則委自南洋

亦係學堂學生查船政仿製兵輪其始皆資洋匠嗣由吳德章等自出心裁造成藝新一艘而超武等船繼之製造乃以有成然此特尋常輪船耳洋人之性恥襲故常力求新異其規爲快船也雖承輪船之餘沫已開鋼甲之先聲欲學鋼甲而不能造快船是猶循斷港支流而欲抵海也此次三號快船之製華匠旣莫名其竅要洋匠復甚秘其師傳該學生等敢毅然承辦者緣出洋日久於泰西造船各廠皆悉心考求得其要領而復運以穎異之心思持以精專之詣

力故能神明規矩屹然成防海之巨觀臣昕夕
在廠親見該學生等索隱鈎深困心衡慮或一
圖而屢易其稿或一器而屢改其模或於獨悟
而戛戛生新或於會商而心心相印寒暑無間
寢饋胥忘厯四五年如一日夫海上爭衡全憑
利艦而船非自製終苦良窳莫辨緩急難資閩
廠設立學堂學製造者先後奚啻數百人而心
領神會曲鬯旁通亦僅此數人無愧瑰奇之選
學者如牛毛成者如麟角呈材蓋若斯之難也
國家方廣求諳習洋務之人儻從而激勵裁成之

於戰艦槍礮一途必能殫竭血誠力圖報效該
學生等積年辛苦臣不敢沒其微勞可否仰懇
天恩按照異常勞績魏瀚以知府仍分發省分儘先
補用陳兆翺以副將仍留閩儘先補用鄭清濂
以參將仍留閩儘先補用陳林璋以都司仍留
閩儘先補用吳德章李壽田魏暹三員均以知
縣不論雙單月遇缺儘先選用楊廉臣以縣丞
不論雙單月遇缺儘先選用汪喬年以知州不
論雙單月遇缺儘先選用之處出自逾格

鴻施謹合詞附片具陳伏乞

聖鑒訓示遵行謹

奏

同日拜發奉

硃批覽欽此

船工員弁積勞病故請卹片

再臣查船政歷年在工員弁積勞病故者計有應襲一等輕車都尉舉人沈瑋慶工部員外郎林洄淑縣丞林憲曾陳桂從九品鍾飛鵠林寶琛葉捷魁附生于成泰副將銜張清標補用遊擊都司繆承勳守備陳清福楊嘉樹千總郭瑞珪周泰和陳玉春等十五員或派稽查或司采辦或肩廠務或任考工以及回華藝徒水師員弁並書吏人等均係積年出力在工病故微勞不沒優卹宜加茲據代理提調知縣王崧辰轉

據各該故員家屬等稟彙請前來臣查光緒元年船工告成案內所有在工病故人員經前大臣沈葆楨請卹有案此次事同一律相應援案彙請合無仰懇

天恩准將沈瑋慶等十五員名

飭部均照軍營立功後病故例從優議卹以昭激勸而慰幽魂謹開單合詞附片陳明伏乞

聖鑒訓示謹

奏

同日拜發

硃批覽欽此

覆陳戶部刪減奏銷各欸仍懇

恩准照銷摺

奏爲船政奏銷經戶部刪減各欸據實覆陳仰懇
天恩仍准如數支銷恭摺仰祈

聖鑒事竊准戶部咨開本部具奏船政登覆光緒六
七八等三年閩廠開支員紳薪水等欸分別准
駁行查一摺光緒十二年十月二十一日具奏
本日奉

旨依議欽此欽遵鈔錄原奏恭錄

諭旨移咨前來足見部臣慎重度支減一分支銷卽

多一分

國帑

臣

雖至愚敢不深體此意且此項用款非

臣

任內之事

臣

亦無所用其回護如果核刪各款

畧可遵辦斷不敢曉曉置辯瀆陳於

君父之前惟檢查案卷體察情事實屬無可刪減謹

逐款開列恭呈

御鑒

一原奏稱支給員弁薪水項下冊造總監工一
員檢查該大臣奏報裁留員紳清單內開自出
洋學成各生回華設立工程處總核工料久懸

未補今冊造六年分回華生徒已分派監工各
差則是總核工料者已不乏人何以仍設總監
工一員開支薪水殊與清單所載不符應將支
過銀四百五十三兩三錢三分三釐三毫如數
刪除追繳等語臣謹查船政開辦之始卽設總
監工一員以總核工料光緒五年十一月至六
年十月出洋學生先後藝成回華設立工程處
其總監工一員原可裁撤因其時各學生年齒
尙穉驟膺重任或恐號召不靈故暫緩數時以
資董率是年冬間各學生稍經歷練駕馭有方

總監工道員王葆辰卽於十二月間自行辭退
經前督臣何璟於光緒七年二月間查明船政
局務據實覆陳摺內奏明有案厥後總監工一
員卽作爲懸缺歷七八九三年不復派員接充
惟光緒十年間因提調道員呂耀斗於正月間
銷差前督辦船政何如璋未派提調暫派道員
周懋琦代辦總監工月支薪水銀一百五十兩
名爲代辦總監工實則代辦提調嗣經前署理
船政大臣張佩綸附片奏派周懋琦接充提調
卽於十月間起支提調薪水其總監工仍作爲

懸缺是光緒六年十二月十六以前之總監工
因恐工程處學生未嫻調度暫緩裁撤十六以
後總監工一員實久懸未補與臣裁留員紳清
單所載非有不符所有冊支光緒六年正月初
一日起至十二月十五日止總監工薪水銀兩
合無仰懇

天恩仍准如數支銷以昭覈實

一原奏稱冊造肄業藝成回華生徒薪水項下
查各生徒自派差之日支給薪水並因派辦正
監工等差從優支給核與錄送章程內所載子

弟學成監造者卽令作監工薪水照外國監工發給等語尙屬相符亦與洋人支欸有減至楊廉臣李壽田吳德章等三名已月支銀五十七兩有奇揆諸計功授食之義已屬從優均不應復有加給且李壽田吳德章二名業因監造得力派辦監工加至前數尤不應再行加給漫無限制所有冊造楊廉臣等三名因調度有方各加銀十四兩四錢均應刪除仍令嗣後遵照此次酌定銀數不得任意加增致涉冒濫計此欸刪除番折庫平銀四百二十六兩七錢六分三

釐零七絲如數追繳等語 臣謹查前此廠中監
工洋員月薪多者四百兩少者亦不下二百兩
各該生等藝成回華均得有堪爲總監工憑據
當差委之始本應卽照奏定章程給與洋員支
數緣該生等年齒尙穉技藝雖精或恐董率未
能勝任故雖假以名號猶靳其廩糈當諭以辦
有成效隨時加給該生等均踴躍任事歷造各
號快船不辭勞苦是以疊次量加藉資鼓舞今
部臣以履行加給漫無限制遽令刪除不知該
生等雖經疊次遞加較之原定章程所支尙未

及半合無仰懇

天恩俯准將楊廉臣李壽田吳德章等三名薪水仍照冊造銀數支銷並懇

飭部立案所有回華學生薪水仍准隨時酌加以加至二百兩爲止以示限制

一原奏稱冊造支給前後學堂生童贍養項下查閱廠章程生童月支贍養銀四兩並無隨時加給明文卽因生童學有進益酌量加給亦應分別等次立定限制庶不致任意增添漫無稽考今前後學堂各處藝童既無額定名數亦無

額定支數或同係生童復有教習名目生童支數前後互有參差幫教支數彼此亦未畫一所開贍養由四兩至二三十兩不等較舊定之數加至數倍實屬毫無限制應令該大臣遵照章程參酌情事將生童贍養加至十餘兩二三十兩者大加刪減並將生童分爲等次釐定在何等者准支若干仍不得過若干庶該廠以後易於遵循部中亦便於稽考所有各學堂生童支過贍養銀三萬零一百八十九兩七錢五分應俟該省自行刪減立定等次之後再行核辦等

語臣謹查冊內月支至二三十兩以上者均幫
教薪水非學生贍養也船政開設學堂之始教
習幫教均用洋員迨學習有年學生堂課已深
除選派出洋外遇有幫教需人卽由此項學生
選充酌給薪水不支飯食其有訓迪精勤者隨
時量加間有曾歷外洋及曾充輪船管駕者不
能不畧爲優給而較之僱用洋員所省已多此
幫教支數不能畫一之情形也學堂原定章程
雖無加給明文然學堂老班學生入堂旣久其
諳熟洋務技藝優長實堪備異能之選非酌與

加給不足以作養人才故有月支十餘兩者他如繪事院之繪圖精緻電報局之報打靈捷者均予優加係量能授食與學生加贍微有不同此學生贍養較舊定之數加至數倍之情形也今部臣令將生童釐定等次支數庶以後易於遵循而便稽考允爲良法應請自光緒十三年起凡考試學生另列特等一項學生經考列特等三次者除照章獎賞外月加贍養銀一兩再考列特等三次者月再加銀一兩以此類推其入堂未滿三年者不得列入特等庶有有限制部

中按獎賞冊籍亦便稽考至光緒十二年以前各學生歷經加給者爲數既屬無多若必概行追減殊失從前鼓舞之意合無仰懇

天恩准予如數支銷以清積贖

一原奏稱冊造支給藝徒工食項下查藝徒係奏明添設核與錄送原案相符第原奏並未聲明每名日給工食若干亦未有聲敘隨時考校酌加之語檢查該大臣奏闡廠藝童等分別支欸附片內稱藝徒自選充之始日給工食銀一錢五分今據冊報每名日給工食銀一錢九分

殊屬不符自應將支銀一錢九分者刪銀四分
支銀一錢七分者刪銀二分統以日給銀一錢
五分准其開銷計此款刪除銀三百四十八兩
九錢六分應令轉飭追繳等語臣謹查閩廠有
藝童藝徒之分藝童卽指前後學堂習學製造
駕駛之學生而言是以初次遣散洋匠該學生
等脫手自造一船命曰藝新言藝童所新造也
至輪機水缸拉鐵截鐵及鐵脅各廠其習學技
藝者概稱曰藝徒是藝徒之設亦備選派出洋
本與藝童相附而行入廠學習之始給予工食

銀一錢五分係作本人飯食兼以畧贍其家猶之藝童入堂給予飯食贍養也藝童閱三四箇月考校一次藝徒亦如之藝童考列一等則有獎賞歷考三次一等則有加贍藝徒則不給獎賞惟擇其手藝精進者酌加工食本爲鼓舞人才起見前大臣沈葆楨奏報添設之時未奉事前奏明立案新章故未聲明章程支數臣奏請將工食一錢五分改爲七分五釐係指新招入廠者而言故只言選充入廠之支數未及入廠以後考校酌加之支數若概不准加增則此後

入廠藝徒日僅工食銀七分五釐殊不足以廣招徠而示鼓舞合無仰懇

天恩仍准如數支銷並懇

飭部立案此項藝徒仍准隨時考校量加以加至一錢九分爲度以示限制

一原奏稱冊造支給續派出洋肄業藝徒贍養項下查贍養銀兩係援照前次出洋肄業成案給發惟臺防案內養船項下出洋藝徒每名原支十六兩經臣部核定月刪銀四兩准支銀十二兩此次續派出洋肄業藝徒自應比照每名

准月支銀十二兩刪銀四兩計張啓正等五名
統共刪除番折庫銀三百十四兩六錢六分六
釐七毫應令該大臣如數追繳等語臣謹查藝
徒必技藝精良且通洋文繪算者始足以膺出
洋之選此項藝徒早經拔升作匠月支或已十
兩有奇更復使之遠涉數萬里若不畧爲加給
何以鼓勵其心前大臣吳贊誠定爲月給贍養
銀十六兩本無濫予迄今三年限滿該藝徒等
均已藝成回華派廠監工方期宣力以圖報稱
一旦追減其前領贍銀責令繳納不特失鼓舞

人才之本意且恐無以勉勵將來合無仰懇

天恩俯念該藝徒等遠涉重洋所有加給贍銀免予
追減以廣

皇仁至臺防養船冊支此項藝徒亦由船政支放事

同一律自當另案請免追繳合謹陳明

一原奏稱冊造支給船槽匠丁工食雜費項下
查臣部核覆臺灣格林礮案內機器匠月支銀
八兩閩省碰雷案內機器匠亦月支銀八兩在
案今冊造管槽機器匠二名每名月支銀十二
兩支數浮多應照成案每名月刪銀四兩准支

銀八兩又小工十二名每名支銀四兩二錢比
照本案辦公所小工支銀三兩六錢亦有浮支
之處應每名月刪銀六錢准支銀三兩六錢計
此欸共刪銀五百五十四兩二錢九分三釐二
毫四絲應令如數追繳等語臣謹查船槽爲修
船必需之所槽身袤長三十餘丈機括叢雜運
以四十匹馬力輪機看管之匠必通曉汽力洞
悉窳竅始無僨事之虞固輪船管輪之流亞非
格林礮及碰雷案內僱用修整零件工匠所可
比前大臣沈葆楨原定月辛十二兩係照船上

管輪支數按馬力遞減又以在廠工作無涉歷
風濤減之又減酌給此數本無浮濫至該槽僱
用小工專爲磨擦輪機槽身機括而設係匠作
小工亦非辦公所但供洋人使令之小工所可
比其辛工倣照本案健丁支給亦屬省之又省
並無浮支合無仰懇

天恩俯念該匠等責任綦重所給月辛實由量能授
食免予追繳以重要工

一原奏稱冊造支給洋員匠薪水項下查出洋
監督薪費清摺內開洋監督一員薪水每年支

銀七千二百兩今冊開出洋監督日意格既由
出洋本欸月支銀六百兩復於製船項下支銀
四百兩殊與奏定數目不符又嘉樂爾因兼辦
公所月支洋平番銀三十五兩八錢五分檢查
合同並未登註均應照數刪除計此欸共刪除
洋平番銀六千九十二兩九錢九分一釐九毫
折合庫平紋銀五千五百九十四兩二分五釐
八毫八絲一忽四微應令將刪除銀兩在於承
辦之員名下如數追繳歸欸等語臣謹查洋員
日意格於同治五年經前閩浙督臣左宗棠奏

派爲船政正監督月支薪水銀一千兩載在原立條議第十條同治十二年洋匠限滿遣撤卽行住支迨同治十三年臺灣有事經前船政大臣沈葆楨附片奏明挈該洋員東行以收指臂之助每月薪水照舊支銀一千兩在於閩省臺防案內支銷均屬有案可考光緒二年議遣閩廠學生出洋學習復奏派該洋員爲洋監督其時臺灣礮臺監工洋槍教習甫經裁撤而仿造鐵脅船及新式省煤輪機各洋匠已陸續到工此項匠工皆先經該洋員訂募是於船政尙有

應辦事件出洋監督係屬兼差自無減支薪水之理經前船政大臣吳贊誠議由出洋本欸月支銀六百兩船政製船項下月支銀四百兩以昭平允出洋薪費清摺係北洋大臣李鴻章主稿具奏該大臣不知日意格薪水於船政更有找給僅將出洋本欸支數列摺入

告而吳贊誠以爲日意格月薪一千兩早經奏報有案此次雖勻作出洋及製船經費兩項開支於原額初無浮溢故未將此節聲明奏報部臣所謂與奏定數目不符職是故也厥後第一屆出

洋學生陸續回華第二屆出洋學生人數稀少
工次僱用洋員匠又所剩無多經前船政大臣
黎兆棠與出使德國大臣李鳳苞往返函商議
定該洋員祇就出洋本欸月支銀六百兩其由
船政找給之四百兩於光緒七年四月起截支
是承辦之員凡有一毫可省之欸無不力爲撙
節其不至以

國帑市惠可知臣又查辦公所原設洋文案一員
名曰額蘭凡工次洋員匠薪水由其承領支放
中外交涉文件由其繙譯洋人來廠者由其安

插出洋局往來函稟由其轉遞光緒五年十二
月間額蘭因病撤回其時工次洋員匠無多此
項洋文案不復僱募補充所有應辦各事議令
後學堂英學教習嘉樂爾兼之嘉樂爾病故復
以前學堂法學教習邁達兼之均於月薪之外
另加七一七洋平番五十元折合銀三十五兩
八錢五分以爲紙筆酬應之費亦爲樽節經費
起見惟嘉樂爾合同未經登註無怪致啓部臣
之疑不知嘉樂爾留工增立合同在於光緒五
年四月兼辦洋文案起支公費在於是年十二

月立合同在先兼文案在後是以未經登註然
合同雖未登註而辦公所月支雜款據字內第
一條卽已載明該據字早經送部可爲確據其
無浮冒可知合無仰懇

天恩俯念此項洋員薪費均屬應支之款非承辦之
員有所冒濫其未經聲明奏報之故係在未奉
新章以前

准予如數支銷免予追賠以清積贖

一原奏稱冊造支給洋員匠路費貼辛項下鄧
羅理格及婁室來工路費各支銀七百一十餘

兩理格及妻室回國路費支銀七百五十六兩
查僱募洋匠所費已屬不貲卽間有帶妻室者
理宜由洋人自行設措中國不應於洋匠路費
之外再爲籌及眷口路費致糜費竟無旣極雖
據合同內將此項聲明究係原立合同之員辦
理不善臣部礙難核准所有鄧羅理格來工路
費及理格回國路費均應照三百七十八兩之
數支給其溢支銀兩卽著落原立合同之員如
數賠繳以重庫欸計此欸共刪洋平番銀一千
零四十四兩四錢二分零四毫折合庫平紋銀

九百五十八兩四錢九分二釐五毫應令將刪
除銀兩在於承辦之員名下如數追繳等語臣
謹查鄧羅理格均於光緒六年間應募來工係
洋監督日意格在洋與之訂立合同合同之內
載有眷口一名來回路費均由船政發給並聲
稱異國人奔走數萬里効順

天朝挈眷偕來酌給路費以資鼓舞

天朝所謀者大斷不肯惜小費以失有用之材等語
當時見其措詞正大且所給僅只一名爲數亦
屬無多合同既經訂定自當准予照支今部臣

以爲原立合同之員辦理不善著令賠繳自應
遵辦惟原合同係洋監督日意格在洋代船政
訂立該洋員業已病故無從責賠合無仰懇

天恩逾格准予支銷以免軫軫嗣後如有僱用洋人
自應遵照部章不准開支眷口路費以期撙節
一原奏稱冊造甄別考取各生童加獎項下查
錄送章程內載開局之日起每三箇月考試一
次其學有進境考列一等者賞洋十元連考一
等者於獎賞外另賞衣料以示鼓舞等語今據
冊造考取生童每名加獎一二元至十六元不

等殊與定章不符應將開報過十元者均行刪
減其賞給十元不及十元者俱准照給計此款
刪除洋番二十二元折合紋銀十四兩四錢應
令將刪除銀兩如數追繳等語臣謹查原定章
程凡學生考列一等者均賞洋十元然同考一
等之中學問不無微分高下若概行照章統給
十元雖能恪守成規轉恐未成鼓舞歷任各大
臣參酌變通因於每次甄別案內計一等若干
人就中復第爲甲乙或給予十餘元或僅給一
二元大抵多給之數不敵短給之數以勵人才

亦以節經費今若令多給者照章追繳若短給者照章請補轉恐纏糾不清合無仰懇

天恩准予如數支銷並懇

飭部立案此項加獎仍准於十元之數酌量變通每名照十元之數勻扯加獎總不得有逾原額以示限制統計此案戶部共刪減銀八千六百六十四兩九錢三分四釐六毫九絲一忽四微行查銀三萬一千二百三十四兩五錢五分臣再四勾稽見前支各欸均屬覈實支銷並無浮濫卽間有未經奏明立案者實緣用欸在於未奉

新章以前自未便以新章繩其既往除行查各
款另行登覆咨部請銷外所有刪減各款仍請
如數支銷各緣由謹會同署福州將軍臣古尼
音布閩浙總督兼管福建巡撫事臣楊昌濬合
詞恭摺具陳伏乞

皇太后

皇上聖鑒訓示謹

奏

光緒十三年四月十六日拜發奉

硃批戶部議奏欽此

英日通商手続書

二

南洋監造快船員生薪水懇

准照支並專案具報摺

奏爲南洋監造快船委員學生薪水懇

恩仍准照支遵照部議專案具報恭摺仰祈

聖鑒事竊_臣前將南洋監造委員汪喬年薪水並南

洋加給工程處學生魏瀚等六員薪水支銷數

目附片請

旨飭部立案於光緒十三年四月初一日欽奉

硃批戶部知道欽此欽遵嗣准部議以汪喬年薪水

祇准照金陵監造機器局委員之例月支七十

兩其從前溢支銀兩卽由臣核明數目於嗣後
應給該員薪費內扣抵又以魏瀚等六名加數
太鉅應令或酌減人數或酌減支數卽行專案
奏報各等因抄錄奏稿咨行前來臣查魏瀚等
六員薪水支數臣於光緒十一年十二月間會
同督臣楊昌濬遵

旨考覈員紳單內曾經開列學生魏瀚等於月支薪
水銀若干兩外又監造南洋快船加給銀五十
兩並經部臣核准有案至其人數臣於光緒十
一年五月間與左宗棠等聯銜

奏請試造雙機鋼甲摺內亦經聲明以魏瀚鄭清
濂吳德章監造船身以陳兆翔李壽田楊廉臣
監造船機奉

准在案溯自船政創辦之始製造悉用洋員月薪多
者四百兩少者亦不下二百兩誠以其事甚創
名家爲難此左宗棠奏定章程內所以有子弟
學成監造者卽令作監工其薪水照外國監工
發給之語今魏瀚等藝成而上勞勩非常而所
給月薪尙不及洋員三分之一卽益以南洋加
給亦不及洋員三分之二且旣經核准有案當

此工程喫緊似未便驟與議裁若以人數六員恐浮於事抑知製造工程或繪圖式或製輪機或定船身或造器械各有專精之藝必合眾技而成之六員者分工集事責有攸專實爲船政局必不可少之員現在於監造快船外更復趨造鋼甲並第六號鐵脅各船工程倍於曩時不特無慮人浮而且各有兼人之任是其人數亦實在無從覈減合無仰懇

天恩仍准將該學生等加給薪水人數支數

飭部立案照支以示鼓勵至汪喬年駐工監造實與

圖則出自汪喬年一人之手經前總理船政沈葆楨

奏明在案迨南洋興造快船左宗棠遂以該學生

藝學有成派作委員駐工監造而前船政提調

道員呂耀斗亦准照奏定藝學章程第八條學

生學成監工薪水照洋監工之例酌劑其中稟

由左宗棠核定月給薪水公費銀共一百三十

兩該委員自駐工以來實能與工程處各學生

互出心裁精求製造其所監造之快船一日開

濟曾駛赴北洋會操二日鏡清亦經南洋驗收

其第三號寰泰業經下水秋間即可試洋是該
委員監造各船確有功效與他局監造委員祇
事巡視工作者未便同日而語既准部咨前因
臣自應遵照部議將該員薪費自奉到部文之
日起月以七十兩開支以期撙節惟從前已支
銀兩薪費均屬因公可否仰懇

天恩俯念該委員駐工數載著有微勞其已支者
准予飭部立案照支免其扣抵出自逾格

鴻慈臣不勝顛懇悚惶之至除將歷屆奏案鈔錄咨
復戶部外所有監造委員學生薪水仍請

飭部立案緣由謹會同南洋大臣兩江總督臣曾國

荃署福州將軍臣古尼音布閩浙總督兼管福

建巡撫事臣楊昌濬合詞恭摺由驛四百里馳

陳伏乞

皇太后

皇上聖鑒謹

奏

光緒十三年五月十五日拜發奉

硃批著照所請該部知道欽此

補派後學堂委員改爲留工候差片

再臣於本年三月間奏請將閩廠後學堂監督兩缺添派刑部主事曾福謙候選直隸州知州劉宗駿二員會同管理欽奉

硃批戶部議奏欽此嗣經部議礙難核准各情於閏四月初二日具奏奉

旨依議欽此欽遵恭錄

諭旨抄錄原奏飛咨前來臣查後學堂監督兩缺自梁佟年等撤差後實係難乎其入暫派他廠員紳兼攝臣前奏曾經聲明在案中間並無懸曠

多時今部臣以節費爲辭臣亦何敢堅持前見計惟仍復派員兼理以期事無貽誤其添派之曾福謙劉宗駿二員自應遵照部議於奉到部文之日卽行裁撤惟曾福謙精明穩練事事講求實際亦復留心洋務劉宗駿由諸生出洋歷充英德法各國出使大臣隨員在洋十有二年通曉中西語言文字該兩員皆爲有用之才以之充當船工差事尤爲相宜容臣仍留工次俟有相當缺出再行酌補至該員等已支後學堂監督薪銀本應遵照部議追繳惟念該兩員自

委辦以來經理一切尙見勤勞似未便令其枵腹從事可否仰懇

天恩免其追繳之處出自逾格

鴻慈除咨復戶部外謹會同署福州將軍臣古尼音

布聞浙總督兼管福建巡撫事臣楊昌濬合詞

附片具陳伏乞

聖鑒訓示謹

奏

同日拜發奉

硃批該部知道欽此

船政奏議彙編卷三十五終

船政奏議彙編卷三十六目錄

裴蔭森十

協造廣東兵輪八號請由船政報銷摺

烈婦陳李氏請

子旌表片

第六號鐵脅兵船下水摺

寶泰快船試洋並陳廠務情形摺

遵議覆奏核減快船保案文職員數摺

奏覆協造廣東兵輪援案開支官款摺

建修廠所船臺添配各項機器照章聲明立案

片

船政奏議彙編卷三十六

裴蔭森十

協造廣東兵輪八號請由船政報銷摺

奏爲閩廠協造廣東兵輪大小八號定議協欵統
由船政報銷籲懇

天恩飭部立案恭摺具陳仰祈

聖鑒事竊查戶部奏定外省報銷章程第十四條內
開各省設立機器局並閩省船政局總計常年
經費若干如有添購機器經費若干雖不能限
以定數亦當立有範圍事前奏明報部立案事
後方准覈銷等因閩廠前爲南洋製造二千四

百匹馬力快船三號一曰開濟二曰鏡清早經
竣役駛回金陵三曰寰泰業已下水與本廠自
造第六號鐵殼快船約九十月間均可完工廠
中更有鋼甲一船當於去冬安上龍骨入舂以
來亦已鑲配脅骨次第施工惟一屆秋間三船
中當竣兩船匠作較鬆必預籌接續之工庶不
致虛糜廠用臣查聞海關應解船政經費積欠
甚鉅近得以連艘併製者蓋藉南洋代造之款
騰挪挹注日起有功現在南洋三船工程既畢
船政月款有限專造鋼甲兵船而外匠力縱可

分給而辛資料件苦無可指之欸乘間兼營積
二十年來締造苦心養才儲器不爲不備乃以
費繼之故能盡數圖之量者限於一圖能應數
所之需者限於一所體察時勢固不敢任令曠
延又不敢輕言收束若不設法力持其後則前
功盡廢殊非所以體

國家自強之意恢海宇利濟之模正擘畫間適准
兩廣督臣張之洞函詢製造大小兵輪船情形
因將閩廠新舊所製各船分別馬力之大小駛
行之遲速酌估工料價值繪圖貼說以告時廣

東方製淺水輪船而海上巡防東西相距二千餘里之遙實乏巨艦分紮其間用資號召因商就閩廠製造一千六百匹馬力快船一號二千四百匹馬力穹式快船三號徒以籌款不易零星湊集每號各協番銀九萬兩共三十六萬兩又商於工隙搭造中等淺水兵輪船四號每號各協番銀三萬兩共十二萬兩均自開製以訖工藏酌分三次兌解當經臣通盤牽算八船協價雖僅而得半然粵濟閩廠經費之不足閩協粵省工力所有餘製船用船均屬公家自無庸

兩相計較臣既先後函復如議飭廠分辦其鐵
脅一艘擬卽以現製第六號快船秋間竣後撥
應粵防並上年經臣奏明由閩廠在德國克虜
伯礮廠定購十五生口徑礮三尊十二生口徑
礮四尊荷乞開士連珠礮四尊各配藥彈等項
計價十二萬一千零四十餘兩亦歸粵省籌撥
以資分配其新造穹式第一艘自本年四月起
約十八箇月第二艘約二十四箇月第三艘約
三十箇月可以次第完竣其淺水四船自本年
閏四月起約十六箇月可成兩號又八箇月工

竣亦如之兼擬於船旁左右出水加高喫水加深仍可出洋駛行以期得力當於四月閏月間由粵先後兌闕於鐵脅穹式項下解到協造番銀二十萬兩又於淺輪項下解到協造番銀六萬兩經臣飭工程處學生直隸州知州魏瀚遊擊陳兆翹等陸續匯寄外洋商由洋員福禮士在法國科兒蘇製廠定購鋼板料件咨由出使法國大臣許景澄驗收運閩應用以上協造粵省輪船大小計共八號閩廠一面遵照

奏案趨造鋼甲船隻按時銜接辦理以重要工臣

維船政往者製成各船輒派赴南北洋各口備防頗擴舟楫之利閩粵比鄰緩急與共此次粵省籌款製造兵輪事屬海防船政又何敢稍分畛域且洋舶入華以粵海爲首衝粵繕舟師閩之臺廈隱隱然亦門庭之益固海疆唇齒關繫邊防微特通力合作爲閩廠一時周轉之計至將來成船動用工料總數仍歸船政報銷仰懇天恩俯准

飭部立案以符向章而昭核實理合將協造廣東輪船大小八號定議協款緣由謹會同署福州將

軍臣古尼音布閩浙總督兼管福建巡撫事臣

楊昌溶恭摺具陳伏乞

皇太后

皇上聖鑒訓示謹

奏

光緒十三年五月十五日拜發奉

硃批該衙門知道欽此

烈婦陳李氏請

子旌表片

再據代辦船政提調四品銜前浙江餘杭縣知縣王崧長等聯名稟稱查有已故烈婦陳李氏係福建福州府侯官縣人幼具淑姿長嫻閨訓事父紹昌母林氏以孝聞年二十有二歸同邑儒士陳健儀逮事舅姑克盡婦道健儀體羸善病值父歿營葬蒙犯炎暑病益加劇氏侍奉湯藥衣不解帶者經年光緒十年閏五月十八日健儀病故氏痛不欲生矢志殉烈以家人防之

九上言... 卷之二... 三
密無所得間遂起治喪事陽陽如平時逾月健
儀出殯有期先一日氏蚤起躬營齋奠神色無
少異日加午命女備具湯浴久之不出亟破扉
入則投纒寢室氣已絕矣時七月二十六日距
健儀死僅六旬年甫二十有六歲健儀家本寒
素其族人多旅游他省不能自達於有司職等
誼屬桑梓且與氏嫡堂兄江蘇補用知縣李聖
培同事船工見聞既確不忍聽其湮沒造具冊

結稟懇

奏請

旌表前來臣查該烈婦陳李氏無忝所生深明大義
職修佩帨既盡孝以無虧節勵摩筭復捐生而
不悔洵爲巾幗完人宜邀

褒揚盛典相應籲懇

天恩俯准

飭部旌表以維風化以闡幽潛除册結咨送部科外

理合會同閩浙總督兼管福建巡撫事臣楊昌

濬福建學政臣陳學棻附片具陳伏乞

聖鑒訓示謹

奏

同日拜發奉

硃批著照所請旌表該部知道欽此

第六號鐵脅兵船下水摺

奏為第六號鐵脅兵船下水循例具陳仰祈

聖鑒事竊閩廠鐵脅輪船造成五艘第六艘於光緒

十一年十月十八日安上龍骨經

臣

奏明在案本年六月初旬據工程處監造學生直隸州知州魏瀚參將陳兆翹等稟稱該船自灰
船鑲鈐以及包裹銅板各工一律告竣請諏吉
下水

臣

謹擇是月十七日午時致祭

天后江神土神船神乘潮推送勢極靈穩擬名曰廣
甲該船計長英尺二百二十二尺寬三十三尺

七寸深二十五尺三寸船唇刻水深十一尺船
腰刻水深十二尺五寸船尾刻水深十三尺九
寸全船可載一千三百噸配新式一千六百匹
馬力康邦三脫汽三汽鼓臥機一座以法推算
每點鐘應行十四海里合中國每時可行九十
二里船首兩旁耳臺配新式後膛十五生鋼礮
二尊每尊可施放一百二十度船中兩旁配新
式後膛十二生鋼礮四尊每尊可施放九十度
船後配新式中樞旋轉後膛十五生鋼礮一尊
可施放二百一十度瞭臺上配連珠礮二尊鋼

桅上配連珠礮二尊以備攻擊魚雷艇之用船
前旁左右應配魚雷筒二具用以衝擊敵船艙
面配鋼桅二枝木桅一枝張挂鬪席以收風力
而省煤斤船之美備較前製各船僅七百五十
匹馬力者殆爲過之蓋推陳出新洋人雖日更
其舊制而呈能效巧閩學亦盡得其祕傳也臣
復詳加體察目下工程全船鐵脅均已配就內
外兩舳均已封完船內阻漏鐵堵暨鐵梁鐵柱
鐵牽鐵鉗等項既安設咸宜輪機水缸颿纜鐵
鍊軍火淡水等艙亦布置就緒輪機水缸業已

製成其礮械藥彈前由德國克虜伯廠定購者亦經掃數運到只俟次第分配約三月後即可展輪試洋臣查閩廠現爲粵省協造大小兵輪八號成船尙需時日前准兩廣督臣張之洞函商需船甚切臣允俟此船竣工卽先撥赴粵防藉資號召經於五月間

奏報定議協造粵輪摺內聲明在案閩粵一家固無所分其畛域且雙機鋼甲兵船現方趨造明歲可成將來留備閩防亦可以固藩籬而嚴守禦矣除試洋之後另將行駛情形咨明海軍總

理各國事務兩衙門及戶兵工各部存案外理
合會同兩廣總督臣張之洞廣東巡撫臣吳大
澂署福州將軍臣古尼音布閩浙總督兼管福
建巡撫事臣楊昌濬恭摺由驛馳陳伏乞

皇太后

皇上聖鑒訓示謹

奏

光緒十三年六月二十二日拜發奉

硃批該衙門知道欽此

大正ヲ言ヒテモ
名ニニ一ノ

ナ

寰泰快船試洋並陳廠務情形摺

奏爲寰泰快船試洋並現在廠務情形恭摺具陳

仰祈

聖鑒事

臣

於光緒十二年十月初八日業將第三

號寰泰快船下水日期並該船丈尺行程里數
專摺

奏報在案數月以來督率在事員紳工匠併力趨
造七月初旬全船工竣遂擇於十二日卯刻躬
率代理提調王崧辰及工程處各廠所員紳致
祭

天后展輪試洋是日北風大作潮聲甚壯該船由羅
星塔駛至媽祖澳放洋而行船身穩固如履平
地水缸升大火輪機每分鐘旋至九十一轉每
點鐘行法速率十五迷盧半合英速率十八迷
盧若遇浪靜風平燒用上等英煤每時可行一
百里許臣查製造此等快船每點鐘能行法速
率十五迷盧卽爲絕技今得十五迷盧有半則
其輪機之靈快已有逾於原定之數該學生等
於製造之學研慮殫精不特矚中華未有之奇
能抑且駸駸乎駕泰西而上之矧三船皆爲南

洋代造而製法則日新月異復有不同開濟之
堅韌靈捷既非南瑞南琛所能及而鏡清又勝
於開濟寰泰又勝於鏡清所謂進而益精熟能
生巧南洋得此三艘洵足以壯東南海疆之聲
勢矣閩廠自快船工竣一面營造雙機鋼甲輪
船兼爲粵省協造穹式快船及淺水兵輪鉅工
併集其材木之駢羅夫役之奔赴期限之嚴急
製造之繁難非藉羣策羣力以圖功殆難計月
計時而畢事臣仍督飭工程處學生魏瀚陳兆
翔鄭清濂吳德章楊廉臣李壽田等接聯監造

俾資熟手而重要工其南洋監造之委員江喬年本係製造學生出身現雖快船工竣而閩廠工役繁興自應仍留船廠當差藉收臂助除飭管駕官吳安康將該船定期駛赴金陵驗收遣用並將該船所用員弁銜名及礮勇水手人等月給薪糧咨由南洋大臣曾國荃

奏咨立案外所有寶泰快船試洋並現在廠務緣由謹會同南洋大臣兩江總督臣曾國荃署福州將軍臣古尼音布閩浙總督兼管福建巡撫事臣楊昌濬恭摺由驛四百里馳陳伏乞

皇太后

皇上聖鑒謹

奏

光緒十三年七月二十六日拜發奉

硃批該衙門知道欽此

遵議覆奏核減快船保案文職員數摺

奏爲遵議覆奏並核減保案文職員數籲懇

天恩准予獎勵以昭激勸謹繕清單恭摺具陳仰祈
聖鑒事竊臣於光緒十三年四月初九日奏請鏡清

快船業經南洋驗收將在事出力員紳人等遵
旨擇尤請獎一摺欽奉

硃批該衙門議奏單三件片二件併發欽此嗣經部
議以此案文職員紳保至一百四十餘員之多
較光緒五年間鐵脅奏獎成案員數計加一倍
有餘不免浮濫應令將各該員等分別在工之

久暫勞績之優次按照鐵脅請獎成案員數覈實刪減並聲明船成六號除鏡清快船外其餘係何項船隻是何船名及各員紳到工年月詳細查明覆奏再行覈辦至另片奏獎閩廠總司製造各員亦令一併覈實覆奏照成案給獎等因於七月十二日具奏奉

旨依議欽此欽遵恭錄

論旨抄錄原奏飛咨前來伏查船政保案自光緒五年間鐵脅告成奏獎後迄今八年中間成船鏡清而外更有康濟澄慶開濟橫海寰泰五艘並

鏡清共成六號前後奏報有案現在廣甲下水
則又不止成船六號矣自中國開廠造船以來
至開濟而規模始拓至鏡清而機括愈靈近日
寶泰試洋速率又視鏡清爲勝蓋亦精益求精
之明效且此等快船計長二十六丈有奇寬三
丈六尺高三丈四尺喫水深一丈四尺配新式
三汽鼓康邦省煤臥機一副計實在馬力二千
四百匹每時可行水程百里許全船噸載計二
千二百噸每噸合中國一千六百八十斤其規
模之宏敞機器之精良行駛之迅速迥非常式

舊製之兵輪可比視外國所謂次等鐵甲者已
有過無不及之而閩廠不用洋員放手自造竟
能臻其美備創中華未有之奇此皆

聖主日省月試稱事勸工所以在事人員感激思奮
日起有功遂以二十餘年之締造駸駸乎駕技
巧於外洋其勞績正有不可沒者也 臣前兩次

奏請將製造鏡清出力人員擇尤獎勵迭經奉
旨允准夫勞則必錄者激勵人才之心賞無濫施者
慎重名器之道 臣雖迂拙具有天良斷不敢以

國家逾格之恩市惠僚屬前單所列在工各該員

均係擇其供差已久積有勞績者方予開保其
有到工在鏡清快船下水之後者業已一概刪
除不敢濫爲厠列卽以勞績而論於員紳則擇
其始終勤勞者於將弁則擇其防護勇奮者於
工匠則擇其技藝優長者然猶再三審慎僅以
尋常勞績列保惟於船工總匯之工程處學生
魏瀚等爲之另片請獎量加優異是此案列保
之員均係在工年久而其勞績之優次在臣固
已早爲分別也至所保員數較之前屆鐵脅成
案誠如部臣所議不無加多然其所以加多蓋

亦有故委非出於浮濫請爲我

皇上陳之臣維光緒五年六月鐵脊告成保案距元

年五月船工告成保案中間相去僅有四年所
有在事員紳少所更換故其員數僅就在工開
列而見少此次保案距五年鐵脊保案更隔八
年之久其間在事員紳不無供差數年或赴本
任或調別差者一缺交替前後兩人既著勞績
於先自未便因離工而不爲彙保此員數之加
多者一也鐵脊開保之時其間監工匠首半用
洋員故員數特少泊製造快船各廠日異月新

工程浩大凡安設礮械鑲配魚雷電燈快船中所必需者均須添設廠員以專其事而向之用洋員者今皆以學成藝成之學生藝徒代之此員數之加多者二也部議所駁員數專指文職而言查鐵脅告成案內前後學堂學生多以武職保獎其時學堂教習亦半用洋員今則兩學堂僅以四洋員爲總教習其餘每班教習均以學成製造駕駛管輪之學生充當且自捐例既開各學生多有量力報効指捐文職者此次保案自不能不仍其職銜列保此員數之加多者

三也此皆實在情形其不敢有絲毫冒濫自在
聖明洞鑒之中若必責令照鐵齋成案刪減則同一
赴業程功臣既目擊其勤勞自未便臆爲軒輊
况闔廠現在繕造鋼甲並協造廣東穹式淺水
各兵輪工程正在喫緊尤當有以作其氣而策
其能但既准部議前因臣特就前單所列文職
員紳於無可刪減之中視其離工較早勞績較
次者極力刪減三十三員名以副部臣覈實之
意合無仰懇

天恩俯念

臣

廠在事員紳人等出力有年不無微勞

足錄且案奉

俞允在先業經遵照部議刪減

准予飭部照單獎敘以示激勸出自逾格

鴻慈至前奏另片請獎總司製造各員委係勞績優異可否並懇

天恩飭部准照原片獎勵臣不勝屏營悚惶之至除

將員紳到工年月開單咨覆吏部外所有遵議

核減保案文職員數緣由謹會同南洋大臣兩

江總督臣曾國荃署福州將軍臣古尼音布闈

浙總督兼管福建巡撫事臣楊昌濬合詞恭摺

具陳伏乞

皇太后

皇上聖鑒訓示謹

奏

光緒十三年八月念四日拜發奉

硃批著照所請吏部知道單併發欽此

奏覆協造廣東兵輪援案動支官欵摺

奏爲閩廠協造廣東兵輪八號應援照開濟快船
成案動支官欵籲懇

天恩仍由船政報銷

飭部立案恭摺具陳仰祈

聖鑒事竊

臣

於光緒十三年五月十五日奏陳閩廠

協造廣東兵輪八號定議協欵統由船政報銷

一摺六月初五日欽奉

硃批該衙門知道欽此欽遵在案嗣由戶部奏稱粵
省所造兵輪係由官紳捐辦與南洋之動支官

欵者不同將來應由廣東督撫彙案開報該大臣所請由廠報銷先行立案之處應毋庸議至於造船價銀該大臣既與粵省自行定議將來卽由該大臣與粵省自行清算不得於官欵內先爲墊付亦不得開支監造員紳薪水等因七月二十一日奉

旨依議欽此欽遵恭錄

諭旨並抄粘原奏飛咨前來臣查船政開支涓滴皆關帑項在部臣慎重度支固應嚴爲考覈惟協造者但協船工所不足非全船工料毫不動支

官款而能成也溯自船廠創設垂二十年當締造之初財源較裕取材既便成船亦多故南北洋各口需用輪船無不隨時派赴固無所謂協造也光緒四五年以後閩海關四成項下應月解二萬金者近來尙勉強敷額六成項下應月解三萬金者或全年停解或每年僅解兩三月積欠竟至二百餘萬之多製船之費既無巨款可資乃以協造酌劑其盈虛亦甚不得已之計也光緒六年前督臣何璟前督辦船政黎兆棠議造開濟快船需銀四十萬餘兩以官款不足

請由南洋撥解二十萬兩以助其成船成仍歸南洋遣用此協造之船曾動支官款有案者也自時厥後閩海關之欠解如故閩廠之支絀亦如故而能維持不墜者則因開濟竣工又有鏡清寰泰兩船承平其後得以南洋解款展轉支拄以迄於今現在三船均已告成船政除專造鋼甲兵輪及六號廣甲船業已下水外原可自製穹式兵輪以資利濟無如月入有限不能儲成大款爲外洋購買鋼料之需勢且至待料停工貽誤大局殊非所以體

國家講求海防之至意時值兩廣督臣張之洞以
粵省巡防需船頗急鳩集官紳捐款僅數十萬
以之自造則萬萬不敷因與閩廠商爲協造辦
法粵濟閩經費之不足閩助粵工力所有餘撥
銀四十八萬協造大小兵輪八艘等語函商前
來惟核計兵輪八艘工料需款在一百一十萬
左右粵之協款四十八萬尙不及工料之半因
按照閩廠協造南洋開濟成案其不敷工料卽
由船政官欸開支協辦此臣原奏所以有協價
僅而得半之語而請將動用工料統歸船政報

銷也

臣

維船政之設原以籌備沿海七省非福

建一省所得而私方今威遠康濟鎮海供差於

直隸之津沽湄雲在奉天之牛庄泰安在山東

之煙臺靖遠登瀛洲在南洋之金陵超武元凱

在浙江之甯波伏波海鏡在臺灣此數船皆係

船政所造及其派撥各省並不索取原價分文

誠以同屬海疆彼此無所分其畛域况粵東毗

連閩海復爲洋舶入華之首衝內而港澳外而

瓊廉近守遠攻在在皆關形勢即使閩治粵師

粵省力難協濟亦應酌派巨艦以固藩籬矧協

以鉅貲與各省尤不容歧視臣聞張之洞經營是項兵輪其邀集官紳捐辦幾於舌敝唇焦僅得此數若閩廠不與合力通財勢不能再籌接濟功墜垂成不特莫慰粵民報效之忱且恐陰啓他族窺伺之念兵輪之成否係粵備之堅瑕其有關於海防者誠非淺尠雖欸由捐集應歸粵省報銷而料件辛工既從閩廠開支非由船政報銷不足以昭覈實可否仰懇

天恩俯念粵省協造兵輪八艘原與外洋購買合同訂價者不同雖日捐欸而成船均爲公家防海

之用與通商口岸鳩費造船裝貨貿易者更自有別既於閩廠可資周轉復於粵洋有裨巡防事屬一家計爲兩得

准予援照開濟快船成案成船以後動用工料總數統由船政報銷仍

飭部先行立案出自逾格

鴻慈其粵省官紳捐款應由粵東督撫臣另案具報

不至有所歧異至監造委員魏瀚等自寰泰快船試洋後業經停支南洋津貼銀兩其雙機鋼甲兵輪原本廠應辦之事亦不敢另籌津貼現

在協造粵船係屬兼營併繕自應按照部議無庸另款開支以節糜費合併陳明所有閩廠協造廣東兵輪八號應動支官款緣由謹會同署福州將軍臣古尼音布閩浙總督兼管福建巡撫事臣楊昌濬恭摺附輪船到滬交上海縣由驛四百里馳陳伏乞

皇太后

皇上聖鑒訓示謹

奏

光緒十三年十月十七日拜發奉

硃批該衙門議奏欽此

建修廠所船臺添配各項機器照章聲明立案
片

再前准戶部咨奏定外省報銷新章內載各省
設立機器局並閩省船政局如有添購機器經
費若干事前奏明咨部立案嗣後方准覈銷等
因歷經遵辦在案茲據各廠員紳稟稱製造鋼
甲艦較之從前木壳鐵脅等船工程浩大料件
繁多所有機器棧房均須添拓鐵脅廠計添購
鉋鋼板機器一副並合攏添配工價銀二千二
百餘兩添購碾鋼板機器一副並合攏添配工

價銀二千一百餘兩添購拗鐵平牀一座並合
攏添配工價銀三千六百餘兩添購開鋼鐵圓
孔手機一副價值銀一百餘兩添購大洋磅機
器一副並建蓋木亭安放工價銀三百餘兩拉
鐵廠計添製八匹馬力鐵水缸一副工料銀一
千七百餘兩添製八匹馬力磚爐一座工料銀
六百餘兩添製拉鐵碾輪三合工料銀九百餘
兩輪機廠添蓋棧房一座工料銀五百餘兩儲
材所添蓋木料亭一座工料銀三百餘兩又船
臺鐵水坪鐵車路石道頭年久不無朽蝕坍塌

船臺爲鋼甲船身所托而鐵水坪等處爲起卸
重大料件之地均宜修整堅固以免疎虞計修
鋼甲船臺一座工料銀二千五百餘兩修鐵水
坪鐵車路工料銀一千五百餘兩修石道頭工
料銀四百餘兩又前學堂法學教習邁達應募
來工修理洋樓一座與其住宿計工料銀六百
餘兩又藝圃藝徒既多添蓋誦堂繪圖房二座
計工料銀九百餘兩又閩省籌辦海防購置礮
位均存工次計添蓋儲礮廠一座工料銀四千
五百餘兩添蓋礮廠棧房一座工料銀一千五

百餘兩又前署大臣張佩綸向德國訂購魚雷
十具到工經_臣於十二年十月間奏明所有添
建魚雷廠屋並該廠添製機器兩項用款由船
政製船項下支銷在案計起蓋魚雷廠一座工
料銀五千二百餘兩魚雷廠製配鐵劃坪一座
工料銀四百餘兩製配驗魚雷鐵水櫃一副工
料銀三百餘兩以上各款應歸船政十二年銷
案造報又琛航一船馬江之戰被礮轟沉江干
嗣經撈起由廠大修配換機器添補船身工程
幾及新造之半計工料銀六萬五千三百餘兩

此欸係由船政墊支應歸閩省善後局彙銷等語呈請立案前來經臣覆查無異除咨部查照並飭另行彙案造銷外合將應行照章聲明各欸緣由謹會同署福州將軍臣古尼音布閩浙總督兼管福建巡撫事臣楊昌濬合詞附片具陳伏乞

聖鑒謹

奏

同日拜發奉

硃批該衙門知道欽此